

# XOIN" NGEI"

## MOUGSOUG"

(Leviticus)

### Dang: phang

Xoin" ngei" mougsoug" moo Noku coung" tarha" khyoo: yo' shidphyang" Israela byumyu" yi da" laloem lakhoug: pui" tarha" joem bo lho: jhau" shid khyoo: ri shu" koid vhu" she: wa shid re" yoo voin bo da" khainjung yi shid re" tarha" joem bo da:. He: jhoem: mougsoug" pug moo: yhouggyen: thang zigi Mangso da" gyeung" shang: ziyoy' nya: byumyu" yi da" noku coung" khyoo: nghoid wigi «Israela byumyu" yi da" gyeung" shang: Mangsoo» yo' nyangnu" zoem" khau: khyoo: ri zei: zeing wigi kang so' dei wa khyoo: nghoid da:. He: jhoem: pug moo myeing gyi: da" jhoem: du ri 19:18 moo shau" myang wigi hau: ziri eig loem: ein: da" gyi: thang amyeing" dang: nghoid ga: Yesu tid zi nghoid. Hau: zigi «Re" gung ri jheddab yhang: ti" re" yhoem: kyoo" cang" ri jheddab we» ga: zi nghoid.

### Akhyoo" Again Jhung: Shoem:

Xoin" alu: yo' xoin" ngei" khyoo: yo' sen da" tarha" joem (1:1-7:38)

Arun yo' nya: yuggi zoo: yiri khainjung moo" voin wa shid re" lo, ke" mainkaid byid: khyoo: (8:1-10:20)

Noku thung" khyo" younglho' ziyoy' ayoungho' da" tarha" khyoo: (11:1-15:33)

Youg: noo yooboo shang: byid: bidnyid (16:1-34)

Kangso' dei khyoo: moo: gyeung" shang: ziyoy' noku thung" yo' sen: da" tarha" khyoo: (17:1-27:37)

### Gung Goin" Nghe' Da" Xoin" Joem.

**1** ASEING gi Moshe ri ASEING da" zoem" mo khe: yu wigi <sup>2</sup>Israela byumyu" yi nyangnu" da" xoin" ri ngei" byid: uri cang nyid ca" tarha" joem ri vhoo: mo ziyoy' dakhyo" Moshe ri byid: bye:. Byu dayug yug gougnyhoug xoin" ngei" uri hau: zigi

nya: nu: nghoid nghoid- nya: yang nghoid nghoid- nya: coidbaid nghoid nghoid- nghoid ca". <sup>3</sup>Nyang: gi myi: nghe' xoin" khyo" nya: nu: ri xoin" ngei" nghoid rigi dam abo da" nuloo: ri byid: ca" wa zi nghoid. Nyang: ri ASEING khab yu wa shid re" hau: ziri ASEING da" zoem" khoem" duang: moo: to" too" ca" wa zi nghoid. <sup>4</sup>Hau:

yug gi nu: vhoο" loem moo: nya: lo, ki" byid: wa zi nghoid wigi hau: ziri nya: yoοboo khyoid pyam byid: da" xoin" nghoid ein: khyo" khab yu wa zi nghoid. <sup>5</sup>Nyang: gi hau: nuloo: ri houg moo said wigi Arun da" akung: mo khainjung yigi nu: suid" ri ASEING ri ab byid: lho: zoem" khoem" duang: moo jo, da" phoin: myid: shoid goin" jang" khyoo: hau: ziri foid sain" kaid wa zi nghoid. <sup>6</sup>Hau: thang: nyang: gi gougnyhoug shooyid ri khyoid wigi hau: ziri jab wa zi nghoid. <sup>7</sup>Houg: lho: khainjung yigi phoin: tho' moo thang" nyheing zang lho: myi: moid wa zi nghoid. <sup>8</sup>Nyangnu" gi vhuloem yo' xu: we' bo kaid wigi shoo' khyi joem ri myikhyoem tho' moo: ke" wa zi nghoid. <sup>9</sup>Hau: yug gi khoug: loem khoug: seing" yo' khyid: ri cid" pyam wigi xoin" ngei" khainjung phoo gi phoin: tho' moo: du: goin" ziri myi: nghe' xoin" ngei" byid: wa zi nghoid. He: xoin" da" shoem: gi ASEING ri ngei bu: nhang: wa zi nghoid.

<sup>10</sup>Byu dayug gi nya: yang anghoid lang" coidbaid ri xoin" ngei" wa nghoid rigi dam abo da" aloo: nghoid ca" wa. <sup>11</sup>Nyang: gi hau: ziri phoin: mougzhung: shoid moo said wigi khainjung yigi suid" joem ri phoin: myid: shoid goin" jang" khyoo: foid sain" pyam wa nghoid. <sup>12</sup>Hau: yug shoo" bain zain: thang: ri xoin" ngei" khainjung phoo gi vhuloem yo' xu: we' bo kaid wigi shoo" dangain ziri myikhyoem' tho' moo: ke" too" wa zi nghoid. <sup>13</sup>Hau: su: gi khoug: loem khoug: seing" khyid: sain: ri cid" pyam wigi khainjung phoo gi hau: xoin" ri ASEING jhang ab byid: lho: hau: zi dangain" ri phoin: tho' moo: nghe' wa zi nghoid. He: xoin" da" shoem: gi ASEING ri ngei bu: nhang: wa zi nghoid.

<sup>14</sup>Byu dayug gi ngho' ri nghe' da" xoin" khyo" xoin" ngei" nghoid rigi pheing" kyoug" anghoid lang" jid: u: nghoid ca" wa. <sup>15</sup>Khainjung phoo gi ngho' leung zeung: ri yhen phyed pyam lho: phoin: moo ke" to" wigi vhuloem ri phoin: tho' moo: nghe' ngei" wa zi nghoid. Suid" ri phoin: nam moo: zhain: khyo' pyam wa zi nghoid. <sup>16</sup>Nyang: gi loid ri myiyab shoem" khyo' boem to" da" phoin: bidthu shoid moo: she: lhei" pyam wa zi nghoid. <sup>17</sup>Nyang: gi dung ri zei: ci: wigi dung ri agyoug: nhang: loo: za: gung ri lang: khyam" pyam lho: dagung goin" ziri phoin: tho' moo: myi: nghe' xoin" ngei" byid: wa zi nghoid. Hau: xoin" da" shoem: gi ASEING ri ngei bu: nhang: wa zi nghoid.

### Shivoo: Xoin" Alu: Joem

**2** Byu dayug yug gi ASEING ri shivoo: xoin" alu: ngei" byid: wa nghoid rigi cen: moin" gyeig yu ca" da:. Nyang: gi hougmoo: zhainloin: xu: yo' nam pyo: ja: kaid ca" da:. <sup>2</sup>Houg: lho: hau: ziri Arun kung mo khainjung yi jhang khyoo: ci: yhe: ca". Xoin" ngei" da" khainjung phoo gi cen: moin" dazhoeb yo' xu: we' nam pyo: ja: dangain ri we' yu wigi ASEING ri ngei" byid: da" asoo" khyo" phoin: tho' moo: hau: ziri nghe' ngei" wa zi nghoid. He: xoin" da" shoem: gi ASEING ri ngei bu: nhang: wa zi nghoid. <sup>3</sup>Deing da" shivoo: xoin" gi khainjung yi shid re" nghoid nyid da:. ASEING da" zoo: shug xoin" mo yu too" yoomo hau: zigi gye" gyeung" shang: nyid da:.

<sup>4</sup>Myikhyoem' moo kang: da" zoo: yho' xoin" ngei" wa nghoid rigi hau: ziri doocid" akaid loo: za: koid ca" wa. Hau: zigi cen: moin" yo' zhainloin: xu: lheig lho: thu: sho' koid to" da" zooyho' anghoid lang" zhainloin: xu: joid to" da zooyho' poo" nghoid ca" wa.

<sup>5</sup>Zooyho' bung: oug" moo bung: da" zooyho' ri xoin" ngei" wa nghoid rigi hau: ziri cen: moin" yo' zhainloin: xu lheig ca" wa nghoid loug we' doo cid" abo zi nghoid ca" da:. <sup>6</sup>Xoin" khyo" hau: ziri ngei" byid: lang" hau: zooyho' ri khyu' mhoin' wigi xu: foid gyoin: wa zi nghoid.

<sup>7</sup>Oug" phain' mo rhe: to" da" zooyho' ri xoin" ngei" wa nghoid rigi cen: moin" yo' zhainloin: xu: wigi koid to" zi nghoid ca" wa. <sup>8</sup>Hau: ziri ASEING jhang xoin" khyo" ci: re" wigi phoin: khyoo: ci: yhe: wa su: nghoid da" khainjung phoo ri yhe: byid: wa zi nghoid. <sup>9</sup>Khainjung phoo gi hau: zi dangain" ASEING ri ngei" byid: bye: da" asoo" khyo" houg mo dayham" ri yu wigi nyang: gi hau: ziri phoin: tho' moo: nghe' ngei" wa zi nghoid. Hau: xoin" da" shoem: gi ASEING ri ngei bu: nhang: wa zi nghoid. <sup>10</sup>Deing da" xoin" gi khainjung yi shid re" nghoid nyid da:. ASEING da" zoo: shug xoin" mo yu too" yoomo hau: zigi gye" gyeung" shang: nyid da:.

<sup>11</sup>Nang ASEING ri ngei" byid: da" shivoo: xoin" ce: daja: ri we' doocid" yo' age: kaid wa. Nang gi ASEING ri ngei" byid: da" zoo: shug moo: doocid" anghoid lang" byoo: yhid: age ci: nghoid da:. <sup>12</sup>Zain khang" moo" moo nang shau" yham" yu da" shivoo: shiloem xang: shi" myheing ziri ASEING jhang ci: re" byid: wa zi nghoid. Nghoid loug we' hau: phoin: moo: age nghe' ngei" wa <sup>13</sup>Shivoo xoin" dangain jang" moo: xoo" kaid we' ciwim gari xoo" gi nang yo' Mangso agyoo: moo dang: theing ri gunthid koid byid: zi nghoid. (Nanu" gi nanu" da" xoin" dangain" jang" moo xoo" kaid ca" da:.) <sup>14</sup>Nang gi xang: shi" myheing da" shivoo: shiloem ASEING jhang ngei" byid: wa shid re" ci: ri"

lang" lug lheing: moo gyeig zi anghoid lang" thung" pheii" lho: ngei" byid: wa zi nghoid. <sup>15</sup>Houg moo zhainloin: xu: yo' nam pyo: ja: bo kaid lung: wa zi nghoid. <sup>16</sup>Khainjung phoo gi cen: moin" dayham" yo' xu: ri yu wigi khab yu bye: da" alhoo: khyo" nghe' ngei" byid: wa zi nghoid. ASEING ri ngei" byid: da" zoo: shug xoin" khyo" nam pyo: ja: dangain" ri we' ngei" byid: wa zi nghoid.

### Zoem" Khau: Da" Xoin" Joem

**3** Byu dayug yug gi nya: nu: dadu: ri zoem" khau: da" xoin" khyo" ngei" byid: wa nghoid uri hau: zigi ce: dam abo da" nuloo: anghoid lang" numoo" nghoid ca" da:. <sup>2</sup>Hau: yug gi nya: lo, ri gougnyhoug da" vhuloem moo: ke" to" wigi ASEING shidkhoin" zoem" khoem" duang: moo said wa zi nghoid. Arun kung: mo khainjung yigi suid" ri phoin: myid: shoid goin" khyoo: foid sain" goo" wa zi nghoid. <sup>3</sup>Houg: lho: vho: moo: tid to" da" gougnyhoug gung adu athang: joem rigi xoin" khyo" wigi ASEING ri ngei" byid: wa zi nghoid. Hau: joem gi khoug: loem khoug: seing" mo xu: dangain"- <sup>4</sup>Jeingloem: yo' hau: jang" mo xu:- seing" mo ge thang da" du joem nghoid da:. <sup>5</sup>Khainjung yigi he: gu: dangain" ziri myi: nghe' xoin" yo' dage" phoin: tho' moo: nghe' ngei" byid: wa zi nghoid. Hau: xoin" da" shoem: gi ASEING ri ngei bu: nhang: wa zi nghoid.

<sup>6</sup>Yang anghoid lang" coidbaid ri zoem" khau: xoin" khyo" ci: nghoid rigi ce: dam abo da" aloo: anghoid lang" amyhi' nghoid ca" da:. <sup>7</sup>Yang dadu: ri ngei" byid: nghoid rigi <sup>8</sup>Nyang: gi nya: lo, ri hau: vhuloem tho' moo ke" wigi zoem" shidkhoin" moo: said wa zi nghoid- khainjung yigi suid" ri phoin:

myid: shoid goin" khyoo: foid sain" kaid wa zi nghoid. <sup>9</sup>Houg: lho: vho: moo: tid to" da" gougnyhoug gung adu athang: joem rigi xoin" khyo" wigi ASEING ri ngei" byid: wa zi nghoid. Hau: joem gi xu:- jeingthung" nam mo phyd yu da" shoomyi: xu:- khoug: loem khoug: seing" ri thoeb to" da" xu: dangain"- <sup>10</sup>Jeingloem: yo' hougmo: dab da" xu: yo' seing" mo ge thang da" du joem nghoid da:. <sup>11</sup>Moo" eung: da" khainjung phoo gi ASEING shid re" zoo: shug xoin" phoin: tho' moo: hau: ziri nghe' ngei" wa zi nghoid.

<sup>12</sup>Byu dayug coidbaid ri ngei" byid: nghoid rigi <sup>13</sup>Nyang: gi nya: lo, ri coidbaid vhuloem atho' moo: ke" to" wigi zoem" shidkhoin" moo hau: ziri said wa zi nghoid. Khainjung yigi suid" ri phoin: myid: shoid goin" khyoo: foid sain" kaid wa zi nghoid. <sup>14</sup>Houg: lho: vho: moo: tid to" da" gung adu athang: joem rigi xoin" khyo" wigi ASEING ri ngei" byid: wa zi nghoid. Hau: joem gi khoug: loem khoug: seing" moo dab jo' da" xu: dangain"- <sup>15</sup>Jeingloem: yo' hougmo: dab da" xu: yo' seing" mo ge thang da" du joem nghoid da:. <sup>16</sup>Khainjung phoo gi he: gu: dangain ri ASEING ri ngei nhang: da" zoo: shug xoin" khyo" phoin: tho' moo nghe' ngei" wa zi nghoid- xu: dangain" gi ASEING re" nghoid da:. <sup>17</sup>Israela byu hang" we' xu: anghoid lang" suid" ri yo" zoo: wa zi anghoid. He: zigi joyoo khang" moo" moo nyid da" Israela byumyu" yi cang ca" da" tarha" nghoid da:.

**Pa: Yhi: Koid Zi Anghoid Da"  
Yooboo Joem Shid Re" Xoin" Joem.**

**4** ASEING gi Moshe ri amyeing" byid: zigi <sup>2</sup>Byu dayug yug pa: yhi: koid zi anghoid loo: za: ASEING da" amyeing" dang: ri koid shoid yooboo

yo" nghoid rigi vho: moo: tid to" da" tarha" joem ri cang ca" wa khyoo: ri Israela byumyu" yiri tid kyoo" wa zi nghoid.

<sup>3</sup>Khainjung moo" gi yooboo shoid yoomo byu yi atho' moo yau: bui" nhang: nghoid rigi nyang: gi dam ci: abo da" nuloo: bam: ri jhungshug khyo" re" byid: lho: nya: yooboo shid re" ASEING ri ngei" byid: wa zi nghoid.

<sup>4</sup>Nyang: gi hau: nuloo: bam: ri zoem" khoem" duang: khyoo: she: re" wigi nu: vhuloem moo nya: lo, ke" lho: hau: joyoo ASEING shidkhoin" moo said wa zi nghoid. <sup>5</sup>Hau: thang: khainjung moo" gi hau: nulo: suid" dayham" yu wigi zoem" khoug: khyoo: ci: vang yhi: wa zi nghoid. <sup>6</sup>Nyang: gi hau: suid" moo nya: lo, nyhoug" thau" joem lho: gyeung" shang: da" yabkyo' pain" ruang: shidkhoin" moo nyhed lheing: peig sain" wa zi nghoid. <sup>7</sup>Hau: thang: nyang: gi suid" dayham" ri zoem" khoug: mo nam pyo: ja: ngei" byid: da" phoin: jhoin: joem mo zeing vhu" joem moo gyoid: pyam wa zi nghoid. Nyang: gi deing da" suid" ri zoem" khoem" duang: moo jo, da" xoin" ngei" byid: jang" moo ci: da" phoin: zeing khyid: moo: foid khyo pyam wa zi nghoid. <sup>8</sup>Nyang: gi he: nuloo: mo xu: dangain"-khoug: loem khoug: seing" mo xu:- <sup>9</sup>Jeingloem: yo' hau: atho' mo xu: yo' seing" mo ge thang da" du ri yu wa zi nghoid. <sup>10</sup>Khainjung phoo gi zoem" khau: xoin" shid re" gougnyhoug ri said lho: xu: ri yu wigi koid yhang: ti" he: xu: ri yu lho: nghe' ngei" da" xoin" shid re" phoin: tho' moo: nghe' ngei" byid: wa zi nghoid. <sup>11</sup>Nghoid loug we' nyang: gi hau: da" shooyid- shoo" dangain"-vhuloem- khyid: joem vhu: joem yo' dage" khoug: loem khoug: seing" joem ri yu wigi <sup>12</sup>thung" khyo" kyeing sain"

pyam wa shid re" dab tunggung shoid mo myiyab foid khyo' nyid joyoo khyoo: yu yhe: lho: thang" nghe' to" da" myikhyoem moo: nghe' pyam wa zi nghoid.

<sup>13</sup>Israela byu phung: goin" pa: yhi: akoid lho: za: ASEING da" amyeing" dang: daja: ja: ri shoid lo" wigi yooboo yo" nghoid rigi <sup>14</sup>Hau: yooboo ri boin: yo' dage" byu phung: yigi yooboo ngei" xoin" khyo" nuloo: nu" dadu: she: ri" ca" zi nghoid. Nyangnu" gi hau: ziri ASEING da" zoem" khyoo: she: ri" wa zi nghoid. <sup>15</sup>Byumyu" phung: mo vhujhung: yigi nyangnu" lo, ri hau: nu: da" vhuloem moo: ke" wigi hau: joyoo moo: said wa zi nghoid. <sup>16</sup>Khainjung moo" gi nuloo: da" suid" dayham" ri zoem" khoug: khyoo: ci vang lo" wigi <sup>17</sup>Hau: suid" moo nya: lo, nyhoug" thau" joem lho: yabkyo' pain" ruang: shidkhoin" moo nyhed lheing: peig sain" wa zi nghoid. <sup>18</sup>Nyang: gi suid" dayham" ri zoem" khoug: mo nam pyo: ja: ngei" byid: da" phoin: jhoin: joem mo zeing vhu" joem moo gyoid pyam wa zi nghoid wigi deing da" suid" ri zoem" khoem" duang: moo jo, da" xoin" ngei" byid: jang" moo ci: da" phoin: zeing khyid: moo: foid khyo pyam wa zi nghoid. <sup>19</sup>Hau: thang: nyang: gi xu: dangain" ri yu lho: phoin: tho' moo: nghe' pyam wa zi nghoid. <sup>20</sup>Nyang: gi yooboo ngei" xoin" shid re" nuloo: ri yhung: yhang: ti" he: nuloo: ri we' yhung: wa zi nghoid. He: khyoo: khyo" byumyu" yi da" yooboo shid re" xoin" ngei" byid: wigi nyangnu" gi yooboo khyoid pyam byid: zi shau" wa zi nghoid. <sup>21</sup>Hau: thang: nyang: gi nuloo: ri dab tunggung khyoo: she: yhe: wigi nya: yooboo shid re" nghe' ngei" da" nuloo: ri yhang: ti" nghe' ngei" wa zi nghoid. He: xoin" alu: gi shava byu phung:

yi yooboo ri khyoid byid: da" xoin" nghoid.

<sup>22</sup>Zoug: dayug gi pa: yhi: anghoid loo: za: yooboo shoid lho: ASEING da" amyeing" dang: daja: ja: ri koid shoid nghoid rigi <sup>23</sup>yooboo ri boin: yo' dage" nyang: gi xoin" khyo" dam abo da" coidbaid loo: dadu: ri she: ri" wa zi nghoid. <sup>24</sup>Nyang: gi hau: coidbaid vhuloem moo lo, ke" wigi nghe' ngei" wa gougnyhoug ri said da" joyoo nghoid da" phoin: mougzhung: shoid moo coidbaid ri said wa zi nghoid. He: zigi yooboo ri yu pyam byid: da" xoin" nghoid. <sup>25</sup>Khainjung phoo gi nya: lo, nyhoug" ri gougnyhoug suid" mo thau" joem lho: phoin: jhoin: joem mo zeing vhu" joem moo gyoid pyam wigi deing shi" da" gu: ri phoin: zeing khyid: moo: foid khyo' pyam wa zi nghoid. <sup>26</sup>Hau: thang: nyang: gi zoem" khau: xoin" shid re" gougnyhoug ri said lho: xu: ri nghe' yhang: ti" hau: da" xu: dangain" ri we' phoin: tho' moo nghe' ngei" byid: wa zi nghoid. Hid khyo" wigi khainjung phoo gi zoug: da" yooboo shid re" xoin" ngei" byid: lho: nyang: gi yooboo khyoid pyam byid: zi shau" wa zi nghoid.

<sup>27</sup>Yu" yu" byu dayug gi pa: yhi: anghoid loo: za: yooboo shoid lho: ASEING da" amyeing" dang: daja: ja: koid shoid nghoid rigi <sup>28</sup>Yooboo ri boin: yo' dage" nyang: gi dam abo da" coidbaid amyhi' dadu: ri xoin" khyo" wigi she: ri" wa zi nghoid. <sup>29</sup>Nyang: gi coidbaid vhuloem moo lo, ke" wigi nghe' ngei" wa xoin" shid re" gougnyhoug ri said da" joyoo phoin: da" mougzhung: shoid moo said wa zi nghoid. <sup>30</sup>Khainjung phoo gi nya: lo, nyhoug" ri gougnyhoug suid" moo thau" joem lho: phoin: jhoin: joem mo zeing vhu" joem moo gyoid pyam wigi deing da" gu: ri phoin: zeing khyid:

moo foid khyo' pyam wa zi nghoid. <sup>31</sup>Hau: thang: nyang: gi zoem" khau: xoin" shid re" said da" gougnyhoug joem mo xu: ri yu yhang ti" hau: da" xu: dangain" ri we' yu pyam wa zi nghoid wigi xoin" shoem: ASEING ri ngei bu: nhang: wa shid re" hau: ziri phoin: tho' moo nghe' ngei" wa zi nghoid. Hau: akhyoo" khyo" wigi khainjung phoo gi byu dayug da" yooboo shid re" xoin" ngei" byid: wigi nyang: gi yooboo khyoid pyam shau" wa zi nghoid.

<sup>32</sup>Byu dayug gi yooboo khyoid xoin" khyo" yang ri she: re" nghoid rigi hau: zigi ce: dam abo da" amyhi' nghoid ca" wa zi nghoid. <sup>33</sup>Nyang: gi nya: lo, ri hau: vhuloem moo ke" wigi myi: nghe' xoin" shid re" gougnyhoug ri said da" joyoo nghoid da" phoin: mougzhung: shoid moo: said wa zi nghoid. <sup>34</sup>Khainjung phoo gi nya: lo, nyhoug" ri gougnyhoug suid" mo thau" joem lho: phoin: jhoin: joem mo zeing vhu" joem moo gyoid pyam wigi deing shi" da" gu: ri phoin: zeing khyid: moo: foid khyo' pyam wa zi nghoid. <sup>35</sup>Hau: thang: nyang: gi zoem" khau: xoin" shid re" said da" yang mo xu: ri yu yhang ti" hau: da" xu: dangain" ri we' yu pyam wa zi nghoid wigi nyang: gi hau: ziri ASEING shid re" byid: da" zoo: noem xoin" yo' dage" phoin: tho' moo: nghe' ngei" wa zi nghoid. Hau: akhyoo' khyo" wigi khainjung phoo gi byu dayug da" yooboo shid re" xoin" ngei" byid: wigi nyang: gi yooboo khyoid pyam shau" wa zi nghoid.

#### **Yooboo Khyoid Xoin" Joem Koid Ca" Da" Shoid Vhang: Moo" Joem.**

**5** Yooboo khyoid xoin" koid ca" da" shoid vhang: moo" joem gi vho: mo ziyo' dayhang: ti" nghoid. Dayug yug gi tarha" yab do, moo sagese: koid

byid: wa shid re" tarha" vang khyo" khe: zi shau" wigi nyang: shau" myang bye: khyoo: anghoid lang" shau" gyoo: bye: da" khyoo: daja: ja: yo' sen: ziri lu dang: abyid: nghoid rigi bue" loo wa da kyi" khyeug akyu" ri kham ca" wa zi nghoid.

<sup>2</sup>Dayug yug gi gougnyhoug shid: mang te" da" thung" khyo" ayung" alho' da" daja: ja: ri pa: yhi: anghoid lho: za: zang" tain" nghoid rigi nyang: koid ziri myid boin: yo' dage" ayung" alho' bue" lho: yooboo yo" nyid da:.

<sup>3</sup>Dayug yug gi ayung" alho' da" byu gung mo ce: ja: ri nghoid nghoid pa: yhi: anghoid lho: za: zang" tain" nghoid rigi nyang: koid ziri boin: yo' dage: yooboo yo" nyid da:.

<sup>4</sup>Dayug yug gi ce: ja: khyo" sen: zi nghoid nghoid- amyid yu" lho: dang: theing to" nghoid rigi nyang: cikoid ein: ziri myid boin: yo' dage" yooboo yo" nyid da:.

<sup>5</sup>Byu dayug yooboo yoo" lang" nyang: gi yooboo ri yen: yu ca" da: <sup>6</sup>Hau: thang: nya: yooboo shid re" dam khyo" yang myhi' anghoid lang" coidbaid myhi' ri xoin" khyo" wigi ASEING jhang khyoo: ci: ri" ca" zi nghoid. Khainjung phoo gi hau: da" yooboo shid re" xoin" ngei" byid: wa zi nghoid.

<sup>7</sup>Byu dayug gi yang anghoid lang" coidbaid ayo" ge bui" nghoid rigi nya: yooboo da" aphoug" khyo" wigi pheing" kyoug" eig du:- anghoid lang" jid: u: eig du: ri dadu: gi yooboo khyoid xoin" khyo" lho: gootu: dadu: gi myi: nghe' xoin" khyo" ASEING jhang ci: ri" wa zi nghoid. <sup>8</sup>Nyang: gi hau: joem ri khainjung phoo jhang ci: yhe: wigi khainjung phoo gi hau: ngho' eig du: mo xang: shi" du: ri yooboo khyoid xoin" shid re" xang: shi" ngei" byid: wa zi nghoid. Nyang: gi ngho' vhuloem



ri alang: phyd loo: za: leingzeing:  
ri yhen khyau" pyam wa zi nghoid.  
9Houg: lho: ngho' suid" dayham" ri  
phoin: ayam' cang peig sain" pyam  
wigi deung da" gu: ri phoin: khyid:  
moo: zhain: khyo' pyam wa zi nghoid.  
He: zigi yooboo khyoid byid: da" xoin"  
nghoid. 10Hau: thang: nyang: gi eig du:  
ein: da" ngho' ri thung" ri: khyo" myi:  
nghe' xoin" ngei" byid: wa zi nghoid.  
Hau: akhyoo" khyo" wigi khainjung  
phoo gi byu dayug da" yooboo shid  
re" xoin" ngei" byid: wigi nyang: gi  
yooboo khyoid pyam shau" wa zi  
nghoid.

11Byu dayug gi pheing" kyoug" eig  
du: anghoid lang" jid: u: eig du: ayo"  
ge bui" nghoid rigi nyang: gi yooboo  
khyoid xoin" khyo" cen: moin" 22  
rung ri ci: ri" wa zi nghoid. Nyang:  
gi hougmo: zhainloin: xu: anghoid  
lang" nam pyo: ja: age kaid wa zi  
nghoid- ciwim gari hau: zigi yooboo  
khyoid xoin" nghoid- shivoo: xoin"  
ngei" zi anghoid. 12Nyang: hau: ziri  
khainjung phoo jhang ci: yhe: wigi  
khainjung phoo gi hau ziri lo, dazhoeb  
zhoeb yu lho: ASEING ri dangain"  
byid: bye: khyo" wigi nyang: gi hau:  
ziri zoo: noem xoin" khyo" phoin:  
tho' moo: nghe' ngei" wa zi nghoid.  
He: zigi yooboo khyoid byid: da"  
xoin" nghoid. 13Hau: akhyoo" khyo"  
wigi khainjung phoo gi byu dayug  
da" yooboo shid re" xoin" ngei" byid:  
wigi nyang: gi yooboo khyoid pyam  
zi shau" wa zi nghoid. Deing da" cen:  
moin" gi shivoo: xoin" thung" ri: yo'  
dayhang: ti" khainjung phoo shid re"  
nghoid wa.

**Yooboo Jhen: Xab Byid:  
Da" Xoin" Joem**

14ASEING gi vho: moo: tid to" da"  
thung" ri: joem ri Moshe ri byid: bye:

15Dayug yug gi pa: yhi: anghoid lho:  
za: ASEING shid re" gyeung" shang:  
da" ziri angei" byid: yoomo yooboo  
yo" nghoid rigi nyang: gi dam abo  
da" yang loo: anghoid lang" coidbaid  
loo: ri doem xab byid: da" xoin" khyo"  
wigi ASEING jhang ci: ri" wa zi nghoid.  
Hau: da" aphoug" rigi tarha" vang  
da" laki yo' dakhyo" soin: phyed wa  
zi nghoid. 16Nyang: gi byid: ca" ziri  
abyid: loo: to" to" nghoid rigi shoo:  
boem eig xi: loung: byid: ca" zi nghoid.  
Nyang: gi hau: ziri khainjung phoo ri  
byid: wigi khainjung phoo we' hau:  
yug da" yooboo shid re" xoin" khyo"  
gougnyhoug ri ngei" byid: wa zi  
nghoid wigi nyang: gi yooboo khyoid  
byid: zi shau" wa.

17Dayug yug gi pa: yhi: anghoid loo:  
za: ASEING da" amyeing" dang: daja: ja:  
ri shoid nghoid rigi nyang: gi yooboo  
yo" wigi yooboo aphoug" ri doem  
kham zoo: wa zi nghoid. 18Nyang: gi  
yooboo jhen: xab byid: da" xoin" khyo"  
wigi dam abo da" yang loo: anghoid  
lang" coidbaid loo: ri khainjung jhang  
khyoo: ci: yhi: ca" wa zi nghoid. Hau:  
da" aphoug" rigi tarha" vang da" laki  
yo' dakhyo" soin: phyed wa zi nghoid.  
Khainjung phoo gi hau: xoin" ri byu  
hau: yug da" pa: yhi: anghoid loo: za:  
shoid lo" da" yooboo shid re" xoin"  
ngei" byid: wa zi nghoid wigi nyang:  
gi yooboo khyoid byid: zi shau" wa.  
19He: zigi nyang: ASEING ri shoid lo"  
da" yooboo shid re" doem xab byid:  
da" xoin" nghoid da:

**6** ASEING gi vho: moo: tid to" da"  
thung" ri: joem ri Moshe ri byid:  
bye:. 2-3Dayug yug gi Israela byu  
bidnoem phoo wigi ab byid: to" da"  
jonu" ri doem tau" byid: wa shid re"  
he: pyam khyo" anghoid lang" nyang:  
jang" mo daja: ja: khau" yu khyo"  
anghoid lang" nyang: ri mhau' khyo"

anghoid lang" jonu" daja: ja: byug jo, ga: mhau' ziyu' nyang: amyang ga: jham tang: khyo" ASEING ri yooboo shoid nghoid rigi xoin" dalheing: to' ca" wa zi nghoid. <sup>4-5</sup>Byu dayug gi he: khyoo: daja: ja: moo yooboo shoid rigi nyang: gi adeingmain" khyo" yu to" da" ciri: nghoid nghoid doem byid: ca" wa zi nghoid. Nya: da" yooboo dam ri sho: myang da" bidnyid moo nyang: gi yhoem: seing: ri jonu" dangain yo' shoo: boem eig xi: boem pug byid: ca" wa zi nghoid. <sup>6</sup>Nyang: gi nya: youg: khyoug" da" xoin" khyo" wigi ce: dam abo da" yang loo: anghoid lang" coidbaid loo: dadu: ri ASEING ri xoin" ngei" byid: wa khyo" khainjung phoo jhang khyoo: ci: ri" ca" wa zi nghoid. Hau: da" aphoug" rigi tarha" vang da" laki yo' dakhyo" soin: phyed wa zi nghoid. <sup>7</sup>Khainjung phoo gi hau: yug da" yooboo shid re" xoin" ngei" byid: wa zi nghoid wigi nyang: gi yooboo khyoid pyam shoug" wa zi nghoid.

### Gung Goin" Nghe' Ngei" Da" Xoin"

<sup>8</sup>ASEING Moshe ri amyeing" byid: zigi <sup>9</sup>Nghe' ngei" wa shid re" vho: moo: tid to" da" thung" ri: joem ri Arun yo' nya: yuggi zoo: yiri tid kyoo" we' ga: zi nghoid. Nghe' ngei" da" xoin" gi phoin: tho' moo: damyen goin" ke" to" wigi myi: atheing: lhoo: dab nyid ca" da:. <sup>10</sup>Hau: thang: khainjung phoo gi nya: zin: yung" pain" byisheing: yo' zin: yung" pain" lhoo" dung: ri void ci: lho: phoin: tho' mo xu: yo' alhu: alheig jo, da miyab joem ri ye: pyam wigi phoin: yam moo: too" wa zi nghoid. <sup>11</sup>Hau: thang: nyang: gi byimi ri thid pyam wigi miyab ri dab tunggung shoid mo thung" khyo" younglho' joyoo moo yhe: she: pyam wa zi nghoid. <sup>12</sup>Phoin: tho' mo myi: gi dab nyid nhang: wigi age shid: nhang: wa. Khainjung phoo

gi nab soin: khang" moo" hougmo: thang" kaid wigi hougmo: nghe' ngei" xoin" moo: nyheing byid: lho: zoem" khau: xoin" xu: ri nghe' ngei" wa zi nghoid. <sup>13</sup>Phoin: tho' mo myi: gi khanham we' dab nyid nhang: wigi khanham we' age shid: nhang: wa.

### Shivoo: Xoin" Joem

<sup>14</sup>Vho: moo tid to" da" thung" ri: joem gi shivoo: xoin" shid re" nghoid. Arun akung: mo khainjung phoo gi ASEING ri ngei" byid: da shivoo: xoin" ri phoin: tho' moo to" too" wa zi nghoid. <sup>15</sup>Hau: thang: nyang: gi cen: moin" phei" dazhoeb yo' xu: ri yu wigi hau: atho' moo: nam pyo: ja: ke" lho: hau: ziri ASEING ri dangain" ngei" byid: bye: da" asoo" khyo" phoin: tho' moo nghe' ngei" wa zi nghoid. Hau: xoin" da" shoem: gi ASEING ri ngei bu: nhang: wa zi nghoid. <sup>16-17</sup>Hougmo deing gu: ri khainjung yi zoo: wa zi nghoid. Hau: ziri doocid" akaid loo: za: zooyho' koid wigi ASEING shidkhoin" zoem" da" vang khoug: mo gyeung" shang: joyoo moo zoo: wa zi nghoid. ASEING gi hau: ziri khainjung yi shid re" zoo: noem xoin" gamboem khyo" byid: to" da:. Hau: zigi yooboo da" xoin" yo' yooboo shid re" doem xab byid: da" xoin" yo' du lho: gye" gyeung" shang: da:. <sup>18</sup>Ciwim gari: ju" loo wa da" ayo, dangain" jang" moo Arun da" akung: ako' mo yuggi yigi ASEING ri ngei" byid: da" zoo: noem mo khanham we' nya: bang: gamboem khyo" zoo wa zi nghoid. Zoo: noem xoin" ri zang" tain" da" gootu: hang" nghoid loug we' hau: gyeung" shang: da" yoem: so' yoomo dam dab zi shau" wa nghoid. <sup>19</sup>ASEING gi Moshe ri <sup>20</sup>Arun kung: mo khainjung phoo dayug ri lo, ke" aya: byid: wa shid re" vho: mo thung" ri: joem ri byid: to" da:. Nyang: gi lo,



ki" aya: kham: yu wa da" bidnyid moo nyang: gi ASEING ri ngei" byid: da" xoin" khyo" cen: moin" 22 rung (hau: zigi nyid" khang" nyid" ngei" byid: nyid da" shivoo: xoin" yo' dakhyoo" ti" nghoid da) ri nab soin: daceing myen" thang: daceing ngei" byid: wa zi nghoid. <sup>21</sup>Hau: ziri xu: yo' lheig wigi zooyho' bung: oug" moo jhau' lho: myheig khyoeb wigi shivoo: xoin" khyo" shoem: gi ASEING ri ngei bu: nhang: wa shid re" ngei" byid: wa zi nghoid. <sup>22</sup>Ju" loo wa da" ayo, dangain" moo khainjung moo" khyo" dei byid: da" Arun akung: ako' yugkhang" moo" gi he: xoin" ri koid ca" da:. Hau: ziri ASEING ri ngei" byid: da" xoin" khyo" bain sho' nghe' ngei" byid: wa zi nghoid. <sup>23</sup>Khainjung phoo koid da" shivoo: xoin" dajhi' ri we' yo" zoo: wa zi anghoid. Hau: zi dangain" nghe' ngei" ca" wa zi nghoid.

### Yooboo Khyoid Xoin"

<sup>24</sup>ASEING gi Moshe ri amyeing" byid: zigi <sup>25</sup>Arun yo' nya: yuggi zoo: yiri yooboo khyoid xoin" joem yo' sen: lho: vhoo: moo tid to" da" thung" ri: joem ri tid kyoo" byid: we' ga: zi nghoid. Nghe' ngei" wa shid re" gougnyhoug joem ri said da" joyoo phoin: da" mougzhung: shoid moo: yooboo khyoid xoin" shid re" ci: da" gougnyhoug ri said wa zi nghoid. He: zigi gye" gyeung" shang: da" xoin" nghoid. <sup>26</sup>Hau: gougnyhoug xoin" ri ngei" byid: da" khainjung phoo gi hau: ziri ASEING da" shidkhoi" zoem" jo, vang khoug: mo gyeung" shang: joyoo moo zoo: wa zi nghoid. <sup>27</sup>Hau: gougnyhoug shoo" ri zang" tain" da" dayug yug anghoid lang" daja: ja: gi hau: gyeung" shang: da" yoem so' yoomo dam dab zi shau" wa nghoid. Byimi dakhyab khyab moo hau: gougnyhoug suid" zain gyoin:

nghoid rigi hau: ziri gyeung" shang: joyoo moo cid ca" wa zi nghoid. <sup>28</sup>Hau: shoo" ri myid oug" daja: ja: moo: jhau' to" nghoid rigi baid kho' pyam ca" zi nghoid. Sham: oug" ri ci: wa nghoid rigi hau: ziri mhoin" pyam wigi gyid yo' cid" yung" cid" lho' pyam ca" zi nghoid. <sup>29</sup>Khainjung yhoem: byu yi mo yuggi yigi hau: xoin" ri zoo: wa zi nghoid. Hau: zigi gye" gyeung" shang: zi nghoid. <sup>30</sup>Nghoid loug we' yooboo khyoid xoin" mo suid" ri zoem" khoug: khyoo: ci: vang yhe: lho: yooboo ri yu pyam byid: wa shid re" thung" khyo" ci: nghoid rigi hau: gougnyhoug shoo" ri age zoo: wa nghoid. Hau: ziri nghe' pyam ca" da:.

### Yooboo Jhen: Xab Byid: Da" Xoin" Joem.

**7** Vhoo: moo tid to" da" thung" ri: joem gi yooboo jhen: xab byid: da" xoin" shid re" nghoid wigi hau: joem gi gye" gyeung" shang: zi nghoid. <sup>2</sup>He: xoin" shid re" gougnyhoug ri nghe' ngei" wa shid re" gougnyhoug ri said da" joyoo phoin: da" mougzhung: shoid moo said wa zi nghoid wigi hau: suid" ri phoin: da" myid: shoid goin" moo foid khyoo' wa zi nghoid. <sup>3</sup>Hau: da" xu: dangain" ziri yu wigi phoin: tho' moo: ngei" byid: wa zi nghoid. Shoomyi: xu:- khoug: loem khoug: seing" joem moo dab da" xu:- <sup>4</sup>Jeing: loem: yo' hougmoo: dab da" xu: yo' ge thang da" seing" du joem nghoid da:. <sup>5</sup>Khainjung phoo gi ASEING ri ngei" byid: da" zoo: noem xoin" yhang: ti" xu: dangain" ri phoin: tho' moo: nghe' ngei" byid: wa zi nghoid. <sup>6</sup>Khainjung yhoem: byu yi mo yuggi hang" we' hau: ziri ge zo: da:. Nghoid loug we' hau: zigi gye" gyeung" shang: yoomo gyeung" shang: joyoo moo zoo: ca" wa zi nghoid.

<sup>7</sup>Yooboo khyoid xoin" yo' doem: xab byid: da" xoin" shid mo thung" ri: daja: za: daca" wa zi nghoid. Shoo" gi xoin" ngei" byid: da" khainjung phoo seing: wa zi nghoid. <sup>8</sup>Nghe' ngei" byid: wa da" xoin" khyo" ngei" byid: da" gougnyhong shooyid we' xoin" ngei" byid: da" khainjung phoo shid re" nghoid nyid da:. <sup>9</sup>Shivoo: xoin" nghoid da" myikhyoem moo: phoid zi we' oug" phain" moo: rhe: zi we' zooyho' bung: oug" mo we' dangain" ri Mangso jhang xoin" ngei" byid: yug khainjung phoo shid mo nghoid. <sup>10</sup>Nghoid loug we' shivoo: xoin" ri xu: yo' lheug zi nghoid nghoid- akyug joem mo nghoid nghoid- ajhoug shi" da" shivoo: dangain" gi Arun kung: mo khainjung dangain" bang: shid re" nghoid wigi nyangnu" ri gamboem dayi" yi" gam byid: wa zi nghoid.

### Zoem" Khau: Xoin"

<sup>11</sup>Vhoo: moo: tid to" da" thung" ri: joem gi ASEING ri ngei" byid: da" zoem" khau: xoin" joem shid re" nghoid. <sup>12</sup>Byu dayug gi he: xoin" ri Mangsoo ri jeju" boin: xoin" khyo" koid byid: nghoid rigi nyang: gi xoin" ngei" byid: wa gougnyhong yo' dage" doocid" akaid loo: zhainloin: xu: yo' foid lheug wigi koid to" da" zooyho' thu: anghoid lang" zhainloin: xu: joid to" da" zooyho' poo" anghoid lang" zhainloin: xu: yo' foid lheug wigi koid to" da" zooyho' ri ngei" byid: wa zi nghoid. <sup>13</sup>Hau: lho: nyang: gi doocid" yo' koid to" da" zooyho' ri we' doem ngei" byid: wa zi nghoid. <sup>14</sup>Nyang: gi ASEING ri gooki lid byid: khyo" wigi zooyho' ja: khang" moo" mo daloem: loem: ngei" byid: wa zi nghoid. Hau: zigi gougnyhong suid" ri yu lho: phoin: yam moo foid khyo' pyam da" khainjung pho shid re" nghoid da:. <sup>15</sup>Gougnyhong da" shoo"

rigi xoin" ngei" da" nyid" ri nyang: zoo: ca" wa zi nghoid. Thang: nab kyoo' ju" sho ci: we' age too" wa.

<sup>16</sup>Byu dayug gi thang" cab ri pyeing byid: da" zoem" khau: xoin" anghoid lang" nya: myid vho: lho: byid: da" xoin" ri ngei" byid: nghoid rigi xoin" ngei" nyid" ri bain sho' zoo: wa zi anghoid. Teing to" da" gu: ri thang: nab kyoo' zoo: wa zi nghoid. <sup>17</sup>Soem" nyid" ein: nyid" ju" sho' deung jo, da" shoo" rigi nghe' pyam wa zi nghoid. <sup>18</sup>Soem" nyid" ein: nyid" ri hau: shoo" ri zo: nghoid rigi Mangsoo gi hau: yug da" xoin" ri khab yu wa zi anghoid. Hau: xoin" ri nya: shid re" soin: byid: zi anghoid. Nghoid loug we' hau: ziri ayung" alho' ga: jho: yu wa nghoid wigi hau: shoo" ri zo: da" yugkhang" moo" gi yooboo akyu" ri shau" kham zoo: wa zi nghoid. <sup>19</sup>Shoo" gi thung" khyo" ayung" alho' da" daja: ja: yo' zang" tain" nghoid rigi hau: ziri age zoo. Nghe' pyam ca" wa zi nghoid. Thung" khyo" younglho' da" yug hang" nghoid loug we' hau: shoo" ri ge zo: da:. <sup>20</sup>Nghoid loug we' ayung" alho' yug zo: nghoid rigi nyang: gi Mangsoo byu dayug khyo" myid byid: loo: wa zi anghoid. <sup>21</sup>Byu dayug gi byu nghoid nghoid- gougnyhong mo nghoid nghoid- thung" khyo" ayung" alho' da" daja: ja: ri zang" tain" thang: ri hau: xoin" ngei" da" shoo" ri zo: da" hang" ri nghoid nghoid- nyang: ri Mangso byu dayug khyo" myid soin: byid: loo: wa zi anghoid.

<sup>22</sup>ASEING gi Moshe ri vho: moo: tid to" da" thung" ri: joem ri <sup>23</sup>Israela byumyu" yi shid re" byid: bye:. Nu xu:- yang xu:- coidbaid xu: joem ri age zoo: wa zi nghoid. <sup>24</sup>Nyang: nyang: shid: da" gougnyhong anghoid lang" siyoo gougnyhong wigi ngaid said da" gougnyhong mo xu: ri age zoo. Nghoid

loug we' hau: xu: ri gootu: khyoo: moo: ge ci: da:. <sup>25</sup>ASEING ri zoo: noem xoin" khyo" ngei" byid: da" gougnyhoug xu: ri zoo: su: hang" nghoid loug we' Mangso da" byu ein: soin: yu wa zi anghoid. <sup>26</sup>Khamoo: nyid da" Israela byu yi nghoid loug we' ngho' suid" anghoid lang" gougnyhoug suid" ri khanham we' zoo: shug khyo" age ci: wa. <sup>27</sup>He: tarha" ri acang su: hang" nghoid loug we' Mangso byu dayug khyo" soin: yu wa zi anghoid.

<sup>28</sup>ASEING gi Moshe ri vho: moo: tid to" da" thung" ri: joem ri <sup>29</sup>Israela byumyu" yi shid re" byid: bye:. Zoem" khau: xoin" ri ngei" byid: da" byu hang" nghoid loug we' daboem ri gooki lid jhungshug khyo" ASEING ri byid: wa zi nghoid. <sup>30</sup>Hau: ziri nya: lo, wigi nyang: zoo: noem xoin" khyo" ci: ri" wa zi nghoid. Nyang: gi gougnyhoug xu: yo' yang gang shoo" ci: re" lho: gooki lid da" jhungshug wigi ASEING ri byid: wa zi nghoid. <sup>31</sup>Khainjung phoo gi xu: ri phoin: tho' moo nghe' ngei" wa nghoid loug we' yanggang shoo" gi khainjung yi shid re" nghoid da:. <sup>32</sup>Gougnyhoug da" lo, yo shoid boung sain: rigi gooki lid jhungshug khyo" <sup>33</sup>zoem" khoug xoin" ein: da" suid" yo' xu: ri ngei" byid: da" khainjung ri byid: wa zi nghoid. <sup>34</sup>ASEING gi gougnyhoug da" yanggang shoo" yo' lo, yo shoid boung sain: rigi gooki lid jhungshug khyo" Israela byumyu" yi jang" mo yu wigi khainjung yiri byid: to" da:. He: zigi ju" loo wa da" ayo, dangain" goin" moo: Israela byumyu" yi khainjung yiri byid: ca" da gu: nghoid da:. <sup>35</sup>He: zigi Arun yo' nya: yuggi zoo: yi khainjung yi bui" wa shid re" nyangnu" ri lo, ki" byid: da" aya: kham: bidnyid" mo nyangnu" ri byid: to" da" ASEING ri ngei" byid: jang" mo gamboem nghoid da:. <sup>36</sup>Hau: bidnyid moo: ASEING gi

xoin" mo he: aboem ri khainjung yiri byid: wa shid re" Israela byumyu" yiri amyeing" byid: too" bye:. He: thung" ri: gi ju" loo wa da" ayo, dangain" jang" moo Israela byumyu" yi cang ca" wa zi nghoid.

<sup>37</sup>Hougsu" wigi he: thung" ri: joem gi nghe' ngei" xoin" joem shivoo: xoin" joem yooboo khyoid xoin" joem yooboo jhen: xab byid: da" xoin" joem lo, ki" xoin" joem zoem" khau: xoin" joem shid mo thung" ri: joem nghoid.

<sup>38</sup>ASEING gi hau: amyeing" dang: joem ri dain" pyoid yoo mo Sina boem tho' moo Israela byumyu" yiri xoin" koid wa shid re" tid to" da" bidnyid moo Moshe ri byid: too" bye:.

### **Arun Yo' Nya: Yuggi Zoo: Yi Ri: Lo, Ki" Mainkaid Byid: Da" Khyoo:**

(Thu 29:1-37)

**8** ASEING gi Moshe ri <sup>2</sup>«Khainjung byimi joem mainkaid xu:- yooboo khyoid xoin" shid re" nuloo: bam: dadu:- yang loo: eig du: doocid" abo da" zooyho' dagyoin ci: wigi Arun yo' nya: yuggi zoo: yiri nga" zoem" khoem" duang: khyoo: shu" ri" wa zi nghoid. <sup>3</sup>Hau: thang: byu phung: moo" goin" ri hougmoo: khe: foem: too" we» ga: tid.

<sup>4</sup>Moshe ASEING amyeing" byid: bye: ziyo' dayhang: ti" koid bye: wigi byu phung: moo" goin" re" zeing: foem: to" uri <sup>5</sup>Nyang: gi « Akhid" ngoo koid wa da" moo" gi ASEING nyang: byid: to" da" moo" nghoid da» ga: nyangnu" ri tid.

<sup>6</sup>Moshe gi Arun yo' nya: yuggi zoo: yiri shid khyoo: shu" yu wigi thung" khyo" nyangnu" ri gung cid" nhang: bye:. <sup>7</sup>Nyang: gi Arun ri byi: yo' byisheing: ri foid wigi nya: phyid" doem: moo: phyid" cu" cu" byid: bye:. Moshe gi nyang: ri xoin" ngei" byizuang foid wigi hau: ziri gye"

young" sho' yo, to" da" phyid" cu" wigi nya: phyid" doem: moo teing sho' tei" too" bye. <sup>8</sup>Moshe gi nyang: ri yanggang nghoeb ri foid wigi Urim yo' Thumin<sup>a</sup> ri hougmoo: tab too" byid: bye:. <sup>9</sup>Moshe gi Arun ri vhu" thoeb thoeb byid: wigi hau: shidkhoin" moo ASEING nyang: amyeing" byid: to" ziyoy' dayhang: ti" shugbyid: da" younglho' asoo" khyo" sheing: yo' koid to" da" sheing: zi ri tab byid: da:.

<sup>10</sup>Hau: thang: Moshe gi mainkaid xu: ri yu lho: ASEING da" zoem" yo' hougmoo: jo, da" ja: khang" moo" ri joid bye: da:. Nyang: gi hougso" koid lho: ASEING ri dangain" shugbyid: nyid da:. <sup>11</sup>Nyang: gi xu: dayham" ri yu lho: hau: joem ri ASEING ri shugbyid: wa khyoo" phoin: tho' moo we' hau: jonu" joem tho' moo we' jarung: tho' moo we' hau: da" akhyid: moo we' nyhed lheing: peig zhain' gyoin: da:. <sup>12</sup>Nyang: gi Arun da" vhuloem moo: mainkaid xu: dayham" ri foid gyoin: byid: lho: lo, ke" wigi aya: byid: khyoo: ri koid byid: bye:. <sup>13</sup>Hau: thang: Moshe gi Arun da" nya: yuggi zoo: yi shid khyoo: shu" yu lho: ASEING wigi amyeing" byid: to" ziyoy' dayhang: ti" nyangnu" ri byi: foid- nyangnu" da" phyid" doem: moo phyid" cu" cu" byid: ziyoy' nyangnu" vhuloem moo: mug joem zhung" byid: bye:.

<sup>14</sup>Hau: thang: Moshe gi yooboo khyoid xoin" shid re" nuloo: bam: ri she: re" wigi hau: nu: vhuloem moo: Arun yo' nya: yuggi zoo: yiri lo, ki" nhang: bye:. <sup>15</sup>Moshe gi hau: ziri said wigi suid" dayham" ri yu lho: hau: ziri shugbyid: wa shid re" nya: lo, nyhoug" yo' phoin: jhoin: zeing thang: joem moo joid byid: bye:. Hau: thang: nyang: gi deing da" suid" ri phoin: khyid: moo:

foid khyo da:. Hau: khyoo: khyo" wigi nyang: hau: ziri shugbyid: ziyoy' hau: ziri kyeing sain' pyam da:. <sup>16</sup>Moshe gi khoug loem khoug seing" joem mo xu: dangain"- seing" mo je ge thang du yo' jeingloem: we' houg moo dab da" xu: joem ri yu wigi hau: joem dangain" ri phoin: tho' moo: nghe' ngei" byid: bye:. <sup>17</sup>Nyang: gi shooyid- shoo" yo' vhu: we' wigi deing da" nu: shoo" dangain" ri yu lho: ASEING amyeing" dang: yo' dakhyo" dab tunggung shoid moo yhe: nghe' pyam wa zi nghoid.

<sup>18</sup>Hau: thang: Moshe gi nghe' ngei" xoin" shid re" yang loo: ri she: re" wigi Arun yo' nya: yuggi zoo: yigi yang vhuloem moo nyangnu" lo, joem ri ki" byid: bye:. <sup>19</sup>Moshe gi hau: ziri said wigi suid" ri phoin: da" myid: shoid goin" moo foid khyoo' wa zi nghoid. <sup>20-21</sup>Nyang: gi yang loo: shoo" ri jab khyi- khoug loem khoug seing" joem yo' khyid: joem ri cid" yung" cid" lho' lho: ASEING amyeing" byid: to" ziyoy' dayhang: ti" vhuloem- xu: yo' yang loo: mo deing da" gu: dangain" ri phoin: tho' moo: nghe' ngei" da:. He: nghe' ngei" xoin" gi zoo: noem xoin" nghoid wigi he: xoin" shoem: gi ASEING ri ngei bu: nhang: da:.

<sup>22</sup>Hau: thang: Moshe gi khainjung yiri lo, ki" mainkaid byid: wa shid re" nghoid da" eig du: ein: da" yang loo: ri she: re" lho: Arun yo' nya: yuggi zoo: yigi hau: yang lo: da" vhuloem moo nya: bang: da" lo, ki" byid: boem ago". <sup>23</sup>Moshe gi hau: ziri said wigi suid" dayham" ri yu lho: Arun da" lo, yo shoid nukhyab thang: nya: da" lo, yo shoid lo, moo" cam" yo' nya: da" lo, yo shoid khyid: moo" cam" cang joid byid: da:. <sup>24</sup>Hau: thang: nyang: gi Arun da" nya: yuggi zoo: yiri shid khyoo: shu"

a 8.8: *urim yo' thumin*: He: zi eig loem gi Mangso myid vho: khyoo: ri khainjung yi si wa shid re" koid to" zi nghoid. Hau: ziri nyangnu" khasu" ci ziri nyeing" ayo" si

yu wigi nya: bang: da" lo, yo shoid nukhyab thang: joem nya: bang: da" lo, yo shoid lo, moo" cam" joem yo' nya: bang: da" lo, yo shoid khyid: moo" cam" joem cang joid byid: da: Hau: thang: Moshe gi deing da" suid" ri phoin: da" myid: shoid goin" khyoo: tu: foid da:.  
<sup>25</sup>Nyang: gi xu:- shoomyi: xu:- khoug loem khoug seing" joem moo dab da" xu:- ge thang da" seing" du- jeingloem: yo' houg moo dab da" xu:- lo, yo shoid bung-sain: joem ri yu bye: da:.  
<sup>26</sup>Hau: thang: nyang: gi ASEING ri shugbyid: to" da" doocid" akaid loo: koid to" da" zooyho' gyoin mo zooyho' daloem:- xu: yo' lheig lho: koid to" da" zooyho' daloem:- zooyho' poo" dakhyab ri yu lho: nyang: gi hau: joem ri xu: yo' lo, yo shoid bung-sain: dang moo: ke" to" da:.  
<sup>27</sup>Nyang: he: zoo: noem dangain" ri Arun yo' nya: yuggi zoo: yi lo, moo: kaid byid: lho: nyangnu" gi gooki lid jhungshug khyo" ASEING ri shugbyid: ago".  
<sup>28</sup>Hau: thang: Moshe gi hau: zoo: noem ri nyangnu" lo, mo yu wigi lo, ki" mainkaid byid: da" xoin khyo" phoin: dang moo: ngei" byid: da" xoin" atho' moo: ke' lho: nghe' ngei" da:.  
 He: zigi zoo: noem xoin" nghoid wigi he: xoin" shoem: gi ASEING ri ngei bu: nhang: da:.  
<sup>29</sup>Hau: thang: Moshe gi yanggang shoo" ri yu lho: gooki lid jhungshug khyo" ASEING ri shugbyid: da:.  
 He yanggang shoo" gi lo, ki" mainkaid jang" moo ci: da" yang loo: mo Moshe da" gamboem nghoid da:.  
 Moshe gi ASEING da" amyeing" dang: yo' dayhang: ti" ja: khang" mo" ri koid bye:.

<sup>30</sup>Moshe gi mainkaid xu: dayham" yo' phoin: dang mo suid" dayham" ri yu wigi Arun yo' nya: yuggi zoo: yi yo' nyangnu" da" byimi joem tho' moo: peig zhain gyoin: da:.  
 Hidsu" koid wigi nyang: gi nyangnu" yo'

nyangnu" da" byimi joem ri ASEING jhang shugbyid: da:.

<sup>31</sup>Moshe gi Arun yo' nya: yuggi zoo: yiri «Hau: shoo" ri ASEING shidkhein" mo zoem" khoem" duang: khyoo: yu lo" wigi jhoug ge'. Houg: lho: ASEING amyeing" byid: to" ziyoh' dayhang: ti" gyoin khoug: moo bo da" lo, ki" mainkaid xoin"- zooyho' yo' dage" houg moo zoo: ge'.  
<sup>32</sup>Deing da" shoo" anghoid lang" zooyho' ri nghe' pyam ge'.  
<sup>33</sup>Nanu" da" lo, ki" mainkaid byid: khyoo: oung: myug sho' nanu" gi zoem" khoem" duang: khyoo: nyhed nyid" ju" sho' thu ri" wa zi anghoid.  
<sup>34</sup>Nanu" yooboo ri yu pyam byid: wa shid re" akhid" nyid" ngoonu" koid da" moo" gi ngoonu" koid wa shid re" ASEING nyang: ngoonu" ri amyeing" byid: to" zi nghoid.  
<sup>35</sup>Nanu" gi zoem" khoem" duang: moo: nyhed nyid" nyang: myen" myen" nyid" nyid" nyid nyid wigi ASEING amyeing byid: to" gu: ri koid wa zi nghoid. Nanu" akoid nghoid rigi shid: wa zi nghoid. He zigi ASEING nyang: ngoo ri amyeing" byid: to" zi nghoid» ga: tid.  
<sup>36</sup>Houg: yoomo Arun yo' nya: yuggi zoo: yigi Moshe khyo" ASEING wigi amyeing" byid: to" da" ja: khang" moo" ri koid bye:.

#### Arun Xoin" Ngei" Byid: Khyoo:

**9** Lo, ki" mainkaid byid: khyoo: oung: myug da" thang: nyid" ri Moshe gi Arun- nya: yuggi zoo: yi yo' Israela vuhjung: yiri khe: yu da:.  
<sup>2</sup>Nyang: gi Arun ri «Ce: noo abo da" nuloo: zoo: dadu: yo' yang loo: zoo: dadu: ri she: yu wigi nuloo: zoo: rigi yooboo khyoid xoin" shid re" yo' yang loo: zoo: rigi myi: nghe' xoin" shid re" hau: joem ri ASEING ri ngei" byid: ge'.  
<sup>3</sup>Hau: thang: Israela byumyu" yiri yooboo khyoid xoin" shid re" ce: noo dam abo da" coidbaid loo:

dadu:- nghe' ngei" xoin" shid re" ce: noo dam abo da" dazain byeung" nu: nu" dadu: yo' dazain byeung" yang nu" dadu:- <sup>4</sup>zoem" khau: xoin" shid re" nuloo: dadu: yo' yang loo: dadu: she: ri" nhang: we'. Nyangnu" gi hau: joem ri xu: yo' lheig to" da" shivoo: xoin" yo' dage" ASEING ri ngei" byid: wa zi nghoid. Akhid" nyid" ASEING gi nyangnu" jhang re" thu shug wa nghoid yoomo he: ziri nyangnu" koid ca" wa zi nghoid. ga: tid. <sup>5</sup>Nyangnu" gi Moshe amyeing" byid: to" da" ja: khang" moo" ri zoem" shidkhoin" khyoo: ci: re" wigi ASEING ri noku wa shid re" byu phung: dangain" hougmoo: zeing: foem: nyid ago". <sup>6</sup>Moshe gi «ASEING da" bidbang nanu" ri yo" ci: shug wa shid re" he: gu: dangain" ri nanu" koid nyid ge' ga: nyang: amyeing" byid: too" bye:» ga: tid. <sup>7</sup>Hau: thang: nyang: gi Arun ri «Re" yooboo yo' byumyu" yi da" yooboo joem ri yu pyam wa shid re" phoin: khyoo: yhe: lho: yooboo khyoid xoin" yo' nghe' ngei" xoin" yhe: ngei" byid: we'. ASEING amyeing" byid: to" ziyo' dayhang: ti" byumyu" yi da" yooboo joem ri yu pyam byid: wa shid re" he: xoin" ri yhe: ngei" byid: we'» ga: tid.

<sup>8</sup>Arun gi phoin: khyoo: yhe: lho: nyang: nya: da" yooboo khyoid xoin" shid re" nghoid da" nuloo: nu" ri said da:. <sup>9</sup>Nya: yuggi zoo: yigi nya: jang" khyoo: suid" ci: ri" byid: wigi hau: jang" moo nyang: gi nya: lo, nyhoug" ri phoin: jhoin: joem mo zeing vhu" joem moo boid: da:. Deing da" gu: ri phoin: zeing khyid: moo: foid khyo' da:. <sup>10</sup>Hau: thang: nyang: gi ASEING wigi Moshe ri amyeing" byid: to" ziyo' dayhang: ti" xu:-jeingloem:- seing" mo ge thang da" du ri phoin: moo: nghe' ngei" byid: da:. <sup>11</sup>Nghoid loug we' nyang: gi shoo" yo'

shooyid ri zoem" tunggung shoid moo nghe' pyam.

<sup>12</sup>Nyang: gi nyang: nya: da" nghe' ngei" xoin" shid re" gougnyhoug ri said da:. Nya: yuggi zoo: yigi nya: jang" khyoo: suid" ci: lo wigi nyang: gi phoin: myid: shoid goin" khyoo: foid khyo' da:. <sup>13</sup>Nyangnu" gi nyang: ri gougnyhoug vhuloem yo' gootu: shoo" khyi joem ri byid: wigi nyang: gi hau: joem ri phoin: tho' moo: nghe' ngei" byid: da:. <sup>14</sup>Hau: thang: nyang: gi khoug loem khoug seing" joem yo' khyid: joem ri cid" yung" cid" lho' pyam lho: phoin: dang mo deing da" nghe' ngei" byid: da" xoin" atho' moo: hau: joem ri ke" wigi nghe' ngei" da:.

<sup>15</sup>Hau: zi bain thang: ri nyang: gi byumyu" yi da" xoin" ri ngei" byid: da:. Nyang: gi byumyu" yi da" yooboo shid re" ngei" byid: wa da" coidbaid ri she: yu lho: hau: ziri said wigi nya: da" yooboo khyoid xoin" ri ngei" byid: bye: ziyo' dayhang: ti" koid bye:. <sup>16</sup>Nyang: gi nghe' ngei" xoin" shid re" gougnyhoug ri we she: re" lho: thung" ri: yo' dayhang: ti" hau: ziri ngei" byid: bye:. <sup>17</sup>Nyang: gi shivoo: xoin" ri shugbyid: wigi cen: moin" dazhoeb ri zhoeb yu lho: phoin: tho' moo: nghe' ngei" da:. (He: zigi nyid" khang" nyid" nghe' ngei" xoin" moo loung lho: koid zi nghoid). <sup>18</sup>Nyang: gi byumyu" yi shid re" zoem" khau: xoin" khyo" nuloo: yo' yang loo: ri said da:. Nya: yuggi nu" yigi nya: jang" khyoo: suid" ci: re" wigi nyang: gi phoin: da" myid: shoid goin" khyoo: hau: suid" ri foid khyo' da:. <sup>19</sup>Arun gi nuloo: yo' yang loo: da" xu: joem ri <sup>20</sup>gougnyhoug tang: da" yang gang tho' moo ke" lho: dangain" ziri phoin: khyoo: vu, yhe: da:. Nyang: gi xu: ri phoin: tho' moo: nghe' ngei" lho: <sup>21</sup>yanggang shoo" joem yo' lo, yo shoid bungsain: joem



ri Moshe amyeing" byid: to" da" ziyo' dayhang: ti" khainjung yi shid re" gooki lid jhungshug khyo" ASEING ri shugbyid: wa zi nghoid.

<sup>22</sup>Arun gi xoin" joem dangain" bain ngei" lang" byu phung: yi atho' moo nya: lo, tu: to' to" lho: nya: bang: ri mainkaid byid: da:. Hau: thang: nyang: gi hougmo gyoo" lo" da:. <sup>23</sup>Moshe yo' Arun gi ASEING da" zoem" khyoo: vang loo" bye:. Nya: tang: doem thu re" lho: byu phung: yiri mainkaid byid: da:. Myo, kyoem: loo" sho' bang da" ASEING bidbang gi byumyu" yi dangain" shidkhoin" moo bang thu loo bye:. <sup>24</sup>Nyeigdain tung" ASEING gi myi: ri khyo kaid lho: nghe' ngei" da" xoin" yo' phoin: dang mo xu: joem ri nghe" pyam da:. Hau: ziri byumyu" yi shau" myang lang" nyangnu" dangain" gi yoid nyho: wigi nyangnu" myonhoo: joem myidgung khyoo: goeb pid ago".

### Nadab Yo' Abihu Tang: Da" Yooboo

**10** Arun da" nya: yuggi zoo: Nadab yo' Abihu tang: gi nyang: yug nya: myioung" yu lho: hau: jang" moo myi: dab da" myigyu: kaid- nam pyo: ja: kaid wigi hau: ziri ASEING jhang shugbyid: da:. Nghoid loug we' hau: myi: gi gyeung" shang: zi anghoid. Ciwim gari: hau: zi shugbyid: wa shid re" nya: tang: ri ASEING amyeing" abyid: too" nghoid da:. <sup>2</sup>ASEING gi houg: jang: myi: ri khyo kaid wigi hau: joyoo ASEING shidkhoin" moo nya: tang: ri nghe' said pyam da:. <sup>3</sup>Hau: thang: Moshe gi Arun ri «He: zigi ASEING nyang: dang: tid uri «ngoo ri shugbyid: bang: dangain" nga" da" gyeung" shang: ziri phau" myang: ca"- ngoo gi nga" byumyu" yiri nga" phung" yoeb ri pang shug wa nghoid» ga: tid da" dang: nghoid» ga: tid.

Nghoid loug we' Arun gi sam zoo: tam" to" da:

<sup>4</sup>Moshe gi Arun da" nya: laid Uziela nya: yuggi zoo: tang: nghoid da" Meshaela yo' Elzaphan tang: re khe: yu lho: «Hid khyoo: re" lho: he: younglho' zoem" mo re" eig tang: da" mang: nhung" tang: manggung ri re" vu, yu lho: dab tunggung shoid moo yhe: vu, too" ge'» ga: tid. <sup>5</sup>Houg: yoomo nya: tang: gi re" lho: manggung mo byimi moo zei: wigi Moshe amyeing" dang: yo' dayhang: ti" dab tunggung shoid khyoo: yhe: dang pyam ago".

<sup>6</sup>Hau: thang: Moshe gi Arun yo' nya: yuggi zoo: tang: nghoid da: Eleaza yo' Ithama tang: ri «Nanu" kougshu: zi ci: shug khyo" wigi vhuloem akyo'- anghoid lang" byimi lang: ceig khyoo: ri akoid go". Nanu" hougsu" koid rigi nanu" shid: boem wa. ASEING gi byu phung: goin" ziri nheig yo: loo wa nghoid. Nghoid loug we' ASEING wigi nhang: kaid da" myi: wigi nge" shid: pyam da" he: shid: mang ri nanu" da" mang: nhung" Israela byumyu" yigi koug ngau wa da" akhang" yo" da:. <sup>7</sup>Zoem" khoem" duang: mo athu loo" goo"- nanu" thu lo" ri shid: shau" wa. Ciwim gari: nanu" gi ASEING da" mainkaid xu: gyoid lho: shug byid: too" byid: bye: mo, nghoid ago"» ga: tid. Houg: yoomo nyangnu" gi Moshe tid ziyo' dayhang: ti" koid bye:

### Khainjung Yi Shid Re" Tarha" Joem.

<sup>8</sup>ASEING gi Arun ri <sup>9</sup>«Nang yo' re" yuggi zoo: yigi zabyid yhid: anghoid lang" yhid: shed shug thang: ri nga" zoem" khoug: khyoo: age vang wa. Nanu" vang yhe: nghoid rigi nanu" shid: shau" wa zi nghoid. He: zigi nanu" da" amyed ashen yi dangain" cang wa da" tarha" nghoid. <sup>10</sup>Nanu" gi Mangso wigi seing: da" gu: joem

yo' shava dangain" mo, shid re" ca" da" ja: joem agyoo: moo we' thung" ri: khyo" younglho' ziy'o' ayung" alho' da" ja: agyoo: moo we' kho' too" ca" ago". <sup>11</sup>Nanu" gi Moshe khyo" wigi ngoo nanu" ri byid: to" da" tarha" joem dangain" ri Israela byumyu" yiri jhau" byid: ca" ago"» ga: tid. <sup>12</sup>Moshe gi Arun yo' deing nyid shi" da" nya: yuggi zoo: tang: nghoid da" Eleaza yo' Ithama bang: ri «ASEING shid re" ngei" byid: da" zoo: noem xoin" mo teing to" da" shivoo: xoin" ri yu lho: hau: ziri doocid" akaid loo: za zooyho' koid wigi hau: zooyho' ri phoin: nam moo zoo: ge'. Ciwim gari: he: xoin" gi gye" gyeung" shang: zi nghoid. <sup>13</sup>Hau: zooyho' ri gyeung" shang: da" joyoo moo: zoo: ge'. Hau: zigi ASEING ri ngei" byid: da" zoo: noem xoin" mo nang yo' re" yuggi zoo: yi shid re" gamboem nghoid da:. Hau: zigi ASEING ngoo ri byid: to" da" amyeing" dang: nghoid. <sup>14</sup>Nghoid loug we' nang yo' re" yhoem: byu yigi khainjung yi shid re" gooki lid jhungshug yo' gooki lid alu: khyo" wigi ASEING ri shugbyid: da" yanggang shoo" yo' bungsain: ri zoo: we'. Nanu" gi hau: xoin" ri thung" ri: khyo" gyeung" shang: da" joyoo khamoo: nghoid loug we' zoo: ge'. He: xoin" joem gi Israela byumyu" yi da" zoem" khu: xoin" mo nang yo' re" zoo: yi gamboem khyo" nanu" ri byid: to" zi nghoid da:. <sup>15</sup>Nyangnu" gi xu: ri zoo: noem xoin" khyo" ASEING ri ngei" byid: da" uri bungsain yo' yanggang shoo" ri ci: ri" wa zi nghoid. ASEING amyeing" dang: yo' dayhang: ti" hau: gamboem gi nang yo' re" zoo: yi shid re" apyaid atoo: nanu" seing: wa zi nghoid da:.

<sup>16</sup>Hau: thang: Moshe gi yooboo khyoid xoin" shid re" coidbaid da" khyoo: ri myid: yu" uri hau: zi bain nghe' ngei" bye: ziri se' yu da:. He: zi

yoomo Moshe gi Eleaza yo' Ithama tang: ri nheig yo: da:. Houg: lho: nyang: gi <sup>17</sup>«Ciwim yoomo re" eig tang: yooboo khyoid xoin" ri younglho' joyoo moo azoo go" lha". Hau: zigi gye" gyeung" shang: zi nghoid. Byu phung: da" yooboo ri yu pyam byid: wa shid re" hau: ziri ASEING gi nanu" ri byid: to" zi nghoid. <sup>18</sup>Hau: du: da" suid" ri younglho' da" zoem" khyoo: aci: vang loo" yoomo ngoo amyeing" byid: to" ziy'o' dayhang: ti" re" tang: gi hau: xoin" ri houg moo zo: pyam wa eung: zi nghoid» ga: tid.

<sup>19</sup>Arun doem «Akhid" nyid" ngoo he: yooboo khyoid xoin" zo: nghoid rigi ASEING khab yu wa la". Byumyu" yigi akhid" nyid" nyangnu" da" yooboo khyoid xoin" joem ri ASEING ri shugbyid: lho: nyangnu" da" nghe' ngei" xoin" ri we' ci: re" ago". Nghoid loug we' hau: gyoug pho" moo" zoo" joem gi nga" jhang bue" nyid abyee:» ga: tid. <sup>20</sup>Moshe he: ziri shau" gyoo: lang" nyang: nheugshid: nheugdeug bye: da:.

### Ge Zo: Da" Gougnyhoug Joem

(Tid 14:3-21)

**11** ASEING gi Moshe yo' Arun ri vho: moo: tid to" da" thung" ri: joem ri <sup>2</sup>Israela byumyu" yi shid re" byid: bye:. Nanu" gi myidgung gougnyhoug nghoid da" <sup>3</sup>khyid: seing" go, ziy'o' voem: doem tau" rhe" da" ja: ci: nghoid loug we' yo" zoo: wa zi nghoid. <sup>4-6</sup>Nghoid loug we' nanu" gi gola-ug- ceuglhid"- yo' thanglhoo joem ri age zoo: nghoid da:. Hau: joem rigi ayung" alho' khyo" myid soin: ca" da:. Hau: joem gi voem: doem tau" rhi" nghoid loug we' khyid: seing" ago, nghoid da:. <sup>7</sup>Vu, shoo" azoo: goo". Hau: joem ri ayung" alho' khyo" myid soin: ca" da:. Hau: joem gi khyid: seing" go,

ngheid loug we' voem: adoem tau" rhi" ngheid da:. <sup>8</sup>Hau: gougnyhoug joem ri azoo: goo" shid: mang joem rilang" atain" goo"- hau: joem gi ayung" alho' zi ngheid da:.

<sup>9</sup>Dung yo' akyab dab da" wimdo, ce: ja: ngheid loug we' nanu" ge zo: ago". <sup>10</sup>Ngheid loug we' dung yo' akyab adab da" gyid khoug: mo gougnyhoug joem ce: ja: ri we' age zoo: ngheid da:. <sup>11</sup>Houg yhang: ti" da" dei noem joem rigi ayung" alho' da" ja: khyo" myid soin: yu ca" da:. Nanu" gi hau: joem ri azoo: goo". Hau: joem da" shid: mang rilang" atain" goo". <sup>12</sup>Nanu" gi gyid khoug: mo dei noem: ngheid da" dung yo' akyab adab da" ja: ci: ja: ngheid loug we' age' zoo: wa.

<sup>13-19</sup>Nanu" gi vho: moo: tid to" da" ngho' joem daja: ri we' azoo: goo". Hau: joem gi zoin bung:- khung" boeb-zoin kyang"- zoin kyang" myiko- zoin kyang" mi"- voin yu- kuano- gola-ug ngho'- panglai: pheing" kyoug"- gyid ngho'- gyid ngho' khyid sheing:- voin pu ngho'- gyid ngho' nhoid bung:- moug: ngho' yo' pho shid ngheid ago". <sup>20-21</sup>Zoem" byam byam da" ja: mo lid lho: dung dab da" tungdi: dangain" gi ayung" alho' ngheid da:. <sup>22</sup>Nanu gi jhenkhyeug- boem pyu:- boem pyeig joem ri ge zo ago". <sup>23</sup>Ngheid loug we' dung dab lho: yu: yen" ja: ngheid da" tungdi: nu" joem dangain" gi ayung" alho' ein: khyo" xoem" too" ca" da:.

<sup>24-28</sup>Vho: moo: tid to" da" gougnyhoug shid: mang tain" da" yug hang" ngheid loug we' nyang: gi myen" tang: ju" sho' ayung" alho' bue" jo, wa. Khyid: sen" ago, ziyo' voem: adoem tau" rhe" da" gougnyhoug joem myid: khyid: dab wigi khyid: voo: joem dab da" gougnyhoug joem ngheid da:. Hau: joem shid: mang ri dang bang: hang" ngheid loug we' nya: byimi ri

cid" pyam ca" da:. Ngheid loug we' nyang: gi myen" thang: ju" sho' ayung" alho' bue" jo, wa.

<sup>29-30</sup>Gyu, shau" joem gyu, joem gyu, nhoid coin" yo' zang gyung joem ri ayung" alho' khyo" xoem" too" ca" da:. <sup>31</sup>Hau: joem ri anghoid lang" hau: joem da" shid: mang ri zang" tain" da" hang" ngheid loug we' myen" thang: ju" sho' ayung" alho' bue" jo, da:. <sup>32</sup>Hau: shid: mang gi daja: ja: moo gyo" zang" ngheid rigi hau: zigi ayung" alho' bue" wa. Hau: joem gi seig yo' koid to" da" jonu"- byimi-shooyid anghoid lang" jid: moo" pain" yhang: te" ci: ca" gu: dangain" ngheid. Hau: joem ri gyid moo: joem too" wa zi ngheid. Ngheid loug we' myen" thang: ju" sho' ayung" alho' bue" jo, wa ngheid. <sup>33</sup>Houg: lho: hau: joem gi zhoo" oug" khoug: khyoo: gyo" vang ngheid rigi hau: akhoug: moo bo da ja: khang" moo" gi ayung" alho' bue" wa ngheid wigi nanu" hau: oug" ri baid kho' pyam ca" wa ngheid. <sup>34</sup>Zoo: noem joem ja: khang" moo" ri goou" yhang: ti" yo" zoo: wa ngheid. Ngheid loug we' houg yhang: te" da" oug" mo gyid foid zang" da" zoo: noem gi ayung" alho' zi bui" wa ngheid. Hau: oug" mo shug ja: dangain" we' ayung" alho' zi ngheid da:. <sup>35</sup>Ce: ja: atho' moo: ngheid ngheid hau: shid: mang joem gyoo" lang" ayung" alho' loo myidzhoo" myikhyoem anghoid lang" myikhyoem baid phyo' pyam ca" da:. <sup>36</sup>Ngheid loug we' hau: shid: mang moo: zang" tain" da" ja: khang" moo" ayung" alho' loug- gyid bug anghoid lang" gyid thung" gi younglho' jo, da:. <sup>37</sup>Shoo" wa shid re" koid to" da" shivoo: atho' moo: hau: shid: mang daja: ja: gyo" zang" ngheid rigi hau: shivoo: gi younglho' shi" da:. <sup>38</sup>Ngheid loug we' shivoo: ri gyid moo: nyhoin" to" jang" moo hau: shid: mang gyo" ngheid rigi hau: shivoo: gi ayung" alho' ngheid da:.

<sup>39</sup>Yo" zo: da" gougnyhoug daja: ja: shid: nghoid rigi houg moo zang" thung" tain" da" byu hang" nghoid loug we' myen" thang: ju" sho' ayung" alho' nghoid nyid da:. <sup>40</sup>Hau: gougnyhoug shoo" ri zoo: su: gi nya: byimi ri cid" ca" wa nghoid. Nghoid loug we' myen" thang: ju" sho' nyang: gi ayung" alho' nghoid da:. Hau: shid: mang ri dang su: hang" nghoid loug we' nya: byimi ri cid" ca" wa nghoid. Nghoid loug we' nyang: gi myen" thang: ju" sho' ayung" alho' nghoid nyid da:.

<sup>41</sup>Nanu" gi myidgung moo yu: yen" da" gougnyhoug zoo: ce: ja: ri we' age zoo: nghoid da:. <sup>42</sup>Hau: joem gi yu: lo" ja: nghoid ri nghoid khyid: myid: khyid: yo' so" ja: nghoid ri nghoid- khyid: myo" sho' yo' so" ja: nghoid ri nghoid age zoo: nghoid da:. <sup>43</sup>Hau: joem daja: ja: ri zo: lho: nanu" nya: gung ri ayung" alho' akoid goo". <sup>44</sup>Ngoo gi nanu" ASEING Mangsoo nghoid. Ngoo gyeung" shang: nyid yoomo nanu" we' nanu" gung ri gyeung" shang: nhang: ca" nyid da:. <sup>45</sup>Ngoo gi nanu" Mangso bui" nyid wa shid re" nanu" ri Egotu mung" mo shu" thu lo da" ASEING nghoid. Nanu" gyeung" shang: ca" da:. Ciwim gari: Ngoo gi gyeung" shang: su: nghoid.

<sup>46</sup>He: zigi gougnyhoug joem yo' ngho' joem gyid khoug moo nyid ja: dangain" yo' myidgung moo so" yen" da" ja: dangain" yo' sen da" tarha" nghoid. <sup>47</sup>Nanu" gi thung" khyo" younglho' ziyu' ayung" alho' da" ja: joem ri nyeing" za: kho' yu lho: ge zo: gougnyhoug yo' age zo: gougnyhoug ri se' kho' wa shid re" lhid nyid ge'.

**Myhi Zeing Yi Zooshang:**  
**Bain Khu: Thang: Ri:**  
**Kyeing Sain' Khyoo:**

**12** ASEING gi Moshe ri vho: moo: tid to" da" thung" joem ri <sup>2</sup>Israela

byumyu" yi shid re" byid: bye:. Myiyi: gi lhammoo" khyab, khang" moo" bue" da" mi ci: ayo, yhang: ti" yuggi zoo: khu: thang: nyhed nyid" ju" sho' nyang: gi thung" khyo" ayung" alho' nghoid da:. <sup>3</sup>Shed nyid" nyid" moo zooshang: ri shooyid thang: yham" byid: wa nghoid. <sup>4</sup>Hau: thang: nyang: suid" shoin: jang" mo thung" khyo" younglho' da" ayo, ju" sho' soem" xe: soem" nyid" nyid wa nghoid. Nyang: gi younglho' pyam da" ayo, abyeung" byeung" gi gyeung" shang: da" ja: ciri: we' age tain" anghoid lang" gyeung" shang: da zoem" khoug: khyoo: age vang yhi: wa.

<sup>5</sup>Myiyi: gi lhammoo" khyab, khang" moo" bue" da" mi ci: ayo, yhang: ti" myiyi zoo: ri khu: thang: daxe: myid: nyid" ju" sho' thung" khyo" ayung" alho' nghoid da:. Hau: thang: nyang: suid" shoin: jang" mo thung" khyo" younglho' da" ayo, ju" sho' khyug xe: khyug nyid" nyid nyid wa nghoid.

<sup>6</sup>Yuggi zoo: khu: wigi nghoid ri nghoid myiyi: zoo: khu wigi nghoid ri nghoid nya: da" younglho' pyam da" ayo, byeung" lang" nghe' ngei" wa shid re" dazain byeung" da" yang nu" dadu: yo' yooboo khyoid xoin" shid re" jid: u: dadu: anghoid lang" pheing" kyoug" dadu: ri ASEING shidkhoin" zoem" khoem" duang:- khainjung jang" khyoo: ci: yhi: wa nghoid. <sup>7</sup>Khainjung phoo gi myiyi: myhi' da" xoin" ri ASEING ri shugbyid: wa nghoid lho: nya: ayung" alho' da" ziri thung" khyo" yu pyam byid: da" akhyoo" ri koid wigi nyang: gi thung" khyo" younglho' byug wa nghoid. He: zigi myiyi: dayug zoo: bain khu: thang: ri koid ca" da" akhyoo" joem nghoid da:.

<sup>8</sup>Myiyi myhi' gi yang nu" age bui" nghoid rigi nyang: gi pheing" kyoug"

eig du: anghoid lang" jid: u: eig du: ri dadu: gi nghe' ngei" xoin" shid re" ci: yhe: lho: gootu: dadu: gi yoofoo khyoid xoin" shid re" ci: yhi: wa zi nghoid. Houg: lho: khainjung phoo: gi hau: myiyi myhi' da" ayung" alho' da" ziri thung" khyo" yu pyam byid: da" akhyoo" ri koid wigi nyang: gi thung" khyo" younglho' byug wa nghoid.

### Manggam Yo' Sen: Da" Tarha" Joem

**13** ASEING gi Moshe yo' Arun ri he: thung" ri: joem ri byid: da:. <sup>2</sup>Byu dayug yug gi nya: shooyid moo: dam joid anghoid lang" byeing- anghoid lang" manggam ge bue" re" da" kho: ri yo" nghoid rigi nyang: ri Arun kung: mo khainjung pho jang" khyo: shu" yhi: wa zi nghoid da:. <sup>3</sup>Khainjung phoo gi hau: dam joid ri joeb ca: yu" lho: houg mo shoomoug" joem gi phyu lo" wigi dam joid gi loem: lheing khab mo shooyid tho' je no, vang loo" bye: nghoid rigi hau: zigi manggam nghoid da:. Houg: lang" khainjung phoo gi hau: yug ri ayung" alho' ga: tid wa zi nghoid. <sup>4</sup>Nghoid loug we' dam joid gi phyu: wigi hau: loem: lheing khab mo shooyid joem tho' moo we' ano, vang loo" lho: shoomoug" we' aphyu: loo nghoid rigi khainjung phoo gi nyang: ri kyeing" nyhed nyid" ju" sho' nyhid: too" wa zi nghoid. <sup>5</sup>Khainjung phoo: gi nyhed nyid" ein: nyid" ri nyang: ri doem joeb ca: yu" wa zi nghoid. Nyang: yu" ri hau: dam joid gi dakhyoo" za: bue" jo, wigi gootu: aje: ri" nghoid rigi nyhed nyid" nyang: ri kyeing" doem nyhid: too" wa zi nghoid. <sup>6</sup>Khainjung phoo gi nyhed nyid" ein: nyid" ri nyang: ri doem joeb ca: yu" ri dam joid gi shoem: lo" byug lho: gootu: khyoo: aje: loo" nghoid rigi khainjung phoo gi nyang: ri thung" khyo" younglho' wigi nghoid- hau: zigi dam joid za:

danghoid ein: tid pyo: kaid wa zi nghoid. Hau: yug gi nya: byimi ri cid" pyam wigi thung" khyo" younglho' bye: zi nghoid. <sup>7</sup>Nghoid loug we' khainjung phoo nyang: ri joeb ca: yu" wigi nyang: ri younglho' ga: tid pyo: kaid thang: ri dam joid doem je: lo nghoid rigi nyang: gi khainjung pho shidkhoi" khyoo: doem yhe: ci: shug ca" wa zi nghoid. <sup>8</sup>Khainjung phoo gi nyang: ri doem joeb ca: yu" wigi dam joid je: re" nghoid rigi khainjung phoo gi nyang: ri ayung" alho' ein: tid pyo: kaid wa zi nghoid. He: zigi manggam nghoid.

<sup>9</sup>Byu dayug yug manggam dab nghoid rigi nyang: ri khainjung pho jang" khyoo: shu" yhi: wa zi nghoid lho: <sup>10</sup>Khainjung phoo gi nyang: ri joeb ca: yu" byid: wa zi nghoid. Nya: shooyid mo dam joid phyu: jang" mo zi shoomoug" joem we' phyu: lo" byug wigi foied we' byeung" sho' bo nghoid rigi <sup>11</sup>Hau: zigi shooyid dam joid xau" nghoid. Khainjung phoo gi nyang: ri ayung" alho' ga: tid fu" wa zi nghoid. Nyang: ri gootu: nyhid: too" aca" loo: nghoid da:. Ciwim gari: nyang: gi bang bang ayung" alho' nghoid da:. <sup>12</sup>Manggam gi je: lo wigi hau: yug da" vhuloem mo zi khyid: thang: ju" sho' joid lo nghoid rigi <sup>13</sup>Khainjung phoo gi nyang: ri dalheing: doem joeb ca: yu" wa zi nghoid. Hau: zi gyeing" nyang: gung goin" moo dam joid joid ziri nyang: myang nghoid rigi Nyang: gi hau: yug ri thung" khyo" younglho' ga: tid fu" wa zi nghoid. Nya: shooyid dangain phyu: loo" bye: nghoid rigi nyang: gi thung" khyo" younglho' da:. <sup>14</sup>Nghoid loug we' hau: uri dam joid joid thu re" nghoid rigi nyang: gi ayung" alho' nghoid da:. <sup>15</sup>Khainjung phoo gi nyang: ri doem joeb ca: yu" wigi nyang: gi dam joid joid re" zi

nyang: nghoid rigi khainjung phoo gi hau: yug ri ayung" alho' ga: tid fu" wa zi nghoid. Dam joid joid ein: zigi manggam nghoid yoomo hau yug gi: ayung" alho' nghoid da:. <sup>16</sup>Nghoid loug we' hau: dam joid gi ge lo" lho: dalheing: doem phyu: re" nghoid rigi hau: yug gi khainjung pho jang" khyoo: doem yhi: ca" wa zi nghoid. <sup>17</sup>Khainjung phoo gi nyang: ri doem joeb ca: yu" wa zi: nghoid. Dam joid doem phyu: lo nghoid rigi nyang: gi thung" khyo" younglho' zi nghoid wigi khainjung phoo gi nyang: ri younglho' bye: ga: tid fu" wa zi nghoid.

<sup>18</sup>Byu dayug gi byeing myug lho: ge lo wigi <sup>19</sup>Thang: ri hau: byeing dam moo acab cab phyu: re" anghoid lang" ni ni phyu: phyu: khoo: bue" thu re" nghoid rigi nyang: gi khainjung phoo jang" khyoo: yhi: ca" wa zi nghoid. <sup>20</sup>Khainjung phoo gi nyang: ri joeb ca: yu" wigi hau: dam khoo: gi loem: lheing khab mo shooyid tho' je no, vang lo" ti" du ziyoi' houng mo shoomoug" phyu: lo nghoid rigi khainjung phoo gi nyang: ri ayung" alho' ein: tid fu" wa zi nghoid. Hau: zigi byeing dam mo bue" shid" da" manggam nghoid. <sup>21</sup>Nghoid loug we' hau: ziri khainjung phoo joeb ca: yu" ri shoomoug" joem aphyu: loo- loem lheing khab mo shooyid tho' mo we' je ano, vang lo" zi shau" myang loug-void voo: bo jo, nghoid rigi khainjung phoo gi nyang: ri nyhed nyid" ju" sho' gootu: nyhid: too" wa zi nghoid. <sup>22</sup>Dam khoo: je: re" nghoid rigi khainjung phoo gi nyang: ri ayung" alho' ein: tid fu" pyam wa zi nghoid. Nyang: gi noo su: nghoid. <sup>23</sup>Nghoid loug we' hau: zigi gootu: ashai" wigi je: we' aje: loo nghoid rigi byeing dam joid khoo: za: danghoid yoomo khainjung phoo gi nyang: ri thung" khyo" younglho' ein: tid fu" wa zi nghoid.

<sup>24</sup>Myi: nge" da" byu dayug moo: myi: nge" dam moo: aphyu: bue" lo anghoid lang" ni ni phyu: phyu: khoo: bue" lo nghoid rigi <sup>25</sup>Khainjung phoo wigi nyang: ri joeb ca: yu" ca" wa zi nghoid. Dam khoo: mo shoomoug" joem phyu: lo wigi loem: lheing khab mo shooyid tho' dam je no, vang lo" nghoid rigi hau: zigi myi: nge" dam mo shid" da" manggam nghoid wigi khainjung phoo gi nyang: ri ayung" alho' ein: tid fu" wa zi nghoid. <sup>26</sup>Nghoid loug we' dam khoo: mo shoomoug" joem gootu: aphyu: loo wigi hau: loem: lheing" khab mo shooyid tho' we' je ano, vang loo" loug dam khoo: avoid dajhi zoo: shai" lo khyoo: bo jo, nghoid rigi khainjung phoo gi nyang: ri nyhed nyid" ju" sho' gootu: nyhid: too" wa zi nghoid. <sup>27</sup>Khainjung phoo gi nyang: ri nyhed nyid" ein nyid" doem joeb ca: yu" ri hau: zi je: jo, lang" nghoid rigi manggam nghoid wigi khainjung phoo gi nyang: ri ayung" alho' ein: tid fu" wa zi nghoid. <sup>28</sup>Nghoid loug we' dam khoo: gi gootu: ashai" ziyoi' aje: loo wigi void voo: dathu rigi hau: zi manggam anghoid da:. Khainjung phoo gi nyang: ri thung" khyo" younglho' ein: tid fu" wa zi nghoid. Ciwim gari: hau: zigi myi: ngi" dam mo khoo: duang jo, zi danghoid.

<sup>29</sup>Yuggi anghoid lang" myiyi: dayug gi vhuloem moo anghoid lang" amcam" moo dam joid bui" lang" <sup>30</sup>khainjung phoo gi hau: ziri joeb ca: yu" wa zi nghoid. Hau: zigi loem: lheing khab mo shooyid tho' je no, vang lo" lho: houng mo shoomoug" joem gi boo" boo" bue" wigi neing: lo" ti" du nghoid rigi manggam nghoid. Nyang: gi hau: yug ri ayung" alho' ein: tid fu" wa zi nghoid. <sup>31</sup>Khainjung phoo gi nyang: ri joeb ca: yu" uri hau: zigi loem: lheing khab mo shooyid tho' je ano, vang



loo"- age da" shoomoug" joem we' adab nghoid rigi khainjung phoo gi nyang: ri nyhed nyid" ju" sho' gootu: nyhid: too" wa zi nghoid. <sup>32</sup>Nyhed nyid" ju" lang" khainjung phoo gi dam joid ri doem yu" ri hau: zigi aje: loo- houg mo shoomoug" joem we' aboo" lo ziyo' hau: loem: lheing khab shooyid tho' je ano, vang gyoo" lo" nghoid rigi <sup>33</sup>hau: yug gi dam joid lheing khab mo shoomoug" ri yed pyam wa zi nghoid. Hau: thang: khainjung phoo gi nyang: ri nyhed nyid" ju" sho' gootu: doem to" too" wa zi nghoid. <sup>34</sup>Nyhed nyid" ju" lang" khainjung phoo gi dam joid ri dalheing: doem joeb ca: yu" wigi hau: zigi aje: lo ziyo' hau: loem: lheing khab mo shooyid tho' aje no, gyoo" lo" nghoid rigi khainjung phoo gi nyang: ri thung" khyo" younglho' bye: ein: tid fu" wa zi nghoid. Hau: yug gi nya: byimi ri cid" wa zi nghoid wigi nyang: gi younglho' wa nghoid. <sup>35</sup>Nghoid loug we' nyang: younglho' bye: ga: tid fu" thang: ri dam joid doem joid nghoid rigi <sup>36</sup>Khainjung phoo gi nyang: ri dalheing: doem joeb ca: yu" wa zi nghoid. Dam joid je: lo nghoid rigi shoomoug" boo" abo" zi yu" aca" loo: nghoid da:. Hau: yug gi bang bang ayung" alho' nghoid da:. <sup>37</sup>Nghoid loug we' khainjung phoo da" myid khoug: moo: dam joid gi aje: loo: wigi houg moo yug da" shoomoug" we' doem gi bye: nghoid rigi dam joid gi bye: ziyo' khainjung phoo gi nyang: ri thung" khyo" younglho' bye: ein: tid fu" wa zi nghoid.

<sup>38</sup>Yuggi anghoid lang" myiyi: dayug da" shooyid moo: phyu: phyu: zi akhoo: duang nghoid rigi <sup>39</sup>khainjung phoo gi hau: yug ri joeb ca: yu" wa zi nghoid. Mid" mid" phyu: da" akhoo: danghoid rigi shooyid tho' mo yo" byug lo" da" dam khoo: za: danghoid

da:. Hau: yug gi thung" khyo" younglho' bye: zi nghoid.

<sup>40-41</sup>Byu dayug gi nya: da" vhu" noung" lang: thang: anghoid lang" ngilang: moo: xam: shu: byug nghoid rigi houg yhang: te" ziyo' ayung" alho' abui" nhang: nghoid da:. <sup>42</sup>Nghoid loug we' hau: xam: shu: byug da" khoo: moo: ni ni phyu: phyu: bue" wigi dam joid joid re" nghoid rigi hau zigi manggam no zi nghoid da:. <sup>43</sup>Khainjung phoo gi nyang: ri joeb ca: yu" wigi hau: jang" moo ni ni phyu: phyu: dam khoo: duang nghoid rigi <sup>44</sup>nya: vhuloem moo: manggam noo bue" ri" yoomo nyang: gi ayung" alho' ein: khainjung phoo gi tid fu" wa zi nghoid.

<sup>45</sup>Manggam dab da" byu dayug gi byimi joid joem void ca" zi nghoid. Nya: vhuloem ri age kyo'. Nya: myonhoo: vho: du ri nghoeb too" ca" ziyo' «Ayung" alho'- ayung" alho'» ein: nyhoo: ca" zi nghoid. <sup>46</sup>Hau: yug gi dam dabue" nyid nyid gi subi" yo' ve: da" dab tunggung moo: nyid ca" zi nghoid.

### **Moug" Jhung" Yo' Sen: Da" Tarha"**

<sup>47</sup>Moug" jung" ri soug" goug" byimi joem soug" goug" pain" anghoid lang" zin: yung" pain" byimi joem <sup>48</sup>zin: yung" pain" gi cu'- soug" goug" cu'- shooyid cu'- shooyid yo' koid to" da" daja: ja: adang moo bue" wigi <sup>49</sup>hau: zigi nyoug nyoug zi anghoid lang" ni ne zi nghoid rigi yo" je: lo" da" moug" jhung" nghoid ziyo' khainjung ri ci: shug ca" zi nghoid. <sup>50</sup>Khainjung phoo gi hau: ziri joeb ca: yu" lho: hau: ziri nyhed nyid" nyang: to" too" wa zi nghoid. <sup>51</sup>Nyang: gi hau: ziri nyhed nyid" ein: nyid" ri doem joeb ca: yu" wigi moug" jhung" to' jo, nghoid rigi hau: zigi ayung" alho' nghoid da:. <sup>52</sup>Khainjung phoo gi hau: ziri myi: nghe' pyam wa zi

ngheid. Ciwim gari hau: zigi yo" je: lo da" moug" jhung" to' nyid yoomo myi: wigi nghe' pyam ca" zi ngheid.

<sup>53</sup>Nghoid loug we' hau: ziri nyang: joeb ca: yu" uri hau: jonu" moo moug" jhung" ato' ziri khainjung phoo shau" myang nghoid rigi <sup>54</sup>hau: ziri cid" wigi gootu: nyhed nyid" doem to" too" wa shid re" nyang: gi amyeing" byid: wa zi ngheid. <sup>55</sup>Hau: thang: hau: ziri nyang: joeb ca: yu" ri akhoo: gootu: aji: nghoid loug moug" jhung" gi void voo: shai" byug nghoid rigi hau: zigi ayung" alho' shi" nghoid da:. Hau: da" zigi shidkhein" khyoo: anghoid lang nunghang khyoo: nghoid loug we' yoem: loo" yoomo hau: ziri nanu" nghe' pyam ca" zi ngheid. <sup>56</sup>Nghoid loug we' hau: ziri khainjung phoo dalheing: doem joeb ca: yu" ri moug" jhung" moid" shoem: byug nghoid rigi byimi mo anghoid lang" shooyid mo hau: khoo: ri nyang: lang: ceig pyam wa zi ngheid. <sup>57</sup>Hau: thang: moug" jhung" gi doem to' re" wigi doem je: re" nghoid rigi yhoem: seing gi hau: ziri nghe' pyam wa zi ngheid. <sup>58</sup>Nyang: gi hau: jonu" ri cid" pyam lang" akhoo: byug lo" nghoid rigi hau: jonu" ri nyang: gi doem cid" wa zi ngheid. Hau: zigi thung" khyo" younglho' bye: zi ngheid.

<sup>59</sup>He: zigi soug" goug" byimi joem anghoid lang" zin: yung" byimi joem soug" goug" cu'- anghoid lang" zin: yung" pain" cu'- anghoid lang" shooyid cu' yo' koid to" da" byimi ce: ja: da" atho' moo: dab da" moug" jhung" shid re" tarha" nghoid da:. Thung" khyo" younglho' ziyo' ayung" alho' khyoo: ri he: tarha" khyo" myid phyed ca" da:.

### **Manggam Ge Thang: Ri: Younglho' Byid: Khyoo:**

**14** ASEING gi Moshe ri <sup>2</sup>Manggam ge loo su: dayug da" younglho'

thung" yo' sen: wigi vho: moo: tid to" da" thung" ri: joem ri byid: to" da:. Nyang: ri younglho' bye: ga: tid fu" kaid da" bidnyid ri nyang: ri khainjung pho jang" khyoo: shu" yhi: wa zi ngheid. <sup>3</sup>Khainjung phoo gi nyang: ri dab tunggung khyoo: shu" thu yhe: wigi nyang: ri joeb ca: yu" wa zi ngheid. Dam ge lo" nghoid rigi <sup>4</sup>khainjung phoo gi thung" khyo" younglho' pyam bye: da" ngho' eig du: ri shamu dajab- tei" ni dakhaid- pagyoem dakyang: yo' dage" yu ci: ri" wa shid re" amyeing" byid: wa zi ngheid. <sup>5</sup>Hau: thang: khainjung phoo gi ngho' dadu: ri gyid seig kaid to" da" myidzhoo" jarung: adang moo: said wa shid re" amyeing" byid: wa zi ngheid. <sup>6</sup>Nyang: gi gootu: ngho' dadu: ri yu wigi hau: ngho' said kaid to" da" suid jarung: moo shamu jab- tei ni khaid- pagyoem kyang: yo' dage" hau: suid" moo doin: nhoeb wa zi ngheid. <sup>7</sup>Nyang: gi suid" ri manggam ge lo" lho: younglho' byid: zi shoug" su: da" adang moo nyhed lheing: peig zhain' gyoin: wigi nyang: gi hau: yug ri younglho' bye: ein: tid fu" wa zi ngheid. Nyang: gi dei shi" da" ngho' rigi pa: dain" khyoo: dang: phang: loo" nhang: wa zi ngheid. <sup>8</sup>Byu hau: yug gi nya: byimi joem ri cid"- xam: ri nyham" pyam wigi gung cid" wa zi ngheid. Hau: thang: nyang: gi thung" khyo" younglho' bye: zi ngheid. Nyang: gi dab khyoo: yo" vang loo" bye: nghoid loug we' nyang: gi nya: zoem" tunggung moo: nyhed nyid" nyid ca" wa zi ngheid. <sup>9</sup>Nyhed nyid" ju" lang" nyang: gi nya: vhuloem- nhoid mei:- myo, mei: yo' gung moo dab da" gootu: shoemoug" dangain" ri nyham" pyam wa zi ngheid. Nyang: gi nya: byimi ri cid" lho: gung cid" wa zi

ngheid. Hau: thang: nyang: gi thung" khyo" younglho' bye:.

<sup>10</sup>Shed nyid" ein: nyid" ri nyang: gi ce: noo dam abo da" dazain byeung" yang loo: nu" eig du:- yang moo" dadu: yo' zhainloin: xu: yo' lheig to" da" cen: moin" soem: kyen" koo:- zhainloin: xu: daphag ri yu ci: ri" wa zi nghoid. <sup>11</sup>Khainjung phoo gi hau: yug ri we' xoin" joem ri we' ASEING da" zoem" khoug: khyoo: shu" vang loo" wa zi nghoid. <sup>12</sup>Hau: thang: khainjung phoo gi yang loo: nu" dadu: ri xu: daphag yo' dage" yu wigi hau: ziri nyang: gi youg: khyoug" da" xoin" khyo" ngei" byid: wa zi nghoid. Nyang: gi khainjung yi shid re" ASEING ri byid: da" gooki lid jhungshug khyo" shugbyid: wa zi nghoid. <sup>13</sup>Nyang: gi hau: yang nu" ri yooboo khyoid xoin" yo' nghe ngei" xoin" shid re" gougnyhoug ri said da" gyeung" shang: joyoo moo: said wa zi nghoid. Nyang: gi hau: ziri koid ca" da: Ciwim gari: youg: khyoug" da" xoin" gi yooboo khyoid xoin" yhang: ti" nghoid wigi khainjung pho shid re" nghoid nyid ziyo' gye" gyeung" shang: nyid da: <sup>14</sup>Khainjung phoo gi yang nu" mo suid" dayham" ri yu wigi hau: suid" ri thung" khyo" younglho' bye: ga: tid fu" byid: bye: su: da" lo, yo shoid nukhyab thang: moo: we' lo, yo shoid lo, moo" cam" moo we' lo, yo shoid khyid: moo" cam" moo we' joid byid: wa zi nghoid. <sup>15</sup>Khainjung phoo gi zhainloin: xu: dayham" ri nya: lo, kung" shoid lo, voo: khoug: moo: foid yu wigi <sup>16</sup>hau: jang" moo lo, yo shoid lo, nyhoug" danyhoug" doin joem lho: ASEING shidkhoin" hau: joyoo moo: nyhed lheing: peig zhain gyoin: wa zi nghoid. <sup>17</sup>Nyang: gi nya: lo, voo: khoug: moo bo da" xu: dayham" yo' yang nu" mo suid" dayham" ri thung" khyo" younglho' bye: ga: tid fu" byid:

bye: su: da" lo, yo shoid nukhyab thang: moo we' lo, yo shoid lo, moo" cam" moo we' lo, yo shoid khyid: moo" cam" moo we' joid byid: wa zi nghoid. <sup>18</sup>Nyang: gi nya: lo, voo: khoug: moo bo da" zhainloin: xu: deing gu: ri yu wigi hau: yug da" vhuloem moo foid gyoin: byid: wa zi nghoid. Hid khyo" wigi nyang: gi thung" khyo" kyeing sain khyoo: ri koid bye: zi nghoid.

<sup>19</sup>Hau: thang: khainjung phoo: gi yooboo khyoid xoin" ri ngei" byid: wigi thung" khyo" kyeing" sain khyoo: ri koid wa zi nghoid. Hau: zi bain thang: ri nyang: gi nghe' ngei" xoin" khyo" gougnyhoug ri said wa zi nghoid. <sup>20</sup>Houg loug hau: ziri shivoo: xoin" yo' dage" phoin: tho' moo: ngei" byid: wa zi nghoid. Hid: su" khyo" wigi khainjung phoo gi thung" khyo" kyeing" sain khyoo: ri koid wa zi nghoid lho: hau: yug we' thung" khyo" younglho' bye: zi nghoid.

<sup>21</sup>Nghoid loug we' hau: yug gi myung yoomo hau: joem ayo" thu loo: nghoid rigi nyang: gi nya: da" kyeing" sain moo" shid re" nya: youg: khyoug" xoin" ein: da" yang loo: nu" dadu: ri khainjung pho shid re" ASEING jang" khyoo: gooki lid xoin" khyo" ci: ri" wa zi nghoid. Nyang: gi shivoo: xoin" khyo" zhainloin: xu: lheig to" da" cen: moin" dakyen" jain" yo' zhainloin: xu: daphag ri za: ci: ri" wa zi nghoid. <sup>22</sup>Nyang: gi yooboo khyoid xoin" shid re" dadu: yo' nghe' ngei" xoin shid re" dadu: khyo" pheing" kyoug" eig du: anghoid lang" jid: u: eig du: ri we' ci: ri" wa zi nghoid. <sup>23</sup>Nya: da" kyeing" sain pyam thang: shed nyid" ein: nyid" ri nyang: gi hau: joem ri zoem" akhoug: mo khainjung pho jang" khyoo: ci: yhi: wa zi nghoid. <sup>24</sup>Khainjung phoo gi yang nu" yo' zhainloin: xu: ri yu wigi khainjung pho shid re" ASEING ri

byid: da" gooki lid jhungshug khyo" hau: joem ri shugbyid: wa zi nghoid. <sup>25</sup>Nyang: gi yang nu" ri said wigi suid" dayham" ri yu lho: hau: ziri hau: yug da" lo, yo shoid nukhyab thang: moo: we' lo, yo shoid lo moo" cam" moo: we' lo, yo shoid khyid: moo" cam" moo: we' joid byid: wa zi nghoid. <sup>26</sup>Khainjung phoo: gi xu: dayham" ri nya: lo, kung" lo, voo: moo: kaid wigi <sup>27</sup>Hau: ziri lo, yo lo, nyhoug" yo' ASEING shidkhoi" moo nyhed lheing: peig zhain' gyoin: wa zi nghoid. <sup>28</sup>Nyang: gi xu: dayham" ri yu wigi suid" ri joid byid: yhang: ti" hau: yug da" lo, yo nukhyab thang: moo: we' lo, yo lo, moo" cam" moo: we' lo, yo khyid: moo" cam" moo: we' joid byid: wa zi nghoid. <sup>29</sup>Lo, voo: mo xu: deing gu: ri hau yug da" vhuloem moo: foid khyo byid: wa zi nghoid. Hid: khyo" wigi thung" khyo" kyeing" sain khyoo: ri koid wa zi nghoid. <sup>30</sup>Hau: thang: nyang: gi pheing" kyoug" dadu: anghoid lang" jid: u: dadu: ri <sup>31</sup>yooboo khyoid xoin" khyo" wigi goodu: rigi shivoo: xoin" yo' dage" nghe ngei" xoin" khyo" ngei" byid: wa zi nghoid. Hid khyo" wigi khainjung phoo gi thung" khyo" kyeing" sain khyoo: ri koid wa zi nghoid. <sup>32</sup>He: zigi manggam no da" byu dayug shid re" tarha" nghoid. Nghoid loug we' nya: kyeing" sain moo" shid re" eung: da" xoin" ri ayo" byid: bang: ca" da" tarha" nghoid.

### Yhoem: Joem Mo Mhoug" Jung"

<sup>33</sup>ASEING gi Moshe yo' Arun ri <sup>34-35</sup>vhoo: moo: tid to" da" mhoug" jung" to' da" yhoem: joem yo' sen: wigi tarha" ri byid: bye:. (He: zigi nyangnu" seing: da" mougmyid khyo" ASEING gi nyangnu" ri byid: bye: da" Khanan moug: khyoo: Israela byumyu" yi vang lo" thang: ri byid: zi nghoid.) Nyang: tu: nya: yhoem: moo: mhoug" jung" ri

myang da" hang" nghoid loug we' yhe: wigi hau: khyoo: ri khainjung phoo ri tid kyoo" ca" zi nghoid. <sup>36</sup>Khainjung phoo gi mhoug" jung" ri ayhe: yu" shi" uri yhoem: khoug: mo zi ja: khang" moo" ri vu, thu pyam wa shid re" amyeing" byid: wa zi nghoid. Hougsu" anghoid lang" yhoem: khoug: mo zi ja: khang" moo" gi ayung" alho' ga: tid fu" wa zi nghoid. Hau: thang: nyang: gi yhoem: khyoo: yhe: wigi <sup>37</sup>mhoug" jung" ri yhe: joeb ca: yu" wa zi nghoid. Hau: zigi nyoug nyoug anghoid lang" ni ni wim wigi pyiyam moo zo: vang lo" nghoid rigi <sup>38</sup>nyang: gi hau: yhoem: mo thu wigi nyhed nyid" byeung" sho' khoem" soo" so" too" wa zi nghoid. <sup>39</sup>Nyhed nyid" ju" lang" nyang: doem tau" lo wigi hau: ziri doem joeb ca: yu" wa zi nghoid. Hau: mhoug" jung" je: jo, nghoid rigi <sup>40</sup>Nyang: gi mhoug" jung" dab da" lug boem joem ri yu wigi vooomoo" tunggung ayung" alho' da" joyoo moo: yhe: she: pyam wa shid re" amyeing" byid: wa zi nghoid. <sup>41</sup>Hau: thang: nyang: gi yhoem: akhoug: shoid pyiyam joem ri khyeug khyo' pyam wigi byilaid aphei" joem ri we' vooomoo" tunggung ayung" alho' da" joyoo moo: yhe: boem too" wa zi nghoid. <sup>42</sup>Hau: thang: gootu: lugboem joem ri yu pyam bye: da" lugboem joem joyoo moo: doem thid kaid wigi byilaid aseig ri ci: wigi pyiyam ri doem xi wa zi nghoid.

<sup>43</sup>Hau: yhoem: moo: lugboem joem ri we' yu pyam lho: yhoem: ri we' khyeug pyam wigi byilaid doem tab pyam thang: ri mhoug" jung" dalheing doem to re" nghoid rigi <sup>44</sup>khainjung phoo yhe: yu" wa zi nghoid. Hau: zi je: lo nghoid rigi yhoem: gi ayung" alho' nghoid da:. <sup>45</sup>Hau: yhoem: ri phyo' pyam wigi houg mo lugboem joem seig pyi" joem yo' byilaid phei" joem

ri voomoo" tunggung shoid ayung" alho' da" joyoo moo: yhe: de" pyam ca" wa zi nghoid. <sup>46</sup>Hau: yhoem: ri khoem soo" so" to" uri vang lo" da" su: hang" nghoid loug we' myen" thang: ju" sho' ayung" alho' nghoid da:. <sup>47</sup>Hau: yhoem: khoug: moo: jhang" jo, anghoid lang" zoo: noem zo: da" hang" nghoid loug we' nya: byimi ri cid" pyam ca" wa zi nghoid.

<sup>48</sup>Yhoem: ri byilaid yo' doem nyheing pho: pyam thang: khainjung yhe: yu" uri mhoug" jung" atoo' loo: yoomo nyang: gi hau: yhoem: ri thung" khyo" younglho' bye: ein: tid fu" wa zi nghoid. Ciwim gari mhoug" jung" ri bain sho' yu pyam bye: da:. <sup>49</sup>Hau: yhoem: ri kyeing sain' pyam wa shid re" nyang: gi ngho' eig du:- shamu jab dajhi- khyeing: ni yo' pagyoem dakyang: ci: ri" wa zi nghoid. <sup>50</sup>Nyang: gi ngho' dadu: ri gyid gyeing: kaid to" da" myidzhoo" jarung: adang moo: said wa zi nghoid. <sup>51</sup>Hau: thang: nyang: gi shamu jab-pagyoem- khyeing: ni yo' dei da" ngho' ri yu lho: gyid gyeing: moo: said kaid to" da" ngho' suid" moo doin: joem wa zi nghoid. Houg lho: hau: yhoem: moo nyang: gi nyhed lheing: peig zhain' gyoin: wa zi nghoid. <sup>52</sup>Hid su" wigi nyang: gi ngho' suid"- gyid gyeing:- ngho' dei- shamu jab- pagyoem kyang:- khyeing: ni yo' wigi yhoem: ri kyeing sain khyoo: koid wa zi nghoid. <sup>53</sup>Hau: thang: nyang: gi ngho' dei du: ri voomoo" tunggung shoid pa: dain" khyoo: yhe: nhang: kaid wa zi nghoid. Hid su" khyo" wigi nyang: gi yhoem: shid re" thung" khyo" kyeing" sain khyoo: ri koid wa zi nghoid lho: hau: zigi thung" khyo" younglho' wa zi nghoid.

<sup>54</sup>He: tarha" joem gi manggam aja ja: <sup>55-56</sup>dam joid joem byeing joem

anghoid lang" ne yam: lo da" dam joem yo' byimi joem anghoid lang" yhoem: moo: to' da" mhoug" jung" joem yo' sen: zi nghoid. <sup>57</sup>He: tarha" joem yo' wigi daja: ja: ri younglho' ziyu' ayung" alho' zi ein: myid phyed byid: wa zi nghoid.

### Gung Mo Yau Thu' Lo Da" Ayung" alho' Zi

**15** ASEING gi Moshe yo' Arun ri <sup>2</sup>Vhoo: moo: tid to" da" Israela byumyu" yi shid re" thung" ri: joem ri byid: too" bye:. Yuggi dayug gi nya: da" yuggi alhoo: mo ayeing thu uri hau: ayeing gi ayung" alho' nghoid da:. <sup>3</sup>Hau: yuggi alhoo: mo ayeing atheing: thu nyid loug we' anghoid lang" theing: byug loug we' ayung" alho' nghoid da:. <sup>4</sup>Nyang: yhoeb da" joyoo-zhung: da" joyoo dangain" gi ayung" alho' bue" da:. <sup>5</sup>Nya: yhoeb yoo moo: byu dayug yug zang" tain"- <sup>6</sup>anghoid lang" hau: yug zhung: bye: daja: ja: moo zang" zhung: su: gi nya: byimi ri cid" pyam lho: gung we' cid" pyam ca" wa zi nghoid. Nyang: gi myen" thang: ju" sho' ayung" alho' nghoid da:. <sup>7</sup>Dayug yug gi ayeing thu nyid da" su: ri zang" tain" rigi nya: byimi ri cid" pyam lho: gung we' cid" pyam ca" wa zi nghoid. Nyang: gi myen" thang: ju" sho' ayung" alho' nghoid da:. <sup>8</sup>Thung" khyo" younglho' bye: da" byu dayug da" atho' moo: ayeing thu da" byu dayug da" shakain" zang" gyoin: nghoid rigi hau: yug gi nya: byimi ri cid" pyam lho: gung we' cid" pyam ca" wa zi nghoid. Nyang: gi myen" thang: ju" sho' ayung" alho' nghoid da:. <sup>9</sup>Ayeing thu da" su: zhung: da" myang: too: yo' zhungtang gi ayung" alho' nghoid da:. <sup>10</sup>Hau: yug zhung: da" jonu" ce: ja: moo: nghoid nghoid zang" tain" da" su: hang" nghoid loug

we' myen" thang: ju" sho' ayung" alho' nghoid da:. Hau: yug zhung: da" jonu" ce ja: ri nghoid nghoid yu su: gi nya: byimi ri cid" lho: nya gung we' cid" ca" wa zi nghoid. Nyang: gi myen" thang: ju" sho' ayung" alho' nghoid da:. <sup>11</sup>Foid yeing thu da" yug gi lo, xang: shi" acid" loo: za: dayug yug ri zang" tain" nghoid rigi hau: yug gi nya: byimi ri cid" lho: nya: gung we cid" wa zi nghoid. Nyang: gi myen" thang: ju" sho' ayung" alho' nghoid da:. <sup>12</sup>Nyang: zang" tain" da" myidzhoo" oug" kha: loem: nghoid nghoid baid kho' pyam ca" lho: nyang: zang" tain" da" seig jarung kha: loem: nghoid nghoid cid" pyam ca" wa zi nghoid.

<sup>13</sup>Byu hau: yug gi nya: ayeing thu dam ri byang" pyam thang: ri nyang: gi nyhed nyid" lang" ca" wa zi nghoid. Hau: thang: nya: byimi ri cid" wigi nyang: we' gyid gyeing: lang moo: gung cid" ca" wa zi nghoid. Houg: lang" nyang: gi thung" khyo" younglho' bye: zi nghoid. <sup>14</sup>Shed nyid" ein: nyid" ri nyang: gi pheing" khoug" eig du: anghoid lang" jid: u: eig du: ri ASEING da" shidkhein" zoem" khoug: khyoo: ci: re" wigi hau: ziri khainjung lo, moo: ab byid: wa zi nghoid. <sup>15</sup>Khainjung phoo gi ngho' dadu: ri yooboo khyoid xoin" khyo" gootu: dadu: ri myi: nghe' xoin" khyo" bo ngei" byid: wa zi nghoid. He khyoo: khyo" nyang: gi hau: yug da" shid re" thung" khyo" kyeing" sain khyoo: ri koid wa zi nghoid.

<sup>16</sup>Yuggi dayug gi myoug: yeing thu lang" nyang: gi gung goin" gung cid" pyam ca" zi nghoid. Nyang: gi myen" thang: ju" sho' ayung" alho' nghoid da:. <sup>17</sup>Myoug: yeing gyo" zang" da" byimi anghoid lang" shooyid yo' koid da" jonu" ce ja: nghoid nghoid cid" ca" wa zi nghoid lho: hau: zigi

myen" thang: ju" sho' ayung" alho' nghoid da:. <sup>18</sup>Yuggi yo' myiyi: gung shoo" xoem" khau: thang: ri gung cid" pyam ca" wa zi nghoid lho: nya: tang: gi myen" thang: ju" sho' ayung" alho' nghoid da:.

<sup>19</sup>Myiyi: dayug gi nya: mi ci: da" ayo, ri nyang: gi nyhed nyid" ayung" alho' nghoid nyid. Nyang: ri zang" tain" da" hang" nghoid loug we' myen" thang: ju" sho' ayung" alho' nghoid da:. <sup>20</sup>Nyang: mi ci: da" ayo, ri zhung: da" jonu" anghoid lang" jhang" da" jonu" ce: ja: nghoid nghoid ayung" alho' nghoid da:. <sup>21-23</sup>Nya: yhoeb yoo moo: anghoid lang" nyang: zhung: da" jonu" ce: ja: moo: nghoid nghoid zang" tain" su: hang" nghoid loug we' nya: byimi ri cid" lho: gung we' cid" ca" wa zi nghoid. Nyang: gi myen" thang: ju" sho' ayung" alho' bue" nyid. <sup>24</sup>Yuggi dayug gi myiyi: myhi' mi ci: da" ayo, ri gung shoo" zoem" khau: nghoid rigi myiyi: myhi' da" ayung" alho' ziyoy' aco' ajhoid bui" nhang: wigi nyhed nyid" ju" sho' ayung" alho' bue" nyid. Hau: yuggi yhoeb da" yhoeb yoo kha: loem: nghoid loug we' ayung" alho' nghoid da:.

<sup>25</sup>Myiyi: myhi' dayug gi nya: mi ci: da" ayo, lid thang: ri suid" shoin: nyid shi" anghoid lang" lhung bue" ayo, tho' lid lho: shoin: nyid nghoid rigi nyang: suid" xo' shoin: nyid da" ayo, dangain gi mi ci: da" ayo, yhang: ti" nyang: ayung" alho' bue" nyid. <sup>26</sup>Nyang: jhang" da" yhoeb yoo kha: loem: nghoid nghoid yo' nyang: zhung: da" jonu" kha: ja: nghoid nghoid hau: yo, dangain" moo: ayung" alho' bue" nyid. <sup>27</sup>Hau: ziri zang" tain" da" hang" nghoid loug we' ayung" alho' nghoid da:. Nyang: gi nya: byimi ri cid" lho: nya: gung ri we' cid" ca" wa zi nghoid. Nyang: gi myen" thang:



ju" sho' ayung" alho' nghoid nyid.  
<sup>28</sup>Nyang: suid" shoin: zi theing: thang:  
 ri nyhed nyid" ju" sho' lang" ca" wa zi  
 nghoid. Hau: thang: nyang: gi thung"  
 khyo" younglho' bye: da:. <sup>29</sup>Shed nyid"  
 nyid" ri nyang: gi pheing" kyoug" eig  
 du: anghoid lang" jid: u: eig du: ri  
 ASEING shidkhoin" Zoem" akhoug: mo  
 khainjung pho jang" khyoo: ci: yhi: wa  
 zi nghoid. <sup>30</sup>Khainjung phoo gi ngho'  
 dadu: ri yooboo khyoid xoin" khyo"  
 gootu: dadu: ri myi: nghi' xoin" khyo"  
 ngei" byid: wa zi nghoid. He: khyoo:  
 khyo" nyang: gi hau: myiyi: myhi' shid  
 re" thung" khyo" younglho' khyoo: ri  
 bo koid wa zi nghoid.

<sup>31</sup>ASEING gi Moshe ri nyangnu" da"  
 dab agung moo: jo, da" nya: shidkhoin"  
 Zoem" ri aco' ajhoid akoid pyam wa  
 shid re" nyangnu" da" ayung" alho'  
 khyoo: yo' sen: lho: Israela byumyu"  
 yiri tid poin" wa shid re" tid da:.  
 Nyangnu" hau: Zoem" moo aco' ajhoid  
 koid nghoid rigi said pyam shoug" wa  
 zi nghoid.

<sup>32</sup>He: thung" ri: joem gi ayeing yau  
 da" yuggi phoo anghoid lang" myoug;  
 yeing thu da" yuggi phoo- <sup>33</sup>mi ci: da"  
 myiyi: myhi' anghoid lang" thung"  
 khyo" ayung" alho' da" myiyi: myhi'  
 yo' gung shoo" zoem" khau: da" yuggi  
 yo' sen: da" thung" ri: joem nghoid.

**Young: Noo Yooboo Shang:  
 Byid: Bidnyid**

**16** Arun da" nya: yuggi zo: tang:  
 ASEING ri agyeungshang: da"  
 myi: shugbyid: uri said pyam shau"  
 yoomo shid: lo" thang: ri ASEING gi  
 Moshe ri dang: tid bye:. <sup>2</sup>Nyang: gi  
 «Re" mang: Arun ri ge eung: da" ayo,  
 moo za: hau: gyeung" shang: thang  
 da" joyoo yab khyo' pain" ruang:  
 nungthang khyoo: nyang: yhi: wa shid

mo tid kyoo" we'. Ciwim gari: ngoo gi  
 hau: joyoo moo Dang: Theing Kuid:  
 amyhid" dang mo jhoemmoug" khoug:  
 moo: nga" gung ri thu shug wa yoomo  
 nghoid. Nyang: atam" gyo nghoid  
 rigi said pyam shoug" wa zi nghoid.  
<sup>3</sup>Nyang: gi hau gyeung" shang: thang  
 da" joyoo khyoo: yooboo khyoid xoin"  
 shid re" nuloo: bam: dadu: yo' nghe'  
 ngei" xoin" shid re" yang loo: dadu:  
 ri she: re" thang: ri za: hau: gyeung"  
 shang: thang da" joyoo khyoo: ge vang  
 loo" wa zi nghoid ein: tid kyoo" we»  
 ga: tid.

<sup>4</sup>Hau: thang: ASEING gi vho: moo:  
 tid to" da" jhoug" shid dang: ri byid:  
 too" bye:. Arun gi gyeung" shang:  
 thang da" joyoo khyoo: vang loo" wa  
 shid mo:- nyang: gi gung cid" lho:  
 khainjung void byi: void mi nghoid  
 da" zin: yung" pain" byisheing:- zin:  
 yung" lhoo" dung:- phyid" cu" yo'  
 vhu" thoeb joem ri yu void ca" wa zi  
 nghoid.

<sup>5</sup>Israela shava byu yigi Arun ri  
 yooboo khyoid xoin" shid re" coidbaid  
 loo: eig du: yo' nghe' ngei" xoin" shid  
 re" yang loo: dadu: ri ci ri" byid: wa  
 zi nghoid. <sup>6</sup>Nyang: gi nuloo: dadu: ri  
 nyang: nya: yooboo yo' nya: yhoem:  
 byu yooboo joem ri yu pyam byid: wa  
 shid re" xoin" khyo" shugbyid: wa zi  
 nghoid. <sup>7</sup>Hau: thang: nyang: gi hau:  
 coidbaid eig du: ri ASEING shidkhoin"  
 Zoem" khoem" duang: khyoo: she:  
 vang loo" wa zi nghoid. <sup>8</sup>Houg moo:  
 dacab gi ASEING shid re" ga: gootu:  
 dacab gi Azazela shid re" ga: xoem"  
 to" da" lugboem eig loem: ri ci: lho:  
 me" lab wa zi nghoid. <sup>9</sup>Arun gi ASEING  
 shid re" ga: me" lab lho: khyen: yu da"  
 coidbaid ri yooboo khyoid xoin" khyo"  
 ngei" byid: zi nghoid. <sup>10</sup>Azazela shid  
 re" khyen: to" da" coidbaid dadu: rigi

dei zi nyang: ASEING ri shugbyid: wigi shava byu yi da" yooboo joem ri yu pyam byid: wa shid re" Azazela jhang dain" pyoid yoo khyoo: nhang: kaid wa zi nghoid.

<sup>11</sup>Arun gi nuloo: ri nyang: yo' nya: ikoin deungkhu: byu yi shid re" yooboo khyoid xoin" khyo" ngei" byid: uri <sup>12</sup>Nyang: gi myioug" phain daloem: moo: phoin: dang mo myi: gyeong" da" myigyuu: joem byeung" sho' kaid yu lho: houg moo ge da" nam pyo: ja: lo, eig zhoeb kaid wigi gyeong" shang: thang da" joyoo khyoo: ci: yhi: wa zi nghoid. <sup>13</sup>Nyang: gi hau: ASEING shidkhoin" moo nam pyo: ja: ri nghi' wa zi nghoid wigi hau: nam pyo: ja: da" myikhoug" gi Dang: Theing Kuid: amyhid" ri go too" byid: wa zi nghoid yoomo nyang: gi hau: ziri ashau" myang ziyo' ashid: wa zi nghoid. <sup>14</sup>Nyang: gi nuloo: suid" dayham" ri yu lo wigi hau: amyhid" da" shidkhoin" moo: nya: lo, nyhoug" wigi peig zhain' gyoin wa zi nghoid. Hau: thang: suid" dayham" ri Dang: Theing Kuid: shidkhoin" moo nyhed lheing: peig zhain' gyoin: wa zi nghoid.

<sup>15</sup>Hau: thang: ri nyang: gi byumyu" yi shid re" yooboo khyoid xoin" khyo" coidbaid ri said lho: hougmo suid" joem ri gyeong" shang: thang joyoo khyoo: ci: vang lo" wigi hau: ziri amyhid" dang moo: lo" peig zhain' gyoin: wa zi nghoid. Hau: thang: Dang: Theing Kuid: shidkhoin" moo we' nulo: suid" ri nyang: koid bye: yhang: ti" koid wa zi nghoid. <sup>16</sup>He: khyoo: khyo" wigi nyang: gi Israela byumyu" yi da" ayung" alho' jang" mo we' nyangnu" da" yooboo mo we' thung" khyo" younglho' pyam wa shid re" gyeong" shang: thang joyoo moo: nyang: koid wa zi nghoid. Nyang: gi hau: ziri Zoem" khoug: moo: koid wa

zi nghoid. Ciwim gari: hau: Zoem" gi dab agung moo: jo' yoomo nghoid lho: hau: zigi thung" khyo" ayung" alho' nghoid da:. <sup>17</sup>Thung" khyo" younglho' pyam moo" zoo" ri koid wa shid re" gyeong" shang: thang yab khyoo: Arun vang lo" da" ayo, mo zi nyang: doem thu re" da" ayo, ju" sho' Zoem" khoug: moo: hang" we' age nyid nyid nghoid da:. Nyang: gi nyang: nya: shid re" nya: yhoem: byu shid re" yo' shava byu yi shid re" thung" yo' sen: da" moo" ri bain koid lang" <sup>18</sup>nyang: gi nghe' ngei" xoin" ngei" byid: wa shid re" phoin: khyoo: thu yhe: lho: hau: ziri younglho' byid: wa zi nghoid. Nyang: gi nuloo: suid" dayham" yo' coidbaid suid" dayham" ri yu lho: phoin: jhoin: mo zeing vhu" joem moo: joid ca" wa zi nghoid. <sup>19</sup>Nyang: gi nya: lo, nyhoug" yo' suid" dayham" ri phoin: tho' moo: nyhed lheing: peig zhain' gyoin: ca" wa zi nghoid. He: khyoo: khyo" wigi nyang: gi Israela byumyu" yi da" yooboo mo phoin: ri younglho' pyam wigi hau: ziri gyeong" shang: nhang: wa zi nghoid.

### Yooboo thid Voin Byid: Da" Coidbaid

<sup>20</sup>Arun gi gyeong" shang: thang da" joyoo ASEING da" shidkhoin" Zoem" mo deing da" gu: yo' phoin: ri thung" khyo" younglho' khyoo: bain koid lang" nyang: gi Azazela shid re" khyen: to" da" dei da" coidbaid ri ASEING jang" moo shugbyid: wa zi nghoid. <sup>21</sup>Nyang: gi nya: lo, eig lo, goin" ri coidbaid da" vhuloem tho' moo ke" wigi akhyeing" ashoeb da" zi: yooboo joem yo' Israela byumyu" yi da" goem lau to' da" khyoo: dangain" ri hau: coidbaid da" vhuloem tho' moo: tid yhen: yu wa zi nghoid. Hougsu" khyo" wigi hau: joem ri coidbaid da" vhuloem khyoo: tid

foin: pyam wa zi nghoid. Hau: thang: coidbaid rigi soin" to" da" yug wigi dain" pyoid yoo khyoo: yhe: khaid kaid wa zi nghoid. <sup>22</sup>Coidbaid gi byu anyid mung" khyoo: nyang: yo' dage" nyangnu" yooboo dangain" ri voin yhe: loo" wa zi nghoid.

<sup>23</sup>Hau: thang: Arun gi zoem khoug: khyoo: vang yhe: wigi hau: gyeung" shang: thang da" joyoo khyoo: vang loo" wa shid vhu" moo: void ci: da" khainjung byimi ri khyoid pyam lho: hougmo: too" khoo' wa zi nghoid.

<sup>24</sup>Nyang: gi gyeung" shang: joyoo moo: gung cid" pyam wigi nya: byimi doem void wa zi nghoid. Hau: thang: nyang: thu lo" wigi nyang: nya: yooboo yo' hau: byumyu" yi da" yooboo yu pyam wa shid re" nghe' ngei" xoin" ri shugbyid: wa zi nghoid.

<sup>25</sup>Nyang: gi yooboo khyoid xoin" shid re" gougnyhoug xu: ri phoin: tho' moo: nghe' ngei" wa zi nghoid. <sup>26</sup>Coidbaid ri Azazela shid re" dain" pyoid yoo khyoo: yhe: koin" kaid da" yug gi dab khyoo: avang loo shi" uri nya: byimi yo' nya: gung ri cid" ca" wa zi nghoid.

<sup>27</sup>Suid" khyo" yooboo ri yu pyam byid: wa shid re" gyeung" shang: thang joyoo khyoo: yooboo khyoid xoin" ngei" byid: wa shid re" ci: da" nuloo: yo' coidbaid ri dab tunggung khyoo: dang yhe: lho: shooyid- shoogi- vu: joem dangain" ziri nghe' pyam wa zi nghoid. <sup>28</sup>Hau: joem ri nghe' su: gi dab khyoo: atau" loo shi" ri nya: byimi yo' nya: gung ri cid" pyam ca" wa zi nghoid.

**Young: Noo Yooboo Shang: Byid: Bidnyid Ri: Cang Nyid Ca" Khyoo:**

<sup>29</sup>Vhoo: moo: tid to" da" thung" ri: joem gi ju" loo wa da" ayo, akhyeing: dangain" moo: cang yhe: nyid ca" da" khyoo: joem nghoid. Lhammoo" nyhed

khyab daxi nyid" ein: nyid" ri Israela byumyu" yi yo' nyangnu" akhoug: moo: nyid da" tungbau byumyu" yigi zooshug jang" pyam ca" ziyoy' ce" moo" we' age koid wa zi nghoid. <sup>30</sup>Hau: nyid" ri nyangnu" gi nyangnu" da" yooboo dangain" ri younglho' pyam wa shid re" thung" ri: cang lho: koid ca" ago". Houg: lang" nyangnu" gi thung" khyo" younglho' bang: bue" loo wa zi nghoid.

<sup>31</sup>Hau: bidnyid gi gye" gyeung" shang: yoomo nyangnu" yugkhang" moo" gi zoo: noem jang" lho: danyid" goin" moo" age zei: nghoid da:. <sup>32</sup>Nya: pho khoo: moo: aya: xo' kham: yu wa shid re" shugbyid: to" wigi nyeing" za: lo, ki" byid: zi: kham yu to" da" khainjung moo" gi thung" khyo" younglho' pyam khyoo: ri koid wa zi nghoid. Nyang: gi khainjung void byi: void mi ri void wigi <sup>33</sup>gyeung" shang: thang da" joyoo- ASEING shidkhoin" Zoem" khoug: mo deing da" joyoo-phoin:- khainjung yi yo' shava byu yi dangain" ri younglho' pyam wa shid re" thung" yo' sen: khyoo: ri koid wa zi nghoid. <sup>34</sup>He: thung" ri: joem gi ju" loo wa da" ayo, akhyeing: dangain" moo: cang nyid ca" da" khyoo: joem nghoid. Israela byumyu" yi nyangnu" da" yooboo dangain" ri kyeing sain pyam byid: wa shid re" hau: thung" yo' sen: da" khyoo: ri dazain dalheing: koid ca" ago" da:. Houg: yoomo Moshe gi ASEING amyeing" byid: to" ziyoy' dayhang: ti" koid bye:..

**Young" Gyeing" Da" Suid"**

**17** ASEING gi Moshe ri <sup>2</sup>Arun yo' nya: yuggi zoo: yi yo' Israela byumyu" yi dangain" ri vhoo: moo: tid to" da" thung" ri: joem ri byid: wa shid re" amyeing" byid: bye:. <sup>3-4</sup>Israela byu dayug yug gi ASEING zoem" khoem" duang: mo lid lho: gootu: moo ASEING

ri ngei" byid: da" xoin" khyo" nu: anghoid lang" yang anghoid lang" coidbaid ce: ja: ri nghoid nghoid said nghoid rigi tarha" ri shoid zi nghoid abye:. Nyang: gi suid" shoin: nhang: bye: su: nghoid bye: yoomo nyang: ri ASEING da" byu dayug khyo" myid jhoo: byid: loo: wa zi anghoid. <sup>5</sup>He: amyeing" dang: da" dang: kang: gi Israela byumyu" yigi nyangnu" pa: dam moo: lhung said da" gougnyhoug joem ri akhid" ASEING jang" khyoo: ci: ri" goo" wa shid re" nghoid. Akhid" nyangnu" gi hau: joem ri zoem" khoem" duang: mo khainjung phoo jhang ci: re" wigi hau: joem ri zoem" khau: xoin" khyo" said wa zi nghoid. <sup>6</sup>Khainjung phoo gi suid" ri zoem" khoem" duang: mo phoin: yam cang foid khyo' wa zi nghoid wigi ASEING vho: ngei da" shoem: thu nhang: wa khyo" xu: ri nghe' wa zi nghoid. <sup>7</sup>Coidbaid yu joem ri xoin" ngei" byid: khyo" jang: pa: cang nyangnu" ri gougnyhoug said zo: da" khyo" Israela byumyu" yigi ASEING ri dang: azung" loo: khanham we' age koid loo: go" wa. Israela byumyu" yigi he: thung" ri: joem ri ju" loo wa da" ayo, akhyeing: dangain" mo: cang pyeing yhi: ca" wa zi nghoid.

<sup>8-9</sup>Zoem" khoem" duang: mo lid lho: gootu: da" joyoo moo: ASEING ri ngei" byid: wa shid re" nghe' ngei" xoin" anghoid lang" gootu: xoin" ri ngei" byid: da" Israela byumyu" anghoid lang" hau: shava phung: moo: nyid nyid da" tungbau byu hang" ri nghoid loug we' Mangso byu dayug khyo" myid jho: yu loo: zi anghoid.

<sup>10</sup>Israela byu anghoid lang" Israela phung: moo: nyid nyid da" tungbau byu dayug yug gi shoo" moo suid" bo jo, shi" ziri zo: nghoid rigi ASEING

gi nyang: ri thoughteung wigi nya: byumyu" khyo" myid jhoo: byid: loo: wa zi anghoid. <sup>11</sup>Dei noem dangain" da" kangso' gi suid" moo bo wigi ASEING gi byumyu" yi da" yooboo joem ri yu pyam wa shid re" suid" joem dangain" ri phoin: dang moo: zhain: khyo' pyam wa da" amyeing" byid: too" bye:. Kang so' nghoid da" suid" gi yooboo ri yu pyam byid: da:. <sup>12</sup>Hougsu" yoomo Israela byumyu" yi yo' nyangnu" moo nyid da" tungbau byumyu" yigi suid" boo shi" da" shoo" ri age zoo: wa khyoo: ri Israela byumyu" yiri ASEING tid to" zi nghoid.

<sup>13</sup>Israela byu anghoid lang" Israela byumyu" yi phung: moo: nyid da" tungbau byu dayug yug gi thung" khyo" younglho' da" gougnyhoug anghoid lang" ngho' dadu: du: ri shau" myheig yu nghoid rigi nyang: gi hau: suid" ri myidgung khyoo: zhain: khyo' pyam wigi hau: ziri pheihoung: yo' shoem" nghoeb pyam wa zi nghoid. <sup>14</sup>Dei noem dangain" da" kangso' gi suid" moo bo wigi nyangnu" gi suid" boo shi" da" shoo" ce: ja: ri we' age zoo: wa zo: da" yug hang" nghoid loug we' nya: byumyu" dayug khyo" myid soin: byid: wa zi anghoid khyoo: ri ASEING gi Israela byumyu" yiri tid too" bye: zi nghoid.

<sup>15</sup>Nyang: kyeing" shid: da" gougnyhoug shoo" ri anghoid lang" siyoo gougnyhoug wigi ngaid said da" gougnyhoug shoo" ri zo: da" Israela byumyu" anghoid lang" tungbau byumyu" hang" nghoid loug we' nya: byimi yo' nya: gung ri cid" pyam ca" wa zi nghoid lho: nyang: gi thung" khyo" younglho' wa shid re" myen" thang: ju" sho' lang" ca" wa zi nghoid. <sup>16</sup>Nyang: hougsu" akoid nghoid rigi

hau: akyu" dam ri shau" kham zoo:  
wa zi nghoid.

**Gung Shoo" Zoem" Khoug:**

**Khyoo: Yo' Sen: Wigi:**

**Toem' To" Da" Khyoo:**

**18** ASEING gi Moshe ri <sup>2</sup>Israela byumyu" yiri tid wa shid re" «Ngoo gi nanu" ASEING Mangso nghoid. <sup>3</sup>Nanu" nyid kho' da" Egutu mung" mo byumyu" yi da" avoid asam" joem ri we' anghoid lang" akhid" ngoo nanu" ri shu" yhe: lo" nyid da" Khanan mung" moo nyid byumyu" yi da" avoid asam" joem ri we' acang koid goo". <sup>4</sup>Nga" tarha" joem ri tam" gyo: wigi nga" amyeing" dang: ri cang koid we'. Ngoo gi nanu" ASEING Mangsoo nghoid. <sup>5</sup>Ngoo nanu" ri byid: to" da" moo" yo' tarha" joem ri cang koid nyid ge'. Hougsu" koid khyo" wigi nanu" gi nanu" da" kangso' ri khyoid yu wa zi nghoid. Ngoo gi ASEING nghoid» ga: tid.

<sup>6</sup>ASEING gi vho: moo: tid to" da" thung" ri: joem ri byid: too" bye:. Nanu" da" bidnoem seing" cang" yi kha: yug yo" we' gung shoo" zoem" khoug: khyoo: akoid goo". <sup>7</sup>Nanu" nya: myhi' yo' gung shoo" zoem" khoug: khyo" wigi nanu" nya: phoo ri sho' aphu" nhang:- nanu" gi nanu" nya: myhi ri sho' ayo" phu" nhang: wa zi nghoid. <sup>8</sup>Nanu" nya: pho da" myhi nhung" yi yo' nanu" gung shoo" zoem" khoug: khyo" wigi nanu" nya: phoo ri sho' aphu" nhang:. <sup>9</sup>Nanu" nhammoo" yo' anghoid lang" dayhoem mo kyeing" nyid gyi: lo su: nghoid nghoid goo" yhoem: yhoem: mo nyid gyi: re" da" pho shoid mo myiyi: zoo: anghoid lang" myhi' shoid mo myiyi: zoo:

yo' gung shoo" azoem" khoug: goo". <sup>10</sup>Nanu" myid: zoo: myiyi: nu" yo' gung shoo" azoem" goo". Hau: zigi nanu" ri sho' phu" nhang: da" moo" nghoid da:. <sup>11</sup>Dakhoem" mo kyeing" anghoid da" nhammoo" yi yo' gung shoo" azoem" khoug: goo". Nyang: gi nanu" nhammoo" nghoid da:. <sup>12-13</sup>Nanu" nya: pho da" nya: nhung" nya: nid anghoid lang" nanu" nya: myhi' nya: nhung" yo' gung shoo" azoem" khoug: goo". <sup>14</sup>Nanu" nya: laid da" yhoem: seing myhi' yo' gung shoo" azoem" khoug: goo". Nyang: gi nanu" nya: laid nyang: nghoid nyid. <sup>15</sup>Nanu" nya: du moo" yo' <sup>16</sup>Anghoid lang" nanu" nya: mang: nya: myi: yo' gung shoo" azoem" khoug: goo". <sup>17</sup>Nanu" nya: zoo: myiyi: nu" yo' gung shoo" azoem" khoug: goo" anghoid lang" nanu" yo' gung shoo" zoem" goo" bye: da" myiyi: myhi' da" nya: myid: myiyi: nu" yo' gung shoo" azoem" goo". Nyangnu" gi nanu" yo' bidnoem du wigi hau: zigi khoem" boem khyu: da" moo" nghoid. <sup>18</sup>Nanu" nya: yhoem: seing myhi' dadei nyid nyid gi nanu" nya: yhoem: seing myhi' da" nya: bi nya: nhung" ri yhoem: seing myhi' dayug khyo" ayo" yu.

<sup>19</sup>Mi ci: da" ayo, moo: myiyi: myhi' yo' gung shoo" ayo" zoem" khoug: wa. Ciwim gari: nyang: gi thung" khyo" ayung" alho' nghoid da:. <sup>20</sup>Gooyug da" yhoem: seing myhi yo' gung shoo" ayo" zoem" khoug: wa. Hau: zigi thung" khyo" nanu" ri ayung" alho' bui" nhang: da:. <sup>21</sup>Moleg yu phara" ri no' wa jang" moo: ci: wa shid re" nanu" zoo: yi mo dayug ri we' a ab byid: goo". Ciwim gari: hau: zigi ASEING Mangso da" myeing ri

18:5: Neh 9:29; Ezk 18:9; 20:11-13; Luk 10:28; Rom 10:5; Gal 3:12. 18:8: Xng 20:11; Tid 22:30; 27:20.  
18:9: Xng 20:17; Tid 27:22. 18:12-14: Xng 20:19,20. 18:15: Xng 20:12. 18:16: Xng 20:21.  
18:17: Xng 20:14; Tid 27:23. 18:19: Xng 20:18. 18:20: Xng 20:10. 18:21: Xng 20:1-5.

shoem: nhang: zi nghoid. <sup>22</sup>Yuggi nyang: cang" gung shoo" azoem" goo". Mangsoo gi hau: ziri ngheing" nyid. <sup>23</sup>Yuggi nghoid nghoid myiyi: nghoid nghoid gougnyhough yo' gung shoo" azoem" goo". Hougsu" koid zigi nanu" ri thung" khyo" ayung" alho' bui" nhang: zi nghoid.

<sup>24</sup>Hid: yhang: te" moo" zoo" khyo" wigi nanu" nya: gung ri ayung" alho' abui" nhang: goo". Ciwim gari: hid: su" khyo" soolhoo: no' bang: gi nyangnu" nya: gung ri ayung" alho' koid lid loo bye:. Hau: soolhoo: no' bang: gi nanu" aju" shi ri hau: mung" moo: nyid bang: nghoid wigi nanu" yo' vang loo" wa shid re" ASEING gi nyangnu" ri khaid thu nyid da:. <sup>25</sup>Nyangnu" koid da" moo" zoo" gi mung" ri ayung" alho' bui" nhang: yoomo ASEING gi hau: mung" ri dam byid: wigi hougmo: nyid da" byumyu" yiri we' khaid thu' pyam wa. <sup>26-27</sup>Nyangnu" gi he: yu" co' yu" ngheing" tung" da" moo" dangain" ri koid wigi mungdain: ri ayung" alho' bui" nhang: da:. Nghoid loug we' nanu" gi nyangnu" yhang: ti" akoid goo". Israela byumyu" yi anghoid lang" nanu" yo' dage" nyid da" tungbau byumyu" yi dangain" gi ASEING da" tarha" yo' amyeing" dang: joem ri cang yhi: ca" da:. <sup>28</sup>Houg: lang" nanu" shid vhu" moo nyid lid lo" da" soolhoo: no' bang: ri ngeug pyam yhang: ti" hau: mungdain: gi nanu" ri ngeug pyam wa zi anghoid. <sup>29</sup>He: yu" co' yu" ngheing" tung" da" moo" zoo" daja: ja: ri koid da" yug hang" nghoid loug we' nyang: ri Mangso byu dayug khyo" amyid soin: loo: wa ziri nanu" si wa zi nghoid.

<sup>30</sup>ASEING gi «Ngoo byid: da" amyeing" dang: ri phau" myang: cang yhe: wigi

he: mungdain: moo nanu" da" shid vhu" moo: nyid lid lo da" byumyu" yi yhang: ti" acang koid goo". He moo" zoo" daja: ja: ri koid khyo" wigi nanu" nya: gung ri ayung" alho' abui" nhang: goo". Ngoo gi nanu" da" ASEING Mangsoo nghoid» ga: tid.

### Gyeung" shang: ziyoi' Deing Byeing" Da" Tarha" Joem.

**19** ASEING gi Moshe ri <sup>2</sup>Israela shava byu yiri tid wa shid re" «Gyeung" shang: nyid ge'. Ciwim gari: ngoo nanu" ASEING Mangsoo gi gyeung" shang: nyid. <sup>3</sup>Nanu" yugkhang" moo" gi nanu" da" yhed yo' ba" ri phau" myang: nyid ge'. Ngoo amyeing" byid: to" ziyoi' dayhang: ti" Dougno: Bidnyid ri cang nyid ge'. Ngoo gi nanu" ASEING Mangsoo nghoid.

<sup>4</sup>«Ngoo: ri ashe: pyam goo". Soolhoo: ri we' ano' goo". To' yu phara" ri akoid goo". Hau: joem ri ano' goo". Ngoo gi nanu" ASEING Mangsoo nghoid.

<sup>5</sup>«Zoem" khau: xoin" shid re" nanu" gougnyhough ri said uri ngoo nanu" ri byid: to" da" thung" ri: ri cang yhe: nyid ge'. Houg: lang" hau: xoin" ri ngoo khab yu wa. <sup>6</sup>Shoo" ri gougnyhough said da" bidnyid ri anghoid lang" thang: nyid" ri zoo: ca" wa zi nghoid. Soem" nyid" ein: nyid" ri deing da" shoo" joem ri nghe' pyam ca" da:. <sup>7</sup>Ciwim gari: hau: shoo" gi thung" khyo" ayung" alho' nghoid da:. Hau: ziri dayug yug zo: nghoid rigi hau: xoin" ri ngoo akhab yu wa. <sup>8</sup>Hau: shoo" ri zo: da" yug hang" nghoid loug we' ngoo ri shugbyid: to" da" ziri aphoug" akhyoid koid da" yooboo yoo" wa zi nghoid wigi nyang: ri nga" byumyu" dayug khyo" myid soin: byid: loo: wa zi anghoid.



<sup>9</sup>Nanu" shivoo: yoo moo: nanu" shivoo: yham" uri yoo gyoem: mo shivoo: joem ri ayham" yu goo". Deing jo, kho' da" shivoo: joem ri we' adoem yhe: koid: yham" yu goo". <sup>10</sup>Deing jo, kho' da" zabyid shi" joem ri yhe: doem phyo' zheing" wa shid re" anghoid lang" shu: gyo' jo, ziri yhe: doem koid: wa shid re" nanu" da" zabyid khyam: khyoo: adoem tau" yhe: goo". Hau: joem gi sho" jhen: bang: yo' tungbau byumyu" yi shid re" nghoid. Ngoo gi nanu" ASEING Mangsoo nghoid.

<sup>11</sup>«Akhoug" goo"- afain" goo"- amhoug goo". <sup>12</sup>Nanu" dang: azung" wa nghoid rigi nga" myeing moo: dangsoo" akoid too" goo". Hau: zigi nga" myeing ri sho' phu" nhang: nyid da:. Ngoo nanu" ASEING Mangsoo nghoid.

<sup>13</sup>Dayug yug ri afain" zoo: goo". Anghoid lang" nya: jonu" ri alhoid yu goo". Nang vhoo" kung: lhung: to" yug da" vhoo" kung: phoug" ri azei zeing ci:. Damyen koo: we' azei zeing ci:. <sup>14</sup>Nu jid yug ri anheing" goo". Myo, jed yug thoem: tho: leung wa khyo" nya: shidkhoin" moo daja: ja: ri atoo" byid: goo". Ngoo ri phau" myang: nyid ge'. Ngoo nanu" ASEING Mangsoo nghoid.

<sup>15</sup>«Tarha" dang: phyed uri deingmain" wigi tarha" khyo" koid ge'. Sho" jhen: da" yug ri we' myonhoo: abyid:- yoo" zoo: bang: ri we' agyug goo". <sup>16</sup>Dayug yug da" khyoo: ri lu amhoug fu". Byu dayug yug gi nya: apyaid shid re" tarha" myid: joeb ca: yu" zi shau" nyid uri re" da" sags: kham da" dang: gi nyang: ri yo" bo pang" thoug wa nghoid rigi tid thu pyam we'. Ngoo gi ASEING nghoid.

<sup>17</sup>«Hang" ri we' anau ashoo" thougtheung khyoo: akoid goo".

Nghoid loug we' hau: yug yoomo nang yooboo ashoid wa shid re" nyang: yo' shai" go" da" khyoo: joem ri nyheing koid pyam wa. <sup>18</sup>Hang" ri we' latoo: aphug goo". Anghoid lang" nyang: ri angheing" nyid goo". Re" yhoem: kyoo" cang" ri nanya: gung yhang: ti" jheddab nyid we'. Ngoo ASEING nghoid. <sup>19</sup>«Nga" amyeing" dang: ri tam" gyoo: we'. Adu go" da" gougnyhoug nyang: cang" nyang: ri myoug: akaid nhang: goo". Yoo dakhyang" moo kyeing" myoug: shi" eig ja: ri ashoin" kaid goo". Khyeing: eig ja: wigi coeb to" da" byimi ri avoid goo".

<sup>20</sup>«Join myhi' dayug gi yuggi phoo dayug da" dangcang: myhi' khyo" tu' to" wigi nyang: ri aphoug" byid: lho: anhang: kaid shi" uri nyang: yo' gootu: yuggi phoo dayug gung shoo" zoem" khau: nghoid rigi nya: tang: ri dam byid: wa zi nghoid. Nghoid loug we' nyang: gi join myhi' nghoid shi" yoomo said pyam shau" wa zi anghoid. <sup>21</sup>Hau: yuggi gi nya: youg: khyoug" da" xoin" khyo" yang loo: dadu: ri Nga" shidkhoin" zoem" khoug: khyoo: she: ri" wa zi nghoid. <sup>22</sup>Houg: lang" khainjung phoo" gi nya: da" yooboo ri yu pyam byid: wa shid re" hau: yang ri ci: wigi thung" khyo" kyeing sain pyam da" khyoo: ri koid wa zi nghoid. Houg: lang" Mangsoo gi nyang: ri yooboo khyoid byid: wa zi nghoid.

<sup>23</sup>«Nanu" Khanan mung" khyoo: vang lo" wigi shigam aja: ja: ri lo" sho" uri xang: shi" soem" zain moo zei: da" shi" gi thung" khyo" ayung" alho' ein: myid soin: yu wa zi nghoid. Hau: ayo, gyoo: moo: hau: shi" ri nanu" age zoo: wa zi nghoid. <sup>24</sup>Myid: zain ein: zain

19:9,10: Xng 27:15; Tid 24:19-22. 19:11: a Thu 20:15; Tid 5:19; b Thu 20:16; Tid 5:20.

19:12: Thu 20:7; Tid 5:11; Mat 5:33. 19:13: Tid 24:14,15. 19:14: Tid 27:18. 19:15: Thu 23:6-8; Tid 16:19.

19:17: Mat 18:15. 19:18: Mat 5:43; 19:19; 22:39; Mrk 12:31; Luk 10:27; Rom 13:9; Gal 5:14; Yak 2:8.

19:19: Tid 22:9-11.

rigi Ngoo ASEING ri nanu" jeju" so" da" khyoo: ci: shug da" xoin" khyo" shi" dangain" ri shugbyid: wa zi nghoid. <sup>25</sup>Nghoid loug we' wim: zain ein: zain rigi hau: shi" ri nanu" yo" zoo: wa zi nghoid. Nanu" hougsu" koid nghoid rigi nanu" shigam gi je" zei: wa zi nghoid. Ngoo gi nanu" ASEING Mangsoo nghoid.

<sup>26</sup>«Suid" boo: shi" da" shoo" kha: ziri we' azoo: goo". Fa" khyoo: kha: ja: ri we' akoid goo". <sup>27</sup>Nanu" vhuloem ayam mo xam: joem ri we' aphyed feing pyam goo"- anghoid lang" nanu" nhoid mei: ri we' anyham" feing goo". <sup>28</sup>Shid: bye: su: shid re" kougsu: wigi nyang: nya: gung ri ayham" goo". Anghoid lang" nanu" gung moo mhug athau" goo". Ngoo gi ASEING nghoid.

<sup>29</sup>«Nyangnu" ri noku yhoem: mo shava myhi koid nhang: khyo" wigi nanu" da" nya: myiyi: zoo: yiri sho' aphu" nhang: goo". Nanu" hougsu" koid nghoid rigi nanu" gi gootu: yu phara" yi jang" khyoo: lheing: phug loo" khari" wa zi yo' mungdain: gi akyang byo, yoin zi byeung" jo, boem goo" wa. <sup>30</sup>Dougno: Bidnyid ri cang pyeing nyid ge'. Ngoo ri noku da" joyoo ri phau" myang: byid: ge'. Ngoo gi ASEING nghoid.

<sup>31</sup>«Shid: bye: bang: da" soobyoo joem yo' dang: doem go" da" bang: jang" moo phajhi" ayhe: mho' goo". Nanu" hougsu" koid nghoid rigi nanu" gi thung" khyo" ayung" alho' wa nghoid. Ngoo gi nanu" ASEING Mangsoo nghoid.

<sup>32</sup>«Mang: zoo: yiri phau" myang: byid: ge'. Nyangnu" ri ngi: shab byid: ge'. Phoug" myang: ziyoi' nga" dang: ri tam" gyoo: ge'. Ngoo gi ASEING nghoid.

<sup>33</sup>«Nanu" mung" moo nyid da" tungbau byumyu" yiri aphoug" akhyoid akoid goo". <sup>34</sup>Nyangnu" ri nanu" gi Israela byu dayug yhang: ti" nyang: zoem" nyid ge'. Nyangnu" ri nanu" gung nanu" nyang: jheddab yhang: ti" jhed nyid ge'. Egutu mung" moo nanu" tungbau dalheing: bue" yu" bye: ziri myid boin: ge'. Ngoo gi nanu" ASEING Mangsoo nghoid.

<sup>35</sup>«Amain" da" laki- jangleig joem ri ci: wigi nanu" hang" ri we' amhoug zoo: goo"- <sup>36</sup>Main" da" jang- main" da" laleug- main" da" laki ci: ge'. Ngoo gi nanu" ASEING Mangsoo nghoid wigi ngoo nanu" ri Egutu mo shu" thu loo bye: zi nghoid. <sup>37</sup>Nga" tarha" yo' amyeing" dang: dangain" ziri tam" gyo: cang yhe: nyid ge'. Ngoo gi ASEING nghoid.

#### Tid Dang: Agyoo: Yoomo Byid: Da" Yooboo Dam Joem

**20** ASEING gi Moshe ri <sup>2</sup>Israela byumyu" yiri tid wa shid re" «Nanu" hang" nghoid loug we' anghoid lang" nanu" moo bo nyid da" tungbau byu yi hang" nghoid loug we' Moleg yu phara" ri no' da" jang" moo ci: wa shid re" nya: zooshang: dayug yug ri byid: su: gi shava byu yi khyo" lugboem wigi du" said pyam zi shau" wa zi nghoid. <sup>3</sup>Hang" nghoid loug we' Moleg shid re" nya: zoo: yi mo dayug ri byid: wigi nga" younglho' da" zoem" ri ayung" alho' bui" nhang: ziyoi' nga" gyeung" shang: myeing ri aphoug" amyang: koid nghoid rigi thoughteung gyi koid wigi nga" byumyu" dayug khyo" nyang: ri myid soin: loo: wa zi anghoid. <sup>4</sup>Nghoid loug we' shava byu yigi nyang: koid bye: ziri cishu:

anhang: ziyo' nyang: ri asaid pyam nghoid rigi <sup>5</sup>Ngoo hau: yug yo' nya: ikoin deungkhu: dangain" ri nyang: yo' xo' wigi ngoo ri dang: azung" ziyo' Moleg ri no' bang: dangain" ri we' thoughteung gyi koid wa. Ngoo gi nyangnu" ri nga" byumyu" khyo" myid soin: loo: wa zi anghoid.

<sup>6</sup>«Shid: bye: bang: da" soobyoo yo' dang: tid goo" bang: jang" khyoo: phajhi" mho' wa shid re" dayug yug yhe: nghoid rigi ngoo nyang: ri thoughteung wigi nga" byumyu" dayug khyo" myid soin: loo: wa zi anghoid. <sup>7</sup>Nanu" nya: gung ri gyeung" shang: nyid ge'. Ciwim gari: ngoo gi nanu" ASEING Mangsoo nghoid. <sup>8</sup>Nga" tarha" ri tam" gyo: cang yhe: nyid ge'. Ciwim gari: ngoo ASEING nghoid wigi nanu" ri gyeung" shang: nhang: bye:» ga: tid.

<sup>9</sup>ASEING gi vhoo: moo: tid to" da" thung" ri: joem ri byid: too" bye:. Nya: myhi' yo' nya: phoo ri nheing" su: hang" ri nghoid loug we' said pyam zi shau" wa. Nyang: shid: zigi nyang: moo yoovoin bo da:.

<sup>10</sup>Yuggi dayug gi nya: byencang" Israela byumyu" dayug da" yhoem: seing myhi' yo' gung shoo" zoem" khau: shoid nghoid rigi nyang: yo' myiyi: myhi eig tang: goin" said pyam zi shau" wa nghoid. <sup>11</sup>Yuggi dayug gi nya: pho yhoem: seing myhi' dayug yo' gung shoo" zoem" khau: khyo" nya: phoo ri sho' phu" nhang: nghoid rigi nyang: yo' myiyi: myhi' eig tang: goin" said pyam zi shau" wa nghoid. Nya: tang: shid: zigi nya: tang: moo yoovoin bo da:. <sup>12</sup>Yuggi dayug gi nya: du moo" yo' gung shoo" zoem" khau: nghoid rigi nya: eig tang: goin" said

pyam zi shau" wa nghoid. Nya: eig tang: gi khoem" boem koid: da" moo" ri koid bye:. Nya: tang: shid: zigi nya: tang: moo yoovoin bo da:. <sup>13</sup>Yuggi dayug gi gootu: yuggi yo' gung shoo" zoem" khau: nghoid rigi nya: tang: gi aco' ajhoid moo" ri koid abyee: yoomo eig tang: goin" zi said pyam shau" wa zi nghoid. Nya: tang: shid: zigi nya: tang: moo yoovoin bo da:. <sup>14</sup>Yuggi dayug gi myiyi: dayug yo' hau: myiyi: nu" da" nya: myhi' ri lo, xo' yu nghoid rigi nyangnu" gi asho' ashid: moo" ri koid bye: yoomo soem" yug goin" ri myi: yo' nghe' said pyam wa zi nghoid. Houg yhang: te" moo" ri nanu" phung: moo: akhang" abyid: goo". <sup>15</sup>Yuggi dayug gi gougnyhong dadu: yo' gung shoo" zoem" khau: nghoid rigi nyang: yo' gougnyhong ri said pyam wa zi nghoid. <sup>16</sup>Myiyi: dayug gi gougnyhong dadu: yo' gung shoo" zoem" khau: wa nghoid rigi nyang: yo' gougnyhong ri said pyam wa zi nghoid. Nya: tang: shid: zigi nya: tang: moo yoovoin bo da:.

<sup>17</sup>Yuggi dayug gi nya: nhammoo" yo' nghoid loug we' pho shoid khyo" bo lo da" nhammoo" yo' nghoid loug we' myhi' shoid khyo" bo lo da" nhammoo" ri yo' nghoid loug we' lo, xo' nghoid rigi nyangnu" ri shava phung moo: sho' phu" nhang: wigi byu phung: mo khaid thu pyam wa zi nghoid. Nyang: gi nya: nhammoo" yo' gung shoo" zoem" khau: bye: yoomo bue" thu re" da" akyu" yooboo joem ri kham zoo: wa zi nghoid. <sup>18</sup>Yuggi dayug gi myiyi: dayug ri nyang: mi ci: nyid da" ayo, moo: gung shoo" zoem" khau: nghoid rigi nya: eig tang: goin" ziri byu phung: mo khaid thu pyam

20:9: Thu 21:17; Mat 15:4; Mrk 7:10. 20:10: Thu 20:14; Xng 18:20; Tid 5:18.

20:11: Xng 18:8; Tid 22:30; 27:20. 20:12: Xng 18:15. 20:13: Xng 18:22. 20:14: Xng 18:17; Tid 27:23.

20:15,16: Thu 22:19; Xng 18:23; Tid 27:21. 20:17: Xng 18:9; Tid 27:22. 20:18: Xng 18:19.

wa zi nghoid. Ciwim gari: nya: tang: gi thung" khyo" ayung" alho' ga: da" thung" ri: ri lhu: phyo yoomo nghoid.

<sup>19</sup>Yuggi dayug gi nya: nid yi yo' nghoid loug we' nya: myhi' da" nya: bi: nya: nhung" yi yo' nghoid loug we' gung shoo" zoem" khau: nghoid rigi nya: tang: gi khoem" boem koid: da" moo" shid re" bue" thu lo da" akyu" yooboo ri kham zoo: wa zi nghoid. <sup>20</sup>Yuggi dayug gi nya: moo" nya: laid yi da" yhoem: seing myhi' yo' gung shoo" zoem" khau: nghoid rigi nyang: gi nya: moo" nya: laid yiri sho' phu" nhang: wigi nyang: yo' hau: myiyi: myhi' gi yooboo dam ri khyoug" ca" wa zi nghoid. Zooshang: dayug we' yoo" wa zi anghoid. <sup>21</sup>Yuggi dayug gi nya: mang: nhung" da" yhoem: seing: myhi' ri yu nghoid rigi nya: tang: gi zooshang: ayoo" loo: shid: loo" goo" wa. Nyang: gi thung" khyo" ayung" alho' da" moo" ri koid bye: ziyo' nya: mang: nhung" ri sho' phu" nhang: bye:.

<sup>22</sup>ASEING gi «Nga" tarha" yo' amyeing" dang: dangain" ri cang nyid ge'. Hougsu" nghoid rigi ngoo nanu" ri shu" vang lo" nyid da" Khanan mung" gi nanu" ri he: pyam wa zi anghoid. <sup>23</sup>Hau: mung" moo nyid da" byummyu" yi da" thung" ri: joem ri acang koid goo". Hau: mung" khyoo: nanu" yo" vang loo" wa shid re" hau: yu phara" ri no' bang: ri ngoo khaid thu pyam wa zi nghoid. Nyangnu" gi nyangnu" da" akhyeing" da" moo" dangain" yo' ngoo ri co' nhang: nyid da:. <sup>24</sup>Nghoid loug we' he: myid vhu" nu" mougmyid ge da" mungdain: ri nanu" seing: da" mougmyid khyo" nghoid baja" ein: ngoo dangsoo" koid too" bye:. Ngoo gi hau: ziri nanu" ri byid: wa nghoid. Ngoo gi nanu" ASEING Mangsoo

nghoid. Ngoo nanu" ri gootu: byummyu" yi mo gootu: nyang: khyen: kho' too" bye:. <sup>25</sup>Houg: yoomo nanu" gi thung" khyo" younglho' ziyo' ayung" alho' da" gougnyhoug joem yo' ngho' joem ri bang bang za: kho' too" ca". Ayung" alho' da" gougnyhoug joem yo' ngho' joem ri azoo: goo". Ngoo gi hau: joem ri ayung" alho' ein: tid too" bye: yoomo hau: joem ri zo: zigi nanu" ri ayung" alho' bui" nhang: da:. <sup>26</sup>Nanu" gi gyeung" shang: nyid ziyo' ngoo kyeing" seing: da" bang: nghoid nyid. Ciwim gari: ngoo gi ASEING nghoid ziyo' ngoo gi gyeung" shang: nyid. Nanu" ri ngoo dayug kyeing" seing: wa shid re" ngoo gi nanu" ri gootu: byummyu" yi mo gootu: nyang: khyen: kho' too" bye:.

<sup>27</sup>«Shid: mo, da" soobyoo joem yo' tid sham: go" da" yuggi myiyi: hang" nghoid loug we' lug boem yo' du" said pyam wa zi nghoid. Hid su" koid su: hang" nghoid loug we' nyang: shid: zigi nyang: moo: yoovoin bo da» ga: tid.

### Khainjung Yi Da" Gyeung" shang: Khyoo:

**21** ASEING gi Moshe ri Arun da" khainjung yiri tid kyoo" wa shid re" amyeing" byid: zigi «Khainjung phoo gi nya: bidnoem seing" cang" shid: uri shid: pui moo: bo loem" khyo" wigi khainjung phoo gi nyang: nya: gung ri thung" khyo" ayung" alho' age koid yu nghoid da:. <sup>2-3</sup>Nghoid loug we' nya: myhi'- nya: phoo- nya: zoo: myiyi:- yuggi- nya: mang: nya: nhung" anghoid lang" nya: yhoem: moo nyid da" ikoin deungkhu: avang shi" da" nhammoo" shid: jang" moo: yhe: bo loem" rigi thung" khyo" ayung" alho' abui" nghoid da:.

<sup>4</sup>Nyang: gi lo, xo' khyo" wigi nyang: yo' bidnoem du mo, shid: jang" moo nyang: nya: gung ri ayung" alho' age bui" nhang; nghoid da:.

<sup>5</sup>«Khainjung phoo gi kougshu: nyid khyoo: ri ci: shug wa shid re" nya: vhuloem mo xam: joem ri age yed: pyam- nhoid mei: age phyed feing pyam anghoid lang" nya: gung mo shoo" ri age yham" Khang" wa. <sup>6</sup>Nyang: gi gyeung" shang: ca" ziyu' nga" myeing ri we' aphoug" akhyoid age bui" nhang: Nyang: gi ngoo ri zoo: noem xoin" ngei" byid: wigi gyeung" shang: ca" da:. <sup>7</sup>Khainjung dayug gi shava myhi bue" yu" bye: su: ri we' zoomyi: gyeing" anghoid lo: su: ri we' yuggi yo' gang: nyid shau" su: ri we' lo, age xo' yu nghoid da:. Nyang: gi gyeung" shang: yug nghoid. <sup>8</sup>Byumyu" yigi khainjung phoo ri gyeung" shang: yug khyo" myid soin: yu ca" da:. Ciwim gari: nyang: gi ngoo ri zoo: noem xoin" ngei" byid: su: nghoid. Ngoo gi ASEING nghoid. Ngoo gi gyeung" shang: su: nghoid wigi nga" byumyu" yiri we' gyeung" shang: nhang: su: nghoid. <sup>9</sup>Khainjung phoo da" nya: myiyi: zoo: gi shava myhi' koid nghoid rigi nyang: gi nya: phoo ri sho' phu" nhang: su: nghoid. Nyang: ri myi: wigi nghe' said pyam wa zi nghoid.

<sup>10</sup>«Khainjung moo" gi nya: vhuloem moo: mainkaid xu: foid gyoin: zi kham yu bye: ziyu' khainjung byimi void wa shid re" shugbyid: too" bye: zi nghoid yoomo nyang: gi kougshu: ziri ci shug wa khyoo" nya: xam: ri akyo' shang: loo: age too"- nya: byimi ri age lang: ceig wa. <sup>11-12</sup>Nyang: gi ngoo ri shugbyid: too" bye: su: nghoid wigi nga" gyeung" shang: da" Zoem" mo thu lo" lho: nyang: gi nya: phoo nghoid nghoid nya: myhi' nghoid nghoid byu

dayug yug shid: jo, da" yhoem: khoug: khyoo: vang yhe: khyo" wigi nyang: nya: gung ri thung" khyo" ayung" alho' bui" nhang: ziyu' nga" gyeung" shang: da" zoem" ri we' aco' ajhoid age koid nghoid da:. <sup>13</sup>Nyang: gi zoomyi: gyeing" ri lo, xo' yu wa nghoid da:. <sup>14</sup>Cougmoo" ri we' yuggi yo' gang: nyid shau" da" myiyi: ri we' shava myhi' ri we' lo, age xo' yu nghoid da:. Nyang: gi nyang: nya: akung: mo zoomyi: gyeing" ri kyeing" lo, xo' yu wa zi nghoid. <sup>15</sup>Hougsu" anghoid ri gyeung" shang: eung: da" nya: zoo: yigi thung" khyo" ayung" alho' mo, nghoid ri" wa. Ngoo gi ASEING nghoid wigi nyang: ri khainjung moo" khyo" ngoo gootu: khyen: kho' too" bye:» ga: tid.

<sup>16</sup>ASEING gi Moshe ri <sup>17</sup>Arun ri tid kyoo" wa shid re" amyeing" byid: zigi «Re" da" amyed ashen yi mo gung du: yoin" bang: hang" nghoid loug we' nga" shid re" zoo: noem xoin" age ngei" byid: wa. He: khyoo: ri ju" loo wa da" ayo, akhyeing: dangain" mo koid ca" da:. <sup>18</sup>Gung shoo" ca" bang: nghoid da" myo, jed- khyid: gyau:- myonhoo: byo, yug- gung shoo" ajoeb yug- <sup>19</sup>khyid: gyau: lo, gyau: yug- <sup>20</sup>dang goug" yug- gung leung" yug- myo, noo no yug anghoid lang" manggam dab yug- Unug hang" nghoid loug we' xoin" age ngei" byid: nghoid da:. <sup>21</sup>Khainjung Arun da" amyed ashen yi gung du: yoin" su: hang" nghoid loug we' Ngoo ri zoo: noem xoin" ayo" byid: wa zi nghoid da:. <sup>22</sup>Houg yhang: te" yug gi ngoo ri ngei" byid: da" gyeung" shang: zoo: noem xoin" yo' gyeung" shang: thang zoo: noem xoin" joem ri ge zo: da:. <sup>23</sup>Nghoid loug we' nyang: gi gung shoo" ca" su: nghoid yoomo gyeung" shang: da" yab khyo' pain' ruang: yo'

phoin: khyoo: ayo" tain" yhi: wa zi nghoid. Nyang: gi gyeung" shang: da" jonu" joem ri ayung" alho' ayo" koid wa zi nghoid. Ciwim gari: ngoo gi ASEING nghoid wigi ngoo hau: joem ri gyeung" shang: nhang: too" bye:».

<sup>24</sup>He: zigi Moshe wigi Arun- Arun da" nya: yuggi zoo: yi yo' Israela byumyu" dangain" ri tid kyoo" byid: bye:.

### Gyeung" shang: Xoin" Joem Da" Khyoo:

**22** ASEING gi Moshe ri <sup>2</sup>Arun yo' nya: yuggi zoo: yiri tid wa shid re" amyeing" byid: to" zigi «Nanu" gi nga" gyeung" shang: myeing ri aphoug" akhyoid akoid nyid goo". Houg: yoomo Israela byumyu" yi wigi ngoo ri re" shugbyid: da" younglho' xoin" joem ri phau" myang: da" khyo" koid ge'. Ngoo gi ASEING nghoid. <sup>3</sup>Nanu" da" amyed ashen yi mo dayug yug gi thung" khyo" ayung" alho' bue" nyid uri Israela byumyu" yi ngoo ri shugbyid: to" da" younglho' xoin" joem anam khyoo: tab yhe: nghoid rigi nyang: gi phoin: moo: khanham we' age dei byid: loo: wa nghoid. He: joem gi ju" loo wa da" ayo, dangain" moo cang wa da" khyoo: joem nghoid. Ngoo gi ASEING nghoid.

<sup>4</sup>«Arun da" amyed ashen yi mo manggam dab yug anghoid lang" ayeing thu yug hang" nghoid loug we' thung" khyo" younglho' yug abui" bui" gi younglho' da" xoin" ri dajhi we' age zoo: nghoid da:. Khainjung dayug yug gi shid: mang yo' zang" tain" da" daja: ja: ri anghoid lang" myoug: yeing thu da" yug- <sup>5</sup> anghoid lang" ayung" alho' da" gougnyhoug anghoid lang" ayung" alho' da" dayug yug ri yhe: zang" tain" nghoid rigi nyang: gi ayung" alho' bue" nyid da:. <sup>6</sup> Ayung" alho' bue" da"

khainjung phoo gi myen" thang: ju" sho' ayung" alho' bue" nyid da:. Gung abain cid" pyam pyam gi younglho' da" xoin" ci ri we' yo" zoo: wa zi anghoid. <sup>7</sup> Bidvang lo" byug thang: ri nyang: gi younglho' da" su: bue" bye: wigi hau: thang: ri nya: zoo: noem nghoid da" younglho' xoin" ri nyang: zoo: wa zi nghoid. <sup>8</sup> Nyang: gi nyang: nyang: kyeing" shid: da" gougnyhoug lam" ri we' anghoid lang" gougnyhoug joem wigi ngaid said da" shoo" daja: ja: ri azoo: wa zi nghoid da:. Hau: zigi nyang: ri ayung" alho' bui" nhang: wa zi nghoid. Ngoo gi ASEING nghoid.

<sup>9</sup>«Khainjung yi dangain" gi ngoo byid: to" da" thung" ri: joem ri cang nyid ca" wa zi nghoid. Hougsu" anghoid lang" nyangnu" gi yooboo yo" wigi shid: loo" goo" wa. Ciwim gari: nyangnu" gi younglho' da" thung" ri: joem ri atam" gyoo: acang yoomo nghoid ago". Ngoo gi ASEING nghoid-nyangnu" ri ngoo gyeung" shang: nhang: bye:.

<sup>10</sup>«Khainjung pho da" yhoem: byu yi za: hau: younglho' xoin" joem ri ge zo: da:. Gootu: hang" we' hau: xoin" joem ri age zoo: nghoid da:. Khainjung phoo yo' dage" zoem" nyid yug anghoid lang" khainjung phoo ngho" to" da" vhoo' kung: phoo lang" hau: joem ri age zoo: nghoid da:. <sup>11</sup> Nghoid loug we' khainjung phoo nya: ngei yo' qei to" da" join yi anghoid lang" nya: yhoem: moo: khu: da" join yi gi khainjung phoo shau" yu da" zoo: noem ri ge zo: da:. <sup>12</sup> Khainjung anghoid yug yo' lo, xo' da" khainjung pho da" nya: myiyi: zoo: gi younglho' da" xoin" ciri we' age zoo: nghoid da:. <sup>13</sup> Nghoid loug we' cougmoo" anghoid lang" yhoem: seing: phoo yo' kang" nyid wigi zooshang: ayo" da" myiyi: zoo: gi nya: yhoem: moo doem lo tau" khau: nghe:



nyid yug gi nya: phoo khainjung khyo" wigi yo" yu to" da" zoo: noem ri ge zo: da:. Khainjung pho da" yhoem: byu yi za: hau: joem ri ge zo: da:.

<sup>14</sup>«Khainjung pho da" yhoem: byu anghoid da" byu dayug yug hau: younglho' da" xoin" joem mo daja: ri pa: yhi: akoid loo: zang" zoo: yug nghoid rigi nyang: gi khainjung phoo ri hau: aphoug" byeung" sho' bo lho: shoo: boem eig xi: lung: wigi doem khyoug" wa zi nghoid. <sup>15-16</sup>Khainjung yi gi amoin: yi" da" yug ri hau: joem ri zoo: nhang: da" khyo" wigi hau: younglho' da" xoin" joem ri ayung" alho' age koid wa zi nghoid. He: zigi yooboo bue" nhang: wigi houng: yhang: te" yug atho' moo: yooboo dam bui" loo nhang: wa zi nghoid. Ngoo gi ASEING nghoid wigi hau: xoin" joem ri gyeung" shang: nhang: too" bye:» ga: tid.

<sup>17</sup>ASEING gi Moshe ri <sup>18</sup>Arun yo' nya: yuggi zoo: yi Israela byumyu" dangain" ri vhoo: moo tid to" da" thung" ri: joem ri cang nhang: wa shid re" amyeing" byid: too" bye:. Israela byu dayug yug anghoid lang" Israela byu yi yo' dage" nyid da" tungbau byu dayug yug thang" cab to" ziri ze: pyeing khyo" nghoid ri nghoid anghoid lang" nyang: myid vho: khyo" nghoid ri nghoid nghe' ngei" xoin" ngei" byid: uri gougnyhoug gi noo abo zi nghoid ca" da:. <sup>19</sup>Lhoem yu byid: zi shau" wa shid re" hau: zigi noo daja: we' abo da" aloo: nghoid ca" da:. <sup>20</sup>Noo bo da" gougnyhoug daja: ja: ri nanu" shugbyid: nghoid rigi ASEING gi hau: ziri lhoem: yu byid: wa zi anghoid. <sup>21</sup>Byu dayug yug gi thang" cab ri ze: pyeing da" khyo" nghoid ri nghoid- anghoid lang" nya: myid vho: khyo" nghoid ri nghoid- ASEING

ri zoem" khau: xoin" ri shugbyid: uri lhoem: yu byid: zi shoug" wa shid re" gougnyhoug gi noo abo zi nghoid ca" da:. <sup>22</sup>Myo, jed- khyid: gyau:- gung doem: yoin"- dam joid joid- shooyid ago, akhyeing" bui"- dam pyi" pyi" da" gougnyhoug ASEING ri angei" byid: goo". Houg yhang: te" gougnyhoug joem ri zoo: noem xoin" khyo" phoin: moo: angei" byid: goo". <sup>23</sup>Axoin: xoin:- gung doem: ajoeb byeung" da" gougnyhoug ri nya: myid vho: xoin" khyo" ge ngei" byid: da:. Nghoid loug we' thang" cab ri ze: pyeing" da" xoin" khyo" hau: ziri lhoem: yu wa zi anghoid. <sup>24</sup>Ajid" ri baid cab pyam- yham" pyam- lang: ced khyo" thau" phug khyo" shain: pyam bye: da" gougnyhoug ri ashugbyid: goo". He: ziri nanu" mungdain: moo akhang" abyid: goo".

<sup>25</sup>Tungbau yi mo shau" yu da" ce: ja: gougnyhoug ri we' zoo: noem xoin" khyo" ashugbyid: goo". Houg yhang: te" da" gougnyhoug joem rigi noo dab da ein: myid soin: yu wigi age lhoem: yu nghoid da:.

<sup>26-27</sup>Nu nu"- yang nu"- coidbaid nu" soid uri nyhed nyid" ju" sho' nya: myhi' yo' age kang" nghoid da:. Nghoid loug we' hau: thang: rigi hau: ziri zoo: noem xoin" khyo" yo" lhoem: yu wa nghoid. <sup>28</sup>Nu zeing yo' nya: zoo: ri yang myhi' yo' nya: zoo: ri coidbaid myhi' yo' nya: zoo: ri danyid" dam xoin" a ngei" byid: goo". <sup>29</sup>Jeju" boin: so" da" xoin" ASEING ri nanu" ngei" byid: uri nanu" ri lhoem: yu byid: zi shau" wa shid re" thung" ri: joem ri cang ca" wa zi nghoid. <sup>30</sup>Hau: ziri hau: nyid" riza: zo: wigi thang: nab soin: ju" sho' ateing too" goo".

<sup>31</sup>ASEING gi «Nga" amyeing" dang: ri tam" gyo: nyid ge'. Ngoo gi ASEING nghoid. <sup>32</sup>Nga" gyeung" shang: da"

myeing ri aphoug" akhyoid abui" nhang: goo". Israela byumyu" yi dangain" gi ngoo ri gyeung" shang: yug khyo" se' yhen: yu ca" da:. Ngoo gi ASEING nghoid wigi nanu" ri ngoo gyeung" shang: nhang: bye:. <sup>33</sup>Ngoo gi nanu" da" Mangsoo bui" nyid wa shid re" Egotu mo nanu" ri shu" thu loo bye:.. Ngoo gi ASEING nghoid da» ga: tid.

### Noku Thung" Yo' Sen: Da" Pui" Joem

**23** ASEING gi Moshe ri <sup>2</sup>Israela byumyu" yigi noku wa shid re" zheing: foem da" uri noku thung" pui yo' sen: da" vhoo: mo thung" ri: joem ri byid: too" bye:.. <sup>3</sup>Nanu" gi nanu" nya: moo" koid wa shid re" khyug nyid" yo" da:. Nghoid loug we' nyhed nyid" nyid" gi Dougno: Bidnyid- doug no yu da" bidnyid nghoid ein: ziri boin: nyid ge'. Hau: nyid ri moo" age ze: nghoid loug we' noku ku wa shid re" zeing foem: nyid ca" da:. Nanu" khamoo: nyid nyid Dougno: Bidnyid gi ASEING da" bidnyid nghoid. <sup>4</sup>Vhoo: moo: tid to" da" pui" joem ri ayo, tu' to" uri tid pyoo: byid: ge'.

### Lhid: Kaid Pui" Yo' Doocid" Abo da" Zooyho' Zoo: Pui"

(Gys 28: 16- 25)

<sup>5</sup>ASEING ri phoug" tab ngi: shab byid: khyo" koid da" lhid: kaid pui" ri lhammoo" xang: shi" khyab daxe: myid: nyid" ein: nyid" bidvang zoo" mo koid shid" ge'. <sup>6</sup>Daxe: wim: nyid" nyid" rigi doocid akaid da" zooyho' zoo: pui" ri koid shid" wigi nyhed nyid" ju" sho' doocid" kaid lho: koid to" da" zooyho' ce: ja: ri we' nanu" age zoo: wa. <sup>7</sup>Hau: bidnyid joem mo

xang: shi" nyid" ri noku ku wa shid re" zeing: foem: nyid wa zi nghoid wigi nanu" nyid" Khang" nyid" ze: da" moo" ri age ze: wa zi nghoid. <sup>8</sup>Hau: nyhed nyid" moo: nanu" da" zoo: noem xoin" ri ASEING jang" moo shugbyid: ge'. Hau: nyhed nyid" ein: nyid" ri noku ku wa shid re" dalheing: doem zeing: foem: nyid ge'. Nanu" nyid" Khang" nyid" ze: da" moo" ri agi ze: wa zi nghoid.

<sup>9-10</sup>ASEING wigi nanu" ri byid: wa zi nghoid da" Mungdain: khyoo: ju" vang yhe: lho: nanu" shivoo: ri yhoem" yu lang" xang: shi" da" shivoo: deing: ri khainjung pho jang" khyoo: ci: yhi: ge'. <sup>11</sup>Nanu" da" xoin" ri lhoem: kham: yu zi shau" wa shid re" nyang: gi hau: ziri gooki lid da" xoin" khyo" ASEING ri shugbyid: wa zi nghoid. Khainjung phoo gi hau: ziri Dougno: Bidnyid da" thang: nyid" ri shugbyid: wa zi nghoid. <sup>12</sup>Shivoo: xoin" ri nanu" shugbyid: da" bidnyid moo: noo abo da" dazain byeung" yang loo: nu" dadu: ri we' nghe' ngei" xoin" khyo" xoin" ngei" byid: wa zi nghoid. <sup>13</sup>Nanu" gi houg: yo' dage" zhainloin: xu: yo' lheug to" da" cen moin" dajoid: jain" ri zoo: noem xoin" khyo" shugbyid: wa zi nghoid. He: xoin" da" shoem: gi ASEING ri ngei nhang: wa zi nghoid. Nanu" gi houg yo' dage" zabyid yhid: xoin" eig parheing" ri we' shugbyid: wa zi nghoid ago". <sup>14</sup>He: xoin" joem Mangsoo jang" moo ayhe: bain shugbyid: byid: gi gug seig nghoid nghoid- gug shen" nghoid nghoid zooyho' nghoid nghoid- dajhi' we' azoo: goo". He: thung" tarha" joem gi ju" loo wa da" ayo, dangain" moo: nanu" da" amyed ashen yi dangain" cang yhe: loo" wa da" tarha" nghoid.

**Shivoo: yham" Pui"***(Gys 28:26-31)*

<sup>15</sup>Nanu" da" shivoo: deing: ri ASEING jhang nanu" shugbyid: da" Dougno: Bidnyid da" thang: nyid" mo zi nyhed lheing: ein: lheing: da" Dougno: Bidnyid byeung" sho' nghab ge'. <sup>16</sup>Nyhed lheing: ein: lheing: da" Dougno: Bidnyid da" thang: nyid" nghoid da" wim: xi: nyid" ein: nyid" ri shivoo: seig gootu: ASEING ri shugbyid: wa zi nghoid. <sup>17</sup>Deungkhu: khang" moo" gooki lid jhungshug khyo" zooyho' eig loem: ri yu lo wigi ASEING ri shug byid: wa zi nghoid. Zooyho' khang" moo" ri cen: moin" dajoid: jain" ri doocid" yo' zooyho' koid wigi xang: shi" yhoem" yu da" shivoo: shiloem xoin" khyo" ASEING ri shugbyid: wa zi nghoid. <sup>18</sup>Houg: lho: shava byu yigi zooyho' yo' dage" noo abo da" dazain byeung" yang nu" nyhed du:- nuloo: dadu:- yang loo: eig du: ri shugbyid: wa zi nghoid. Nyangu" gi nghe ngei" xoin" khyo" shivoo: shiloem xoin" yo' zabyid yhid: xoin" ri dage" ASEING ri ngei" byid: wa zi nghoid. He: xoin" da: shoem: gi ASEING ri ngei nhang: wa zi nghoid. <sup>19</sup>Yooboo khyoid xoin" khyo" coidbaid loo: dadu: yo' zoem" khau: xoin" khyo" dazain byeung" da" yang loo: eig du: ri we' ngei" byid: wa zi nghoid. <sup>20</sup>Khainjung phoo gi khainjung yi shid re" gooki lid jhungshug khyo" zooyho' yo' hau: yang nu" eig du: ASEING ri ngei" byid: wa zi nghoid. He: ngei" byid: xoin" joem gi gyeung" shang: da:. <sup>21</sup>Hau: nyid" ri nanu" da" moo" ciri: we' azei: goo". Nghoid loug we' noku coung" nghei wa shid re" dage" zeing: foem: nyid ge'. Ju" loo wa da" ayo, dangain" nanu" da" amyed ashen yigi yangnu"

khamoo: nyid nyid he: thung" tarha" ri cang ca" ago".

<sup>22</sup>Nanu" yoo moo: shivoo: shiloem yham" yu uri yoo gyoem: mo shivoo: shiloem ri ayham" yu goo". Yhoem" khyo' to" da" shivoo: ri we' adoem yhe: koid: goo". Hau: joem ri sho" jhen: bang: yo' tungbau byu yi shid re" teing too" byid: kho' ge'. ASEING gi nanu" da" Mangsoo nghoid da:.

**Zain Seig Pui"***(Gys 29:1-6)*

<sup>23-24</sup>Lhammoo" nyhed khyab ein: khyab xang: shi" nyid" ri gooki lid no: nyid da" bidnyid khyo" cang nyid wigi laboo" moid thui: myeing lang" noku wa shid re" dage" re" zeing: foem: nyid ge'. <sup>25</sup>ASEING ri zoo: noem xoin" ngei" byid: wigi nanu" da" moo" ciri: we' azei: goo".

**Yooboo Khyoid Byid: Bidnyid.***(Gys 29:7-11)*

<sup>26-27</sup>Lhammoo" nyhed khyab ein: khyab daxi nyid" ein: nyid" gi shava byu yi da" yooboo ri khyoid pyam byid: wa shid re" thung" ri cang wigi dazain dalheing: koid da" bidnyid nghoid. Hau: bidnyid ri ci: we' azoo: goo". Noku wa shid re" dage" zeing: foem: nyid ge'. Houg: lho: ASEING ri zoo: noem xoin" ri shugbyid: nyid ge'. <sup>28</sup>Hau: nyid" ri ce: moo" azei: goo"- ciwim gari: hau: bidnyid gi yooboo joem ri yu pyam byid: wa shid re" thung" ri cang wigi koid da" bidnyid nghoid da:. <sup>29</sup>Hau: bidnyid moo: daja: ja: ri zo: da" yug hang" ri nghoid loug we' nyang: ri Mangso da" byu dayug khyo" myid soin: yu loo: wa zi anghoid. <sup>30</sup>Hau: nyid" ri dayug yug moo" ze: nghoid rigi nyang: ri ASEING wigi said pyam wa zi nghoid. <sup>31</sup>Nyangu" amyed ashen yi

dangain" gi nyangnu" khamoo: nyid nyid he: thung" tarha" joem ri ci: wa zi nghoid. <sup>32</sup>Hau: lhammoo" khyab goug nyid" nyid" bidvang yo, mo daxi: nyid" nyid" bidvang yo, ju" sho' he: nyid" ri gooki lid Dougno: Bidnyid khyo" cang nyid wigi hau: ayo, gyoo: moo: ci: we' age zoo: nghoid da:

### Zoem" Pui"

(Gys 29:12- 40)

<sup>33-34</sup>Zoem" pui" ri lhammoo" nyhed khyab ein: khyab daxe: wim: nyid" mo shid" wigi xo' lho: nyhed nyid" ju" sho' koid wa zi nghoid. <sup>35</sup>Hau: bidnyid mo xang: shi" nyid" ein: nyid" mo noku wa shid re" dage" zeing: foem: nyid wigi nanu" da" moo" ciri: we' azei: goo". <sup>36</sup>Hau: nyhed nyid" moo nanu" gi nyid" khang" nyid" zoo: noem xoin" ri shugbyid: wa zi nghoid. Shed nyid" ein: nyid" ri noku wa shid re" dalheing: doem zeing: foem: wigi zoo: noem xoin" ri shugbyid: wa zi nghoid. Hau: bidnyid gi noku wa shid re" nghoid wigi nanu" gi moo" age ze: wa zi nghoid.

<sup>37</sup>(Hau: joem gi noku wa shid re" dage" zeing: foem: re" wigi ASEING ri nanu" ngi: to' ziyoy nyid" khang" nyid" ca" da" zoo: noem xoin"- nghe' ngei" xoin"- shivoo: shiloem xoin"- xoin" du: ngei" xoin" yo' zabyid yhid: xoin" joem ri shugbyid: da" laloem lakhoug: pui" joem nghoid da:. <sup>38</sup>Main: main: koid da" he: pui" joem gi Dougno: Bidnyid moo loung: lho: koid da" pui" joem nghoid. Hau: xoin" joem gi nanu" da" main: main: byid: da" jhungshug joem thang" cab ri pyeing byid: da" nanu" xoin" joem yo' nanu" ASEING ri byid: da" nanu" myid bo xoin" joem moo: loung: wigi shugbyid: da" xoin" joem nghoid da:.)

<sup>39</sup>Nanu" yoo moo: bain yhoem" yu lang" lhammoo" nyhed khyab ein: khyab daxe: wim: nyid" ein: nyid" mo shid" lho: he: pui" ri nyhed nyid" byeung" sho' koid ge'. Xang: shi" nyid" gi gooki lid da" dougno: yu da" bidnyid nghoid. <sup>40</sup>Hau: bidnyid ri nanu" da" shigam joem mo ge thang da" shi" dayham" ri yo' thab gam mo akung: joem afu mung" da" seiggam joem mo akung: joem ri cu: yu wigi nanu" ASEING Mangsoo ri phau" myang: ngi: shab byid: wa shid re" noku thung" pui" ri koid shid" ge'. <sup>41</sup>Hau: pui" ri nyhed nyid" byeung" sho' koid ge'. He: thung" tarha" gi ju" loo wa da" ayo, dangain" moo nanu" da" amyed ashen yi cang yhi: wa da" thung" tarha" nghoid. <sup>42</sup>Israela byumyu" dangain" bang: gi zoem" khoug: moo nyhed nyid" byeung" sho' nyid nyid wa zi nghoid. <sup>43</sup>Houg: lang" ASEING gi nanu" ri Egutu mung" mo shu" thu lo da" uri Israela byumyu" yiri bid shoem zoem" khoug: moo: nyid nhang: lo da" khyoo: ri nanu" amyed ashen yi si' wa zi nghoid. Nyang: gi nanu" ASEING Mangsoo nghoid.

<sup>44</sup>Hid su" khyo" wigi Moshe gi Israela byumyu" yiri ASEING ri phau" myang: ngi: shab byid: wa da" noku thung" pui" joem ri koid lho: cang nyid wa da" thung" tarha" joem ri byid: da:

### Myikug Joem Ri Yu" Coung: Khyoo:

(Thu 27:20- 21)

**24** ASEING gi Moshe ri <sup>2</sup>Israela byumyu" yiri vhoo: moo: tid to" da" amyeing" dang: joem ri byid: we' ga: tid. Hau: joem gi atheing: loo: dab bang nyid wa shid re" zoem" khoug: mo myikug joem shid re" ge thang gyeung" da" zhainloin: xu: ri ci: yhe:

ge'. <sup>3</sup>Arun gi myen khang" moo" hau: myikug joem ri myi: tab lho: gyeung" shang: thang da" joyoo nghoid da" Dang: Theing Kuid: shidkhoin" mo yabkyo pain" ruang:- tunggung shoid ASEING shidkhoin" moo nab soin: ju" sho' nge" bang jo, nhang: wa zi nghoid. He: thung" tarha" gi ju" loo wa da" ayo, dangain" moo cang wa da" tarha" nghoid da:. <sup>4</sup>Arun gi sheing: gyeing" myikug too" wa zeing tho' moo jo, da" myikug joem ri yu" coung: wa zi nghoid wigi hau: zigi ASEING shidkhoin" moo myi: atheing: dab bang nyid wa ziri yu" ca" zi nghoid.

### **Mangsoo Ri: Ngei" Byid: Da" Zooyho'**

<sup>5</sup>Cen: moin" khyug joid: dakyen" jain" ri yu wigi zooyho' daxe: eig loem: bung: wa zi nghoid. <sup>6</sup>Hau: zooyho' joem ASEING shidkhoin" moo jo, da" sheing: gyeing" yo' thoeb to" da" zoobui" dang moo: dajen moo khyug loem: loem: koid lho: eig jen too" wa zi nghoid. <sup>7</sup>ASEING ri shugbyid: da" zoo: noem xoin" zooyho' gungthid khyo" hau: zooyho' eig jen goin" moo nam pyo: da" ayeing dajhi ri foid gyoin: wa zi nghoid. <sup>8</sup>Ju" loo wa da" ayo, dangain" mo Dougno: Bidnyid khang" moo" moo zooyho' ri ASEING shidkhoin" moo: to" too" ca" da:. He: zigi Israela byumyu" yi apyaid atoo: ze: ca" da" yoovoin nghoid da:. <sup>9</sup>Zooyho' gi Arun yo' nya: amyed ashen yi shid re" nghoid wigi nyangnu" gi hau: ziri gyeung" shang: da" joyoo moo: zoo: wa zi nghoid. Ciwim gari: he: zigi khainjung yi shid re" ASEING ri ngei" byid: da" zoo: noem xoin" mo gye" gyeung" shang: da" adu nghoid da:.

### **Nyeung Veung" Deungmain" Yooboo Dam Leug**

<sup>10-11</sup>Byu dayug gi nya: phoo gi Egotu byu- nya: myhi' gi Dan kung: mo Debr

ga: yug da" myiyi: zoo: Israela myiyi: Shelomid nghoid da:. Dab daloem moo: hau: yug gi Israela byu dayug yo' myeing" myoo: go" da: Myeing" myoo: go" nyid uri byu hau: yug gi ASEING ri nheing" da: Hougsu" yoomo nyangnu" gi hau: yug ri Moshe jang" khyoo: shu" yhe: wigi. <sup>12</sup>nyang: ri zung" nyid ago". Houg: lho: nyang: ri khasu" koid wa khyoo: ASEING wigi nyangnu" ri tid wa ziri lang" nyid ago".

<sup>13</sup>ASEING gi Moshe ri <sup>14</sup>«Hau: yug ri dab tunggung khyoo: she: thu pyam ge'. Nyang: nheing" ziri shoug" gyoo: bang: yugkhang" moo" gi nyang: yooboo yo" da" khyoo: ri sags: kham wa shid mo hau: yug da" vhuloem tho' moo: nya: lo, ri ki" wa zi nghoid ago". Hau: thang: shava byu yigi nyang: ri lug boem yo' du" said pyam wa zi nghoid. <sup>15</sup>Hau: thang: Israela byumyu" yiri hid su" ein: tid ge'. Mangsoo ri nheing" da" kha: yug ri nghoid loug hau: akyu" ri shau" kham zo: wigi <sup>16</sup>said pyam zi shau" wa. Israela byu kha: yug nghoid nghoid- Israela akhoug: moo: nyid da" tungbau byu kha: yug nghoid nghoid ASEING ri nheing" su: rigi shava byu yi wigi lug boem yo' du" said wa zi nghoid. <sup>17</sup>Byu said da" hang" ri nghoid loug we' said pyam zi shau" wa nghoid. <sup>18</sup>Houg: lho: sube" da" gougnyhong ri said da" yug hang" nghoid loug we' hau: ziri doem xab ca" da:. Hau: apoem: ayang: gi kangso' shid re" kangso' nghoid da:.

<sup>19</sup>Byu dayug wigi gootu: dayug ri dam tab byid: nghoid ri nyang: koid yhang: ti" nyang: ri we' doem koid wa zi nghoid. <sup>20</sup>Nyang: gi shooyoug: dakhaid baid khyau" nghoid rigi nya: shooyoug: dakhaid ri we' baid khyau" wa zi nghoid. Nyang: gi myojid" daloem ze" phug byid: nghoid rigi nya: myojid" daloem ri we' thau" phug byid:

wa zi nghoid. Nyang: gi zeid dakhaid baid khyu byid: nghoid rigi nya: zeid dakhaid ri we' baid khyu byid: wa zi nghoid. Nyang: gootu: byu yiri khasu" dam tab ri nyang: ri we' hougsu" doem koid wa zi nghoid. <sup>21</sup>Gougnyhoug ri said da" yug hang" nghoid loug we' hau: ziri doem xab ca" wa zi nghoid. Byu said da" yug hang" nghoid loug we' said pyam zi shau" wa. <sup>22</sup>He: tarha" gi nanu" dangain" bang: nghoid da" Israela byumyu" yi yo' nanu" akhoug: moo nyid da" tungbau byumyu" yi cang wa da" tarha" nghoid. Ciwim gari ngoo gi nanu" ASEING Mangsoo nghoid.

<sup>23</sup>He: ziri Moshe wigi Israela byumyu" yiri bain tid kyoo" lang" byu hau: yug ri dab tunggung khyoo: shu" thu yhe: lho: nyang: ri lug boem yo' du" said pyam ago". Hid khyo" wigi Israela byumyu" yigi ASEING wigi Moshe ri byid: to" da" amyeing" dang: ri cang boem bye:.

### Nyhed Zain Ein: Zain

(Tid 15: 1-11)

**25** ASEING gi Sina boem moo: Moshe ri dang: ji wigi <sup>2</sup>Vhoo: moo: tid to" da" thung" ri: joem ri Israela byumyu" yiri byid: wa shid re" amyeing" byid: bye:.. ASEING wigi nanu" ri byid: wa da" mungdain: khyoo: nanu" ju" vang yhi: lang" nyhed zain ein: zain khang" moo" mougmyid moo: shivoo: ashoo" loo: koid khyo" wigi nanu" gi ASEING ri phoug" tab ngi: shab byid: wa zi nghoid. <sup>3</sup>Nanu" gi khyug zain akhoug: moo: nanu" yoo moo shivoo: sho"- zabyid khyam: ri cu: shang: byid:- shivoo: shiloem ri zheing" yu goo" wa zi nghoid. <sup>4</sup>Nghoid loug we' nyhed zain ein: zain gi mougmyid shid re" dazain goin" noo: wa da" zain nyid ASEING ri shugbyid:

to" da" zain nyid nghoid da:.. Nanu" yoo cang shivoo: ashoo" goo"- nanu" zabyid khyam: cang acu: shang: byid: goo". <sup>5</sup>Byu wigi ashoo" lho: nyang: nyang: kyeing" za: yug da" gug rilang" ayham" yu goo". Acu: shang: to" da" nanu" zabyid khyam: joem mo zabyid shi" joem ri we' aphyo' zheing" yu goo". Hau: zigi mougmyid shid re" dazain goin" noo: wa da" zain nyid nghoid da:.. <sup>6</sup>Hau: zain ri mougmyid moo shivoo: shiloem ashoo" sho' nghoid loug- hau: zigi nanu" shid re" we' nanu" join yi shid re" we' nanu" da" vho" kung: yi shid re" we' nanu" yo' dage" nyid nyid da" tungbau byu yi shid re" we' <sup>7</sup>Nanu" da" yhoem: gougnyhoug joem shid re" we' siyoo gougnyhoug lam" joem shid re" we' zoo: noem bue" loo wa. Houg moo: bui" thu re" da" ja: khang" moo" ri zoo: wa zi nghoid.

### Loid Byoin Nhang: Da" Zain Void

<sup>8</sup>Nyhed zain nyhed lheing: nghab ri dangain" gi myid: xe: goug: zain nghoid da:.. <sup>9</sup>Hau: thang: lhammoo" nyhed khyab- daxi nyid" ein: nyid" gi yooboo khyoid byid: da" bidnyid nghoid wigi mungdain: goin" moo: ju" sho' laboo" moid wa shid re" byu nhang: kaid ge'. <sup>10</sup>Hid khyo" wigi nanu" gi wim: xi: zain ein: zain ri gootu: to" to" lho: mungdain: moo nyid da" mo, dangain" shid re" loid byoin wa khyoo: tid pyo: fu" kaid wa zi nghoid ago". He: zain gyoo: moo: oung" pyam bye: da" ziyoo dangain" ri xang shi" seing: da" yug anghoid lang" nya: amyed ashen yiri doem tau" byid: wa zi nghoid ago". Houg: lho: join khyo" oung" pyam shau" da" yug hang" ri nghoid loug- nya: yhoem: khyoo: doem tau" byid: ca" da:.. <sup>11</sup>Nanu" gi nanu" da" yoo joem moo: shivoo: age shoo" anghoid lang"



nyang: nyang: za: yug re" da" shivoo: shiloem joem ri age yham" yu. Acu: shang: to" da" nanu" zabyid khyam: mo zabyid shi" joem ri age phyo' zheing" yu goo" wa zi nghoid. <sup>12</sup>Nanu" shid re" hau: dazain goin" zi younglho' nyid wa zi nghoid. Nanu" gi yoo joem mo nyang: nyang: za: thu lo da" gu: ri za: zoo: wa zi nghoid ago".

<sup>13</sup>He: zain khoug: moo: oung" pyam bye: da" ziyoo dangain" ri xang: shi" seing: da" yug ri doem tau" byid: wa zi nghoid. <sup>14</sup>Houg: yoomo nanu" gi mougmyid ri nanu" da" Israela mang: nhung" phoo ri oung" byid: ri anghoid lang" nyangnu" mo mougmyid ri qei yu da" uri adeing amain" khyo" akoid goo". <sup>15</sup>Mougmyid aphoug" ri loid byoin nhang: da" zain void aju" shi" da" zain nyid gyoo: moo: hau: mougmyid mo thu da" shivoo: shiloem joem ri cang lho: aphoug" gu ri phyed wa zi nghoid. <sup>16</sup>Zain nyid myo: nghoid rigi aphoug" je myoo: wa nghoid loug we' zain nyid nheing: nghoid rigi aphoug" nheing: wa zi nghoid. Ciwim gari: oung" zigi hau: yoo mo thu da" shivoo: shiloem ri cang zi nghoid da. <sup>17</sup>Israela mang: nhung" yiri amhoug zoo: goo"- nanu" ASEING Mangsoo ri tam" gyoo: nyid ge'.

### Nyhed Zain Ein: Zain Da"

#### Yau: khe" Khyoo:

<sup>18</sup>ASEING da" tarha" joem yo' amyeing" dang: dangain" ri cang ge'. Houg: lang" nanu" gi hau: mungdain: moo goug: nyu: tung" yo" nyid wa zi nghoid. <sup>19</sup>Mougmyid gi gugzoo meiloem: ri zei: byid: wigi nanu" dangain" gi nanu" vho: zi shau" zoo: wa zi nghoid lho: goug: nyu: tung" shau" nyid" goo" wa nghoid. <sup>20</sup>Nghoid loug we' byu dayug gi hau: nyhed zain ein: zain gyoo: moo: yoo joem mo gug zoo

meiloem: ashoo"- hau: joem ri ayham" zheing" yu ri cizoo: wa lug ga: lung myid goo" wa. <sup>21</sup>ASEING gi khyug zain zain moo mougmyid ri mainkaid byid: wigi hau: mougmyid gi eig zain shid re" zoo: noem gi" sho' zei: byid: nhang: wa zi nghoid. <sup>22</sup>Nanu" gi shed zain ein: zain moo nanu" khyam: yoo joem moo shivoo: shiloem: kaid uri khyug zain gyoo: moo yham" yu to" da" gug zoo meiloem: ri nanu" hau: zain moo sho" da" shivoo: shiloem: doem yham" yu da" ayo, ju" sho' dazo: nyid shigoo" wa nghoid.

### Zi Yoo Jo, Nu" Doem Byid: Khyoo:

<sup>23</sup>Nanu" da" mougmyid ri apyaid atoo: byid: pyam khyo" age oung" zoo: wa. Ciwim gari hau: ziri nanu" seing: nyid zi anghoid. Hau: ziri Mangsoo daseing:- nanu" gi hau: ziri seing: ci: wa da" akhang" yo" da" tungbau byu yi yhang: ti" danghoid.

<sup>24</sup>Mougmyid ri oung" uri xang: shi" da" mougmyid seing: nyang: doem yo" qei da" akhang" jo, ein: ziri si ca". <sup>25</sup>Israela byu dayug yug sho" jhen: wigi nya: mougmyid oung" wa nghoid rigi hau: ziri nyang: yo' jhang thang da" bidnoem dayug doem qei yu ca" wa zi nghoid. <sup>26</sup>Hau: ziri qei wa da" bidnoem ayoo" yug gi thang: ri nyang: nyid gi yab ge lo wigi nyang: hau: ziri doem qei yu wa ngei tham: sho' yoo" bye: ein: shang. <sup>27</sup>He: moo' moo: nyang: gi he: ziri qei su: ri thang: lheing: da" doem tau" byid: da" zain void gyoo: mo deing shi" da" zain nyid shid re" doem xo' lung: byid: ca" wa nghoid. Hau: uri nyang: gi nya: mougmyid ri khasu" nghoid loug we' doem yo" yu da. <sup>28</sup>Nghoid loug we' nyang: gi hau: mougmyid ri doem qei yu wa shid re" ngei atham: nghoid rigi hau: ziri qei yu too" su: da" lo, khoug: moo: thang: zain doem tau" byid: da"

zain void ju" sho' to" too" shi" wa nghoid.  
Hau: zain moo hau: ziri xang: shi" seing:  
su: ri doem tau" byid: ca" da:

<sup>29</sup>Byu dayug gi vang khyam: koid to"  
vooomoo" khoug: mo yhoem: ri oung"  
nghoid rigi nyang: gi hau: ziri oung"  
da" ayo, mo dazain byeung" da" ayo,  
agyoo: moo hau: ziri qei yu wa shid  
re" akhang" yo" da:. <sup>30</sup>Nghoid loug we'  
nyang: gi hau: zain khoug: moo ayo"  
doem qei yu nghoid rigi doem qei wa  
da" akhang" soem" wa zi nghoid. Houg:  
lho: hau: yhoem: gi qei yu su: yo' nya:  
amyed ashen yi da" apyaid atoo: seing:  
da" jonu" bue" loo" wa zi nghoid. Hau:  
ziri doem tau" byid: da" zain void ri we'  
ayo" tau" yu loo: wa. <sup>31</sup>Nghoid loug we'  
vang khyam: abo da" voogung joem mo  
yhoem: joem rigi yoo joem yhang: ti"  
yo" soin: yu wa. Xang: shi" da" yhoem:  
seing gi hau: joem ri doem qei yu wa da"  
akhang" yo" wigi nyangnu" gi doem tau"  
byid: da" zain void moo: doem tau" byid:  
wa zi nghoid. <sup>32</sup>Nghoid loug we' Levi  
byu yigi vooomoo" khoug: mo nyangnu"  
da" ziyoo joem ri kha" ayo, ri nghoid  
loug we' qei yu wa da" akhang" bo da:.  
<sup>33</sup>Vooomoo" daloem: mo yhoem: daloem  
ri Levi byu yi oung" zo: wigi doem aqei  
yu nghoid rigi hau: zigi doem tau" byid:  
da" zain void ri doem tau" byid: ca" wa zi  
nghoid. Ciwim gari: nyangnu" vooomoo"  
khoug: mo Levi yi seing: da" yhoem:  
joem gi Israela byumyu" yi akhoug:  
moo: nyangnu" seing: da" ziyoo nghoid  
da:. <sup>34</sup>Nghoid loug we' Levi byu yi da"  
vooomoo" joem ri lheing khoem to" da"  
coung" mhain" yoo rigi khanham we  
age oung" wa. Hau: zigi nyangnu" da"  
apyaid atoo: mo ziyoo nghoid.

**Sho" Jhen: Bang: Ri  
Jhid" Byid: Khyoo:**

<sup>35</sup>Re" nam moo nyid da" Israela  
mang: nhung" dayug gi sho" jhen: lo

wigi nyang: nya: voem: dau ayo" khu:  
loo: nghoid rigi re" nam moo nyang:  
xo' lho: yo" nyid wa shid re" vho"  
kung: dayug khyo" nyang: ri lhung:  
yu wigi nyang: ri pang" thoug byid:  
ca" da:. <sup>36</sup>Nyang: ri atu" amyaid asang:.  
Mangsoo ri phau" myang: tam" gyo:  
wigi re" da" Israela mang: nhung"  
phoo ri anam moo: nyid nhang: ca"  
wa zi nghoid. <sup>37</sup>Nyang: ri jhid" byid:  
da" ngei ri atu" amyaid asang:. Houg:  
lho: nang nyang: ri oung" byid: da"  
zoo: noem dang moo: atu" amyaid  
ayu goo". <sup>38</sup>He: zigi nanu" ri Khanan  
mung" byid: wa shid re" yo' nyang: gi  
nanu" da" Mangsoo bui" nyid wa shid  
re" Egutu mung" mo nanu" ri shu"  
thu lo da" nanu" ASEING Mangso da"  
amyeing" dang: nghoid da:.

**Join Yiri Doem Nhang:  
Kaid Khyoo:**

<sup>39</sup>Re" nam moo nyid da" Israela  
mang: nhung" dayug gi gye" sho"  
jhen: wigi nyang: nya: gung ri join  
khyo" nang ri re" oung" byid: nghoid  
rigi nang gi nyang: ri join moo" age  
zei: nhang: wa zi nghoid. <sup>40</sup>Nyang:  
gi vho" kung: dayug khyo" nang yo'  
dage" nyid wigi doem nhang: kaid da"  
zain nyid ju" sho' nang ri dei byid: wa  
zi nghoid. <sup>41</sup>Hau: ayo, ri nyang: yo' nya:  
zoo: yi re" jang" mo thu lo" lho: nya:  
da" yhoem: byu yi jang" khyoo: yo'  
nya: phoug" phyd" yi da" mougmyid  
khyoo: doem tau" loo" wa zi nghoid.  
<sup>42</sup>Israela byumyu" yigi ASEING da" join  
nghoid boem ziyoo nyang: gi nyangnu"  
ri Egutu mung" mo shu" thu lo da:.  
Nyangnu" gi join koid wa khyo" age  
oung" wa. <sup>43</sup>Nyangnu" ri thain: thain:  
azoem" khau: goo"- nanu" ASEING  
ri phau" myang: tam" gyo: nyid ge'.  
<sup>44</sup>Nang join vho: nghoid rigi nanu" da"  
lheing khoem moo: nyid da" byumyu"

yi jang" mo nyangnu" ri yo" qei yu wa zi nghoid. <sup>45</sup>Nang gi nanu" akhoug: moo: nyid boem da" tungbau byu yi da" zooshang: yiri we' yo" qei yu da: Houg yhang: te" nanu" mung" moo khu: da" zooshang: yigi nanu" re" yo" ge bui" wigi <sup>46</sup>nang gi nyangnu" ri re" yuggi zoo: yi shid re" mid khyo" ge too" kho' da:. Nyangnu" gi houng bang: ri nyangnu" kangsoo' dei nyid da" ayo, byeung" sho' dei byid: nyid wa zi nghoid. Nghoid loug we' nang gi re" Israela mang: nhung" phoo ri thain: thain: ce: ja: moo: we' anhang: zoo: goo".

<sup>47</sup>Nang yo' dage" nyid da" tungbau byu dayug gi yoo" zoo: yoo" shug lo lho: Israela mang: nhung" phoo dayug sho" jhen: lo" wigi nya: gung nyang: join dayug khyo" hau: tungbau phoo anghoid lang" hau: yug da" yhoem: byu dayug ri oung" byid: ein: shang. <sup>48</sup>Nyang: oung" zo: thang: ri nyang: gi doem tau" qei yu wa da" akhang" yo" jo, ashi". Nya: mang: nhung" yi dayug yug anghoid lang" <sup>49</sup>Nya: laid anghoid lang" nya: yhoem: vhoo: yhoem: tho' mang: nhung" anghoid lang" gootu: nyang: yo' jhang da" bidnoem seing" cang" dayug yug gi nyang: ri doem yo" tau" qei yu da:. Anghoid lang" nyang: nyang: ngei tham: sho' yo" kung: nghoid rigi nyang: gi nyang: nya: da" loid byoin khyoo: ri yo" qei yu da:. <sup>50</sup>Nyang: gi nyang: ri qei yu da" yug yo' sham: goo" ca" wigi nyang: nya: gung ri oung" pyam da" ayo, mo zi loid byoin nhang: da" zain void ju" sho' da" zain nyid joem ri nghab wigi vhoo" kung lang: jhang phoug" ri ayang: koid lho: nya: da" gu ri byid: pyam ca" da:. <sup>51-53</sup>Nyang: gi zain nyid ri ayang: koid lho: vhoo" kung: khyo" ngho" zi shau" nghoid rigi zain nyid khanhoo' deing shi" ein: ziri cang wigi

phoug" soin: lho: qei da" aphoug" ngei ri doem khyau" byid: ca" da:. Nya: yhoem: seing gi nyang: ri thain: thain: age nhang: zoo: nghoid da:. <sup>54</sup>Nyang: gi hau: khyoo: joem mo dakhyoo: khyo" we' aloid byoin nghoid rigi nyang: yo' nya: zoo: yiri doem ju" loo wa da" theing: yu zain ri loid byoin nhang: kaid ca" da:. <sup>55</sup>Israela byu dayug gi apyaid atoo: join age bui" wa. Ciwim gari: Israela byummy" yigi ASEING da" join yi nghoid ago". Nyang: gi nyangnu" ri Egutu mo shu" thu lo da:. Nyang: gi nyangnu" da" ASEING Mangsoo nghoid da:.

### **Tam" Gyoo: Bang: Shid Re" Mainkaid Byid: Khyoo:**

(*Tid 7:12-24; 28:1-14*)

**26** ASEING gi «No' wa shid re" soolhoo: joem yu phara" alhoo: lug zeingboug: azhug goo"- lugzeing akyung" goo". Ngoo gi nanu" ASEING Mangsoo nghoid. <sup>2</sup>Noku thung" pui" joem ri koid nyid wigi ngoo ri noku da" joyoo joem ri phau" myang: nyid ge'. Ngoo gi ASEING nghoid.

<sup>3</sup>Nanu" nga" tarha" joem yo' dakhyo" nyid lho: nga" amyeing" dang: ri cang nghoid rigi <sup>4</sup>Ngoo gi jo eung: da" ayo, ri moug: voo nhang: wa. Houg: lang" mougmyid gi shivoo: shiloem yug re" lho: agam joem moo: ashi" zei: wa zi nghoid. <sup>5</sup>Nanu" da" gugzoo meiloem joem gi gye" gi yoomo zabyid shi" phyo' yu wa ayo, ju" rilang" nanu" gi gugzoo meiloem joem ri yham" yu nyid shi" wa. Houg: lho: nanu" gi gugzoo meiloem joem doem shoo" wa ayo, ju" rilang" zabyid shi" daphyo' yu nyid shigoo" wa. Nanu" zoo nau zi dangain" yo' yu wigi nanu da" mungdain: moo goug: nyu: tung" yo" nyid wa zi nghoid.

<sup>6</sup>Ngoo gi nanu" mungdain: ri ngei pyoo: yug yoo nhang: wigi nanu"

gi hang" ri we' agyug ca" loo: yo" yhoeb wa zi nghoid. Ngoo gi nanu" mungdain: khoug: mo gyoug ca" gougnyhoug joem ri yu pyam byid: wa wigi houg moo meing: byo, zi ajo, loo: wa. <sup>7</sup>Nanu" gi nanu" da" gyivoo joem ri oung: pyam boem wa zi nghoid. <sup>8</sup>Nanu" wim: yug gi dashoo: yug ri yo" oung: pyam wa. Dashoo: yug gi damoin yug ri yo" khaid oung: pyam wa. <sup>9</sup>Ngoo nanu" ri mainkaid byid: wigi nanu" ri zooshang: myoo: sho' byid: wa. Ngoo nanu" yo' koid to" da" dang: theing ri nga" shoid mo ziri ngoo cang nyid wa. <sup>10</sup>Nanu" da" shivoo: shiloem yham" yu zigi sung myo: yoomo hau: joem gi dazain goin" deing jo, wa zi nghoid. Houg: lang" nanu" gi shivoo: shiloem aseig kaid wa joyoo ajo, yoomo deing jo, da" shivoo: shiloem xoug" joem ri thoid pyam ca" ri" goo" wa. <sup>11</sup>Ngoo gi nga" da" younglho' zoem" jo, da" nanu" akhoug: moo: nyid wa. Ngoo gi nanu" jang" mo khanham we' aphug lo" byug wa. <sup>12</sup>Ngoo gi nanu" yo' dage" nghoid nyid wa. Ngoo gi nanu" da" Mangsoo nghoid wa. Houg: lho: nanu" gi nga" byumyu" yi bui" loo: goo" wa. <sup>13</sup>Ngoo gi nanu" ri join khanham we' abui" loo: wa shid re" Egotu mo nanu" ri shu" thu lo da" nanu" ASEING Mangsoo nghoid. Ngoo gi nanu" ri doin: zeug to" da" yoem: so' ri khyau" pyam wigi nanu" vhuloem ri nhang ci: lho: ngoo nanu" ri khyoo: soo" nhang: bye:» ga: tid.

**Atam" Gyoo: Bang: Shid Re"  
Yooboo Dam Byid: Khyoo:**

(*Tid 28: 15-68*)

<sup>14</sup>ASEING gi «Nanu" nga" amyeing" dang: ri atam" gyoo: nghoid rigi nanu" gi yooboo dam byid: zi shau" goo" wa. <sup>15</sup>Nanu" gi nga" tarha" yo' amyeing"

dang: ri tam" gyoo: wa shid re" ngeug pyam wigi ngoo nanu" yo' koid to" da" dang: theing ri phyo' pyam nghoid rigi <sup>16</sup>ngoo nanu" ri yooboo dam byid: wa. Ngoo gi nanu" adang moo: kyi" khyeug khyoo:- ayo" byang" da" noo phyoo"- nanu ri myo, jid nhang: da" noobau: phyobau: bue" wigi nanu" da" kangso' joem: loo" wa da" khyoo: ri bui" nhang: wa. Nanu" gi nanu" da" shivoo: shiloem ri sho" nghoid loug we' hau: joem ri agi nhang: wa. Ciwim gari: nanu" gyivoo yigi nanu" ri oung: pyam wigi nanu" sho" to" da" shivoo: shiloem joem ri zo: pyam boem wa. <sup>17</sup>Ngoo nanu" ri thoughteung wa houg: lang" nanu" soem" goo" wa wigi nanu" ri ngheing" mo, wigi nanu" ri vhoebkhang" loo goo" wa. Nanu" ri hang" we' akhaid loug we' nanu" gi gye" dain ziyo' tang" phang: yen" goo" wa.

<sup>18</sup>Hid su" bue" thang: rilang" nanu" nga" dang: ri atam" gyo: nghoid rigi ngoo gi nanu" da" yooboo dam ri nyhed zhang lung: loo nhang: wa. <sup>19</sup>Ngoo gi nanu" da" nheigloem: thain: nghoid boin: da" ziri khyau" pyam wa. Moug: avoo wigi nanu" mougmyid gi kyug lo" wigi joto' yhang: ti" thain: loo" nhang: wa. <sup>20</sup>Nanu" yoem: kaid lho: koid to" da" moo" gi nanu" shid re" akyu" abyid: wa. Ciwim gari: nanu" mougmyid gi shivoo: shiloem athu ziyo' seiggam joem gi ashii" azei: wa.

<sup>21</sup>Nanu" gi ngoo ri ngeug pyam wigi ngoo ri phau" myang: tam" gyoo: wa ziri ngeug pyam shi" nghoid rigi Ngoo gi nanu" yooboo dam ri nyhed zhang doem lung: byid: wa. <sup>22</sup>Ngoo gi nanu" phung: khyoo: gyoug pho" da" gougnyhoug joem ri nhang: kaid byid: wigi hau: joem gi nanu" da" zooshang: yiri ngaid said pyam- nanu" da" gougnyhoug ri ngaid said pyam lho:

nanu" khyoomoo" joem jham" coug:  
youg bue" wa shid re" nanu" ri dajhi  
kyeing" dateing too" loo: wa.

<sup>23</sup>He: yooboo dam dangain" thang:  
ri nanu" ngoo ri atam" gyoo: lho: xo'  
wigi ngoo ri aphoug" akhyoid koid  
nyid shi" nghoid rigi <sup>24</sup>Ngoo gi nanu"  
ri gyi koid lho: xang: shi" tho' je lid:  
da" yooboo dam ri nanu" atho' moo:  
nyhed zhang doem lung: byid: wa.  
<sup>25</sup>Nga" da" dang: theing ri phyo' pyam  
nyid yoomo ngoo nanu" ri meing byo,  
nhang: wigi yooboo dam byid: wa.  
Houg: lho: nanu" gi goem loem wa  
shid re" nanu" voomoo" khoug: moo  
zeing: foem: nyid nghoid rigi ngoo gi  
nanu" akhoug: khyoo: ayo" byang" ge  
da" noobau: phyoobau: nhang: kaid  
byid: wa. Houg: lho: nanu" ri nanu"  
da" gyivoo shidkhoin" moo soem" loo"  
nhang: wa. <sup>26</sup>Ngoo gi nanu" ri pang"  
thoug da" zoo: noem ri phyed pyam  
byid: wa. Houg: lang" myiyi: daxi yug  
gi nyangnu" ca" da" zooyho' dangain"  
ri koid wa shid re" zooyho' bung:  
myikhyoem daloem: za: daca" goo"  
wa. Nyangnu" zoo: noem ri kho' gam  
byid: ca" goo" wa. Hau: gu: dangain"  
ri nanu" bain zo: pyam thang: ri nanu"  
zoo dayoid nyid shi" goo" wa.

<sup>27</sup>He: gu: dangain" bain thang: ri  
nanu" ngoo ri aphoug akhyoid lho:  
nga" dang: ri tam" gyoo: wa ngeug  
pyam shigo" nghoid rigi <sup>28</sup>Ngoo  
nheigloem: yoin ziyoy' nanu" jang"  
khyoo: phug lo lho: xang: shi" tho' je  
xo: da" yooboo dam ri nyhed zhang  
doem xo' byid: wa zi nghoid. <sup>29</sup>Nanu"  
zooyoid zigi gye" dam xo: wigi nanu"  
nya: zoo: yiri nanu" zoo: goo" wa zi  
nghoid. <sup>30</sup>Bau gung joem tho' moo  
jo, da" nanu" da" noku joyoo ri phyo'  
pyam byid: wa. Nanu" da" shoem:  
nam pyo: ja: shugbyid: da" phoin:  
joem ri we' phyo' khyo' pyam byid:

wigi nanu" da" shid: mang joem ri  
byo, gyo" jo, da" nanu" yu phara"  
soolhoo: joem moo du" ze' pyam wa.  
Ngoo gi nanu" ri dam xoo: sho' yu"  
co' yu" ngheing" pyam wa. <sup>31</sup>Ngoo  
gi nanu" da" voomoo" joem ri phyo'  
shoin wa. Nanu" da" noku joyoo ri  
phyo' pyam wigi nanu" da" ngei" xoin"  
ri we' ngeug pyam byid: wa. <sup>32</sup>Ngoo  
gi nanu" mougmyid ri gye" xo: da"  
khyo" bain sho' phyo' pyam wa wigi  
hau: ziri seing: yu go" da" gyizoo: yigi  
hau: phyo' sain" pyam ziri yu" dain  
goo" wa zi nghoid. <sup>33</sup>Ngoo gi nanu"  
adang moo: meing: byo, nhang: wa  
wigi nanu" ri tungbau meing: khyo:  
byo: sain" loo" nhang: wa. Nanu"  
mougmyid gi jham" coug: youg bui"  
byug wa. Nanu" da" voomoo" joem gi  
byo, yoin" jo, boem goo" wa nghoid.  
<sup>34-35</sup>Houg: lang" nanu" wigi atheing:  
nhang: da" mougmyid gi bain sho'  
theing: nyid da" zain nyid joem moo:  
ngei pyo: lo wa. Hau: mougmyid  
gi agoin agoo" yo" jo, lho: nanu" gi  
gyivoo yi moug: khyoo: pyoung" she:  
loo" shau" da" ayo, ri hau: mougmyid  
gi dougno: zi shau" wa.

<sup>36</sup>Pyoung" she: loo" shau" bang:  
nanu" ri ngoo wigi gyoug nhang: wa  
lho: lid wigi seig yoo moid nhoin' thui:  
gi nanu" ri tang" phang: yen" nhang:  
wa. Meing: zain: jang: moo nanu" ri  
hang" wigi we' akaid nghoid loug  
we' nanu" tang" phang: yen" goo" wa.  
Nanu" nam moo gyivoo anyid nghoid  
loug we' nanu" leung lo" boem goo"  
wa. <sup>37</sup>Nanu" ri hang" akaid nghoid  
loug we' nanu" dayug dang mo dayug  
zang" thung" leung boem goo" wa.  
Nanu" gi cite" gyi ri we' ayo" zain:  
boem goo" wa. <sup>38</sup>Nanu" gi pyoung"  
she: loo" shau" da mougmyid moo:  
shid: boem goo" wa. Nanu" da" gyivoo  
yi mougmyid wigi myhau: pyam zi

shau" goo" wa. <sup>39</sup>Nanu" da" gyivoo mungdain: moo deing nyid shi" bang: nanu" dajhi kyeing" mo zi nanu" nya: da" yooboo yo' nanu" da" phoug" phyid" yi da" yooboo yoomo amyed afoo" joem: byug boem wa.

<sup>40</sup>Nghoid loug we' nanu" da" amyed ashen yigi nyangnu" da" yooboo ri we' ngoo ri ngeug pyam thoughteung gyi koid lo da" nyangnu" phoug" phyid" yi da" yooboo joem ri yhen: yu wigi <sup>41</sup>Ngoo ri nyangnu" jhang gyi phug koid nhang: lho: nyangnu" da" gyivo mungdain: khyoo: pyoung" she: loo" shau" nhang: wa. Lo" thang ri nanu" amyed ashen yigi nheigloem: nyhoem khyo' wigi nyangnu" gyi koid ziyoi' yooboo shid re" dam ri bain kham: pyam lang" <sup>42</sup>ngoo gi Yaku- Isag- Abraham bang: yo' koid to" da" nga" dang: theing ri myid boin: wa. Hau: mungdain: ri nga" byu yiri byid: wa shid re" nga" dang: theing aseig ri doem koid wa. <sup>43</sup>Nghoid loug we' xang: shi" moo hau: mungdain: mo byu yiri yu pyam ca" da:. Houg: lang" hau: mungdain: gi bain sho' no: nyid zi shau" wa. Houg: lho: nyangnu" gi nga" tarha" joem ri yo' nga" amyeing" dang: joem ri ngeug pyam bye: da" shid re" yooboo dam ri byeung" sho' kham: yu ca" goo" wa. <sup>44</sup>Nghoid loug we' nyangnu" gi nyangnu" da" gyivoo yi da" mungdain: moo: nyid nyid shi" nghoid loug we' ngoo gi nyangnu" ri bain sho' ashe: pyam- aphyo' shoin pyam wa. Housu" koid ri nyangnu" yo' ngoo koid to" da" dang: theing gi thang lo" byug wa. Ngoo gi nyangnu" da" ASEING Mangsoo nghoid. <sup>45</sup>Ngoo ASEING gi nyangnu" Mangsoo bui" nyid wa shid re" nga" byu yiri Egotu mung" mo shu" thu lo da" khyo' wigi byumyu" dangain" ri nga" yoem: so' ci: shug da" uri nyangnu" phoug" phyid"

yi yo' ngoo koid to" da" dang: theing ri aseig doem koid wa» ga: tid.

<sup>46</sup>Hau: gu: dangain" gi Israela byumyu" yi shid re" Sina boem dang moo ASEING wigi Moshe ri byid: da" tarha" joem yo' amyeing" dang: joem nghoid wa.

### ASEING Ri Byid: Da" Jhungshug Joem Yo' Sen: Da" Tarha" Joem.

**27** ASEING gi Moshe ri <sup>2</sup>Israela byumyu" yi shid re" vhoo moo: tid to" da" thung" tarha" joem ri byid: da:. Byu dayug yug ri ASEING jhang shugbyid: wa ein: gooki lid da" thang" cab to" to" nghoid ri hau: yug gi tarha" vang da" azhang ri ci: wigi vhoo: moo: tid to" da" aphoug" ngei ri byid: lho: yo" loid byoin da:. <sup>3-7</sup>Soem" xi: zain mo khyug xi: zain agyoo: mo

-Yuggi yigi ngei 50 pyi"

-Myiyi: myhi' yigi ngei 30 pyi"

-Wim: zain mo eig xi zain agyoo:

mo yuggi yigi ngei 20 pyi"

-Zoomyi: yigi ngei 10 pyi"

-Wim: zain vhoo: mo yuggi nu"

yigi ngei 5 pyi"

-Myiyi nu" yigi ngei 3 pyi"

-Khyug xi: zain dang mo yuggi

yigi ngei 15 pyi"

-Khyug xi: zain dang mo myiyi:

yigi ngei 10 pyi" byid: ca" da:.

<sup>8</sup>Thang" cab to" da" byu dayug

gi ke' to" da" aphau" ri byid: wa

shid re" gye" sho" jhen: nghoid

rigi nyang: gi byu hau: yug ri

khainjung pho jang" shu" yhe:

wigi khainjung phoo gi byu

hau: yug yo" byid: wa nhoo' ri

cang wigi nyhoem: da" phoug"

ri ki' byid: wa zi nghoid.

<sup>9</sup>ASEING ri shugbyid: wa da" xoin" khyo" lhoem: yu moin: da" gougnyhoug yo' sen: wigi thang" cab to" da" zi nghoid rigi ASEING ri byid:



da" jhungshug ja: khang" moo" gi younglho' nyid da:. <sup>10</sup>Thang" cab to" da" yug gi hau: shid re" gougnyhoug gootu: ri age thid byid: nghoid da:. Nyang: hougsu" koid nghoid rigi gougnyhoug eig du: goin" ASEING re" nghoid da:. <sup>11</sup>Nghoid loug we' thung" khyo" ayung" alho' da" gougnyhoug yo' sen: da" thang" cab nghoid rigi hau: zigi ASEING ri shugbyid: da" xoin" khyo" age lhoem: yu nghoid da:. Hau: gougnyhoug ri khainjung pho jang khyoo: she: yhi: wa zi nghoid. <sup>12</sup>Khainjung phoo gi hau: ziri ge zi age zi moo cang wigi gu ki' byid: wa zi nghoid. Houg: lho: hau: gu gi lo" thang mo gu nghoid wa. <sup>13</sup>Byu hau: yug gi hau: gougnyhoug ri doem tau" qei nau nghoid rigi nyang: gi hau: gu tho' shoo: boem 20 doem pug lung: byid: wigi qei ca" da:.

<sup>14</sup>Byu dayug yug nya: yhoem: ri ASEING ri shugbyid: lang" Khainjung phoo gi hau: yhoem: ge zi age ziri cang lho: gu ki byid: wa zi nghoid. Houg: lho: hau: gu gi lo" thang da" gu nghoid wa. <sup>15</sup>Hau: yhoem: ri shugbyid: da" yug gi hau: ziri doem tau" qei nau nghoid rigi nyang: gi hau: gu tho' shoo: boem 20 doem pug lung: byid: wigi qei ca" da:.

<sup>16</sup>Byu dayug yug gi nya: mougmyid dadu ri ASEING ri shugbyid: nghoid rigi hau: mougmyid gu ri amyau: kxanhoo vang ziri cang wigi yoono: datang ri ngei daxi khyo" gu ki byid: wa zi nghoid. <sup>17</sup>Nyang: gi mougmyid ri yooboo jhen: xab byid: da" zain nyid bain yo' dage" shugbyid: nghoid rigi gu byeung" sho' nghoid ca" da:. <sup>18</sup>Nyang: gi doem tau" byid: da" zain kha yo, ri nghoid nghoid shugbyid: nghoid rigi doem tau" byid: da" zain void khamyhang deing shi" ziri soin: yu" wigi khainjung phoo gi gu ri myid:

tu' lho: ki byid: ca" da:. Houg: lho: hau: gu ri khyoo ca" da:. <sup>19</sup>Mougmyid ri shugbyid: to" da" yug gi: hau: ziri doem tau" qei yu nau nghoid rigi nyang: gi hau: gu tho' shoo: boem 20 doem pug lung: byid: wigi qei yu ca" da:. <sup>20</sup>Byu dayug gi ASEING mo xang: shi" atau" qei yu lho: gootu: dayug yug ri hau: mougmyid oung" nghoid rigi nyang: gi doem tau" qei yu wa da" akhang" ayoo" loo wa. <sup>21</sup>Thang: lheing: doem tau" byid: da" zain nyid moo hau: mougmyid gi ASEING da" apyaid ato: jonu" gyeing" nyang: bue" ri" wa. Hau: zigi khainjung yi shid re" nghoid wa.

<sup>22</sup>Byu dayug gi nyang: qei yu da" yoo mougmyid ri ASEING ri shugbyid: nghoid rigi <sup>23</sup>khainjung phoo gi thang: lheing: doem tau" byid: da" zain nyid ju" sho' gyoo: mo zain void joem ri soin: yu" wigi hau: aphoug" gu ri myid tu lho: ki byid: wa zi nghoid. Houg: lho: byu hau: yug gi hau: gu ri hau: nyid" nyang: byid: ca" da:. Hau: ngei gi ASEING seing: da" ngei nghoid da:. <sup>24</sup>Hau: khyam: yoo mougmyid ri doem tau" byid: da" zain void moo xang: shi" seing: da" yhoem: seing anghoid lang" nya: amyed ashen yiri doem tau" byid: wa zi nghoid.

<sup>25</sup>Aphoug" gu dangain" ri tarha" vang da" azhang ri ci: wigi ki wa zi nghoid.

<sup>26</sup>Xang: shi" xang" da" gougnyhoug gi ASEING da" zi nghoid yoomo hang" we' nyang: nya: myid vho: xoin" khyo" ASEING ri age shugbyid: nghoid da:. Nu nu"- yang nu"- coidbaid nu" gi ASEING seing: zi nghoid da:. <sup>27</sup>Nghoid loug we' xang shi" xang" da" ayung" alho' gougnyhoug rigi tarha" vang gu da" shoo: boem 20 doem pug lung: byid: wigi doem tau" qei yu ca" da:. Hau: ziri adoem tau" qei yu nghoid rigi gootu:

dayug ri tarha" vang da" aphoug: gu  
yo' yo" oung" pyam wa zi nghoid.

<sup>28</sup>ASEING ri bain bain shugbyid:  
to" da" xangsu: byu- gougnyhoug-  
mougmyid ci: nghoid nghoid- hang"  
we' hau: ziri age oung" age qei yu wa  
zi nghoid. Hau: zigi ASEING seing: da"  
zi nghoid da:. <sup>29</sup>Xangsu: byu rilang"  
shugbyid: too" bye: yug ri age doem  
tau" qei yu nghoid da:. Nyang: gi said  
pyam zi shau" ca" da:.

<sup>30</sup>Shivoo: nghoid ri nghoid shi"  
nghoid ri nghoid mougmyid mo  
thu da" gu dangain" daxi boem mo  
daboem gi ASEING shid re" nghoid.

<sup>31</sup>Byu dayug yug gi houng mo doem  
tau" qei yu nau nghoid rigi nyang:  
gi tarha" vang da" aphoug" gu  
moo shoo: boem 20 ri doem pug

lung: wigi byid: ca" da:. <sup>32</sup>Yhoem:  
gougnyhoug daxi: du: mo dadu:  
khang" moo" gi ASEING shid re"  
nghoid da:. Gougnyhoug joem ri  
nghab uri daxi du: mo dadu: gi  
ASEING shid re" nghoid da:. <sup>33</sup>Ayung"  
da" gougnyhoug joem ri khyen: wa  
khyo" yhoem: seing: gi gougnyhoug  
joem ri age jung nghoid da:. Nyang:  
gi ciri: we' gootu: age thid nghoid  
da:. Nyang: gi dadu: shid re" gootu:  
dadu: ri thid kaid nghoid rigi hau:  
gougnyhoug eig du: goin" gi ASEING  
zi bue" ri" wa. Hau: joem ri age tau"  
qei yu nghoid da:.

<sup>34</sup>He: joem gi Israela byumyu" yi  
shid re" Sina boem dang moo: Moshe  
ri ASEING wigi byid: da" amyeing"  
dang: joem nghoid da:.